

近代中國史料叢刊續編第十一輯
沈雲龍主編

綏

遠

奏

議

貽

穀著

文海出版社
有限公司印行

綏遠奏議

貽穀題

綏遠奏議目錄

補授綏遠城將軍叩謝 天恩並請赴都 陸見摺

恭報回綏接授軍篆日期叩謝 天恩摺

攜印赴邊履勘綏遠八旗牧廠荒地情形恭報起程日期摺

烏蘭察布盟四子郡王旗狡抗不認賠教墊款據實陳明請 旨飭辦摺

烏蘭察布盟長阻撓安設廳治各事懇 恩飭由理藩院嚴飭遵辦片

查勘八旗牧廠事畢報明回綏日期片

陳明綏遠城常備軍營武備學堂經費奇絀並現在辦理情形摺

綏遠城牧廠地畝墾放較難擬另籌變通辦法並試辦屯田摺

請 飭歸化城副都統幫同辦理綏遠城牧廠墾務片

四子郡王旗漸就範圍呈請寬限來綏聽候議辦賠教報墾各事片

恭謝 恩賞福字摺

恭謝 恩賞福壽字摺

綏遠屯墾無款擬請援案開辦牛捐摺

綏遠馬廠煤稅礦利銀兩作爲學堂購置書籍儀器及貼補膏火片

後套賊匪起事徵集兵隊合力勦辦並保護教堂大概情形摺

擬酌改土默特常備軍營制餉章將騰出節省銀兩添置軍裝摺

擬用當課銀兩並暫借商款爲土默特常備軍購買快槍片

陳明達拉特旗教案完結賠款一律交清前後辦理情形摺

酌保綏遠城常備軍礮隊勦辦後套馬賊出力員弁摺

陳明四子王旗教案賠款抵銀一律交清前後辦法情形摺

由墾代準噶爾旗籌償賠款收回地畝速結教案辦理情形片

甄別滿蒙候補筆帖式擬請變通揀補以裨公務摺

陳明整頓綏遠旗務已經籌辦及應行籌辦各事宜摺

擬飭綏遠二十佐領公同承領廠地交銀以備歸補馬價片

收廠地畝墾放漸形暢旺請 旨飭部頒發空白執照片

綏屬全蒙各旗教案一律完結陳明前後辦理情形並擇尤保獎出力人員摺
蒙旗教案一律清結請將尤爲出力之壽勳等三員從優給獎片

蒙旗教案一律辦結請將法國比國各洋員教士分別給獎片

恭報攜印赴邊履勘綏遠八旗牧廠開墾情形起程日期摺

綏遠城牧廠屯墾漸次擴充需用不敷擬請推廣屯墾捐輸摺

綏遠城常備軍營土默特常備軍挪款購置快槍片

派員勘查渾津黑河莊頭承種圈地所餘畝數摺

營務復發懇 恩賞假一月以資調理摺

辦理教案動用經費彙總核實報銷摺

設立官錢局片

防禦春林年邁呈請休致並懇 恩賞全俸摺

請將協領榮昌仍以副都統 記名簡放片

綏遠城武備學堂建蓋軍器所片

叩謝 恩賞 祖母 御書匾額紫檀如意等物摺

遵章酌保土默特常備軍翼長管帶各官摺

籌添武備學堂經費發商生息片

整頓土默特旗務片

佐領雅爾哈年邁呈請休致摺

恭謝 恩賞福字摺

恭謝 恩賞福壽字摺

土默特官兵失業苦累萬分亟宜整頓清釐以資生計摺

整理口外歸薩托和清原佔土默特地基片

土默特六成官地被水成災擬請援案分別蠲緩摺

親赴後套勘驗西盟墾務情形恭報起程日期摺

接署歸化城副都統篆務恭謝 天恩摺

敬舉調墾賢員懇 恩簡署歸化城副都統摺

請改獎阿勒坦鄂齊爾片

携印巡視伊克昭河南各旗恭報起程日期摺

擬整頓土默特警察力除舊習俾益實際片

綏遠屯墾牛捐需用甚繁懇將收捐銀數按減折實銀核計以竟屯功摺

委派協領榮昌赴津續購新槍礮位子彈並多方措集鉅款以彌槍礮各價片

綏遠城官兵貼補米價擬請定立限制以節度支而規久遠摺

由右翼四成押荒項下提銀補還綏遠城積欠兵米片

續籌綏遠武備學堂經費以資接濟而勵進修摺

就綏遠城書院改爲中學堂並添設蒙養各學堂片

土默特壘粟畝捐收數無多擬請留充該旗舉行要政津貼辦公以示體恤而

資補助摺

綏遠兵米擬請截留減平銀兩以資補助摺

土默特奈領恃勢詐財擬請革職歸案審訊摺

整頓土默特蒙旗政治片

綏遠年又荒旱籌款購糧預備賑撫摺

綏遠常備軍挑足一營改名陸軍并變通餉章摺

據情代奏榮昌赴任摺

土默特停支巡警兵餉移作陸軍添兵加餉及學堂經費摺

籌土默特蒙小學堂經費片

驍騎校年逾六旬請休致摺

職官相毆據實參請懲處摺

揀員充補土默特佐領片

甄別旗員以資整頓摺

三年任滿懇請 陛見摺

審明已革奈領詐財各情分別擬結摺

變通官缺揀補章程摺

防禦騎校因病請休致摺

榮壽承襲世職留屯墾當差片

謝 賞江綢恩摺

武備學堂畢業保獎在事各員摺

籌辦綏遠巡警情形摺

陸軍小學堂挑頭班學生并附入土默特右衛學生片

籌警察經費片

謝 賞福壽字恩摺

循案徵收口外各莊頭折色銀兩摺

謝 賞福字恩摺

添購新式步槍摺

縷陳現辦學務大概情形摺

巡視吳地并帶查廣覺寺摺

子姪補郎中謝 恩摺

查看廣覺寺現在情形片

留佐領玉崑差遣委用片

遵議綏遠建省及大概辦法摺 附清單一件

赴右衛考驗 軍政摺

胡恩光免補千總歸都司補用片

考驗 軍政逾歲官員堪以留任摺

考驗 軍政分別舉劾摺

右衛旗官嗜好太甚請革職休致片

謝 賞綢緞恩摺

陸軍小學堂續添二班學生并增設員司片

中學堂附設高等小學堂片

清查土默特地畝及現在辦法摺

請開復福祿原官及劉鴻達銜翎片

試辦抽收煤炭密釐以濟公用摺

遵 旨籌議體恤蒙旗謹陳管見摺

遵 旨妥籌旗丁生計及現擬續辦各情形摺

舉辦新政參用滿人片

安置閑散旗丁一併撥地片

先興蒙學再練蒙兵片

據實糾劾文哲琿摺

The image shows a vertical ledger page with 14 columns. The columns are defined by thin vertical lines. At the top right of the page, there is a header section containing several columns of small, illegible text. There is a small dark artifact on the right side of the page, roughly halfway down.

| Column 1 | Column 2 | Column 3 | Column 4 | Column 5 | Column 6 | Column 7 | Column 8 | Column 9 | Column 10 | Column 11 | Column 12 | Column 13 | Column 14 |
|----------|----------|----------|----------|----------|----------|----------|----------|----------|-----------|-----------|-----------|-----------|-----------|
| | | | | | | | | | | | | | |

光緒二十九年八月十八日具

奏爲叩謝

天恩籲懇

陛見恭摺仰祈

聖鑒事竊奴才以察哈爾左翼墾務正在暢行文放必須親往履勘並有應與

都統奎順等商辦事件當於八月初二日由歸化起程曾經隨摺陳明在

案茲於八月十四日馳抵張家口恭閱邸抄光緒二十九年八月十一日

內閣奉

上諭綏遠城將軍著貽補授欽此跪聆之下欽感莫名當卽恭設香案望

闕叩頭謝

恩訖伏念奴才謬躋詞館洵佐戎樞自奉

命督墾蒙旗議開邊利西則衆情狡執兩盟之疑慮互滋東則頭緒紛繁兩翼

之清釐匪易近雖伊盟就議察墾暢開而併力經營時虞弗給乃復仰荷

殊恩之錫畀以專閫之榮查綏遠將軍統馭烏伊全盟節制宣大諸鎮內以裕
八旗生計外以固三晉屏藩當此籌備邊防拓興蒙利兼營並舉措置尤
難自顧驚庸彌深悚懼惟有懇

恩俯允奴才就近入都

陛見俾得欽承

聖訓並面陳蒙旗墾務緊要情形期有遵循念邊計之艱難責成愈重瞻

天顏於咫尺依戀彌殷所有奴才感激下忱理合恭摺叩謝

天恩額懇

陛見伏乞

皇太后

皇上聖鑒訓示謹

奏本月二十八日奉

硃批毋庸來見欽此

光緒二十九年十月十七日具

奏爲恭報回綏接受軍篆日期叩謝

天恩仰祈

聖鑒事竊奴才於八月十四日抵張家口恭奉八月十二日

諭旨補授綏遠城將軍當卽具摺謝

恩籲請

陛見奉

硃批毋庸來見欽此遵將察哈爾左翼墾務趕速清理九月二十日自張家口

起程西旋順路由軍台草道周歷放墾處所察看情形並勘分台羣界址

十月初二日始行回抵歸化茲於十七日准護理綏遠城將軍歸化副都

統文瑞將將軍印信及

敕諭令箭文卷等件派員齎送前來奴才卽於是日恭設香案望

闕叩頭謝

恩祇領任事伏念

奴才備員戎部督墾蒙疆操縱全旗迂疏寡效乃復渥蒙

寵命俾任專城查綏遠城地屬要邊轄兼藩服當此籌邊備拓利源講武務農

兼營並舉自維嚮昧懼弗克勝加以兩盟之教款未清八旗之牧荒難放

新軍雖練而尙待講求學堂已成而猶多闕畧至駐防貧弱日卽偷安全

局統籌維持匪易奴才惟有勉殫心力次第認真整頓以冀仰答

高厚鴻慈於萬一所有恭報奴才回綏接印日期緣由理合繕摺叩謝

天恩伏乞

皇太后

皇上聖鑒再奴才仍擬暫駐歸化就近督理一切墾務其綏遠應辦事宜奴才

當隨時入署辦理以期兩無貽悞合併陳明謹

奏本年十一月十三日奉

硃批知道了欽此

光緒二十九年十一月初五日具

奏爲攜印赴邊履勘綏遠八旗牧廠荒地情形恭報起程日期仰祈

聖鑒事竊綏遠八旗牧廠前經調任將軍信恪奏請擴充開墾以資練軍興學
奉

旨著隨時會商奴才辦理當查綏遠廠地與土默特牽混不清詢之兩城官員
亦皆不能指實無憑懸斷遂於上年秋間會同署將軍歸化城副都統文
瑞分派各員前往周歷查勘僅按以里合頃之法約知地數復於本年二
月間揀派繩丈委員分投勘丈現已統行文竣出示招墾並會擬變通押
荒升科辦法奏明在案惟迄今報領之戶寥寥無幾正在籌慮放墾之難
而土默特旗復以失地爲請矣四子王旗忽以溢丈爭論矣各起委員又
咸以舊領根地各戶紛紛佔墾呈請清查矣是牧廠地畝現並未獲絲毫
之利而已先滋糾繞之端若非奴才親往履勘不能期核實查綏遠牧廠
墾務原係綏遠將軍會商奴才辦理之件乃年餘來屢易將軍信恪調任

鍾泰恒壽復相繼出缺均在任未久未及詳審其間兩次署理一次護理軍篆之歸化副都統文瑞雖經隨時與奴才詳商籌布酌定章程而因兩城旗務紛繁未克身臨其地卽奴才有會同商辦之責亦以東馳西逐靡有定居復未獲乘間一往目覩情形現在奴才受任綏城責無旁貸而此項墾務又爲建軍興學所關尤須部署得宜方可漸收實效茲擬於十一月初六日攜印前往綏遠城後山周勘八旗兩翼牧廠地畝詳加體察究竟前辦情形有無窒礙及廠界是否劃清除俟查明再行奏報外所有攜印起程赴邊日期緣由理合恭摺具陳伏乞

皇太后

皇上聖鑒謹

奏光緒二十九年十一月初五日具

奏本月十六奉

硃批知道了欽此

光緒二十九年十一月十六日具

奏爲烏蘭察布盟四子郡王旗教案賠款前經議結該旗迄未清償并狡抗不認墊款情形據實陳明請

旨飭辦恭摺仰祈

聖鑒事竊查接管卷內烏蘭察布盟四子郡王旗仇教一案前經調任將軍信恪奏奉

諭旨飭調該旗蒙員來綏議辦以期早結而該郡王恃其自爲盟長延不派員到案復經信恪咨由外務部及理藩院嚴飭迅速派員赴綏會議並由綏遠派員前往札調該郡王乃仍前推卸抗不遵辦不得已始於上年三月初五日信恪據實奏明請

旨辦理欽奉

上諭將該郡王交理藩院議處仍飭迅速派員會同信恪妥議辦理嗣該旗始行派員到綏適法國參贊端貴亦前來查辦教務當經護理將軍歸化城

副都統文瑞督飭委員及該旗蒙員等磋商議免究案內釀禍官民僅令該旗認賠銀十一萬兩自光緒二十八年六月起至三十年年底止分期陸續交付即於六月十一日兩造書立合同署押在案惟此賠款十一萬內先因教民待撫急迫經前任將軍兩次代該旗籌墊銀二萬五千兩先付教堂俾免再生枝節所以維持而體恤之者不爲不至乃自定約之後該旗幾欲置身事外應交賠款毫釐未付而由官代墊之款復佯爲不知叠次行文派員嚴諭催交而該旗任意延宕或委員到去而拒不與商或遣人前來而諉難專主意若將軍可無庸過問者如果該旗能自向洋員辦理豈不甚善無如教士等不催迫該旗而催迫將軍謂將軍有統轄該旗之責且曾派員會同立約不能不請將軍主持在將軍既推無可推又辦不能辦當力盡勢窮之際幸該教士顧全大局允以該旗地畝作抵幾經詳商每畝作銀三錢其實該旗土地瘠薄不值此次議價之半並又許照蒙地食租向例地歸教堂後如墾種若干頃畝仍出若干頃畝之租予

蒙此皆教士顧念蒙艱期早完賠之意該旗尙復何求顧議辦至今該旗多方狡延議仍未就並欲將前爲代墊付賠銀二萬五千兩無與該旗之事否則令我向教堂自行計款分地仍必須爲其交納歲租此無論墊係何款豈

朝廷有反輸租臣下者乎查四子王旗教案情節最重此次所定賠款爲數不多爲期亦緩近復議允以地作抵在教士之曲爲遷就無非解怨爲德期可永遠相安乃計自上年六月定約至今年餘該旗應交賠款未嘗依限交付每於教士催索急切之際由歷任綏遠將軍設法籌墊先後墊銀二萬五千兩暫爲安撫教民之計所以未至窮極生變今該旗不惟不籌還現款並抵款之地亦思與教堂一例收租反覆相商該郡王堅執愈甚是直不以藩屬自處情事顯然現在教士在城守候無論交地交銀不能久待屢請奴才轉飭辦理前於本年八月間經護理將軍文瑞將爲難情形咨行外務部暨理藩院查照轉飭在案除仍派員前往就商外惟該郡王

行將赴京入值年班此案益無從議辦可否仰懇

天恩

飭下外務部暨理藩院俟該郡王到京就近嚴飭遵辦抑別有處置之處出自
聖裁所有烏蘭察布盟四子郡王旗教案賠款早經議結迄未清償并狡抗不
認墊款情形緣由謹恭摺據實陳明請

旨飭辦伏乞

皇太后

皇上聖鑒訓示謹

奏本年十一月二十八日奉

硃批該衙門嚴飭遵辦片併發欽此

再教案賠款係極重要急切之事該郡王尙於定約以後延不清償即現議以地作抵仍復多方狡執並有不肯認還墊款之意玩抗情形早經顯著於教案如此其他可知至墾務尤爲該旗所深惡迭次來文抗阻詞意不馴甚且謂地可賠教不可報開其所屬烏拉特三公旗復大張曉諭不准商民聽從認墾前經咨明理藩院核辦在案此時不重在利源之廣闢而重在

朝命之能行近雖派委協領榮昌前往催償教款並藉議商墾事其能否轉移仍難預料又口外添設廳治如武川五原一擬駐紮翁浪管理烏蘭察布盟之四子部落茂明安達爾罕三旗寄居漢民一擬駐紮大奈太管理伊克昭盟之達拉特杭錦烏蘭察布盟之烏拉特三公各旗寄居漢民此係升任山西撫臣趙爾巽奏奉

諭旨飭由政務處吏部會同議行之件曾經前任綏遠將軍檄飭該盟遵照辦理乃烏蘭察布盟盟長竟報稱在該札薩克專轄地面創設武川新界名

義不贖贖患目前請即刪除等情其所屬烏拉特西公旗於五原廳移知
劃界抗不收文以無該盟長通飭爲詞又復會同中公東公各旗張貼曉
示謂新廳不能安設教令可以不遵容心與地方爲難迄今該兩廳尙未
親臨治所查四子郡王世爲藩服受

國厚恩應如何奉令維謹乃於

朝廷議行新政一涉該旗之事動與齟齬似此情形誠於邊壑邊治關礙匪輕
合無仰懇

天恩飭由理藩院俟該郡王到京一併嚴飭遵辦俾就範圍而維邊局謹附片
陳明伏乞

聖鑒訓示謹

奏二十九年十一月十六日附

奏本月二十八日奉

硃批覽欽此

再奴才於十一月初六日攜印赴綏遠城後山查勘八旗牧廠情形當經奏明在案查此項墾務係建軍興學所關乃開辦年餘雖經酌擬押荒升科章程出示招墾而領戶寥寥至今放出之地僅一二百頃且又未能交納現款未解何以放墾之難如此及奴才躬歷一週詳勘各地惟正藍旗兩翼土性差強餘旗沙石相間可墾者少無怪民戶觀望不前招徠匪易奴才既親臨地所查知確切情形自非及早設法維持必至糜款廢時毫無裨益奴才查勘廠地事畢於本月初十日回綏除將變通招墾辦法另行奏報外所有履勘綏遠八旗牧廠地畝旋回日期緣由理合附片具陳伏

乞

聖鑒謹

奏光緒二十九年十一月十六日具

奏本月二十八日奉

硃批知道了欽此

光緒二十九年十一月二十五日具

奏爲綏遠城常備軍暨武備學堂經費維艱謹將現在情形據實陳明恭摺
仰祈

聖鑒事竊查接管卷內前調任綏遠城將軍信恪於光緒二十七年十二月間
遵

旨籌練常備軍并添設武備學堂擬由八旗各項兵丁內挑選年力強壯者三
百人均補馬甲之餉以本城原練步隊每年應支津貼銀七千餘兩分別
津貼此項新隊作爲常備教練一年期滿改爲續備僅令食馬甲餉銀不
予津貼仍另選三百名充補常備津貼照給以後照此迭相更代其武備
學堂係就綏遠城舊有書院改設挑選八旗子弟六十名作爲武備學生
亦均令坐補馬甲之餉另延教習訓練操法所有新軍及學堂開辦經費
擬由旗庫存儲兵丁各本身照例坐扣加添馬價銀一萬一千餘兩內先
行動用常年經費則指於墾放綏遠八旗牧廠應徵押荒租項全數留支

曾經奏明辦理在案伏思建軍興學今日必不可緩之圖矧駐防八旗本
屬人盡爲兵豈可仍無一兵之用綏遠滿營疲弱積習已深既前經信恪
改練常備新軍添設武備學堂籌布始基冀求整頓此時但循途漸進似
可次第修明奴才到任後卽詳察此舉迭次傳操並時至學堂躬親考驗
見其規模粗具尙有可觀所慮者經費一項開辦之始祇恃庫存馬價銀
萬餘兩借墊開支兩年以來早已用盡而旗幟號衣書籍儀器一切應需
之件尙且未經置備然已左支右絀無法騰挪不獨難期經久卽目前數
衍亦有不支其原議指動牧廠墾務押荒歲租如果廠地膏腴不難丈放
則雖臨渴掘井或尙可資挹注無如地既磽瘠又值東西墾務同時興辦
孰無選美擇肥之意今縱變通招致仍復領戶寥寥押荒並無所入卽墾
局經費向由商號公司先後借墊更何自爲練軍學堂之用指苗待實必
至惡釜斷炊再四思維萬分焦急此時停練可措接辦無資可知一政之
行一事之舉若不通籌籌算鮮有不立蹙於後者當此時事日艱練兵尤

當務之急雖萬難設法不能不力圖補救藉以支持查東路墾務公司現已辦有成效官商利息爲數尙多刻屆年終截算容俟另行奏報擬卽由該公司指留綏遠牧廠地畝數百頃先行交價以濟急需仍一面督飭墾務局員將荒地變通招認寬之以限期動之以近利但使有涓滴之入舉歸新軍學堂接濟經費惟終係暫時補苴之計久遠難期至原議挑練兵丁均補馬甲期滿一年另行更換不開甲缺并武備學生亦均坐補馬甲惟馬甲之缺有限換練之兵日加常此更代缺額不給並查各項章程未經釐訂除俟詳加覈議再行奏咨立案外所有綏遠城常備新軍暨武備學堂經費奇絀并現在辦理情形緣由謹會同歸化城副都統奴才文瑞恭摺具陳伏乞

皇太后

皇上聖鑒訓示謹

奏本年十二月初八日奉

硃批知道了欽此

光緒二十九年十二月十一日具

奏爲綏遠城牧廠地畝墾放較難現在另籌變通辦法並擬試辦屯田以資分墾而期有效恭摺仰祈

聖鑒事竊綏遠城八旗廠地擴充開放疊經奴才將派員丈量酌擬辦法並赴

邊親行履勘各情形奏明在案伏查前項牧廠在大青山後當塞外極寒之地本非處處宜耕從前乾隆嘉慶年間四次墾闢均係擇地開放此次

經前任將軍信恪奏請將全廠三分墾二固知膏腴之地本已無多奴才

前因出示招墾領戶寥寥將章程畧予變通於應收荒價寬定期分起

徵繳乃時逾數月僅據民戶陸續認領地二百餘頃奴才以此舉關係八

旗生計且學堂練兵經費皆將於此取資若任其觀望遲回深恐廢時糜

餉前此屢聞廠地不易開放幾疑不便私圖之人從中搖惑及親往履勘

後博稽輿論徧察土宜天氣則寒早暖遲地脈則瘠多腴少其堪列上則

者大半在已放糧地之中加以多年久未清查逃糧溢墾之奸民又復擇

肥而取凡未經墾闢各地多係蒙沙含石爲老農所不屑經營又兼西接兩盟東鄰兩翼同時興墾人人有較量優劣之心且毘連之四子王達爾罕諸旗自放蒙地賤取其值彼廣招徠此更碍放現在興學建軍業已刻不容緩奴才日夜籌畫竊慮無米爲炊因迫令墾務公司呈繳押荒現銀指認地三百餘頃又由奴才將應得廉俸公費儘數捐認地畝以爲之倡卽飭該城協佐領以下官員兵丁量力認領分期繳價留作恒產復出示將民戶荒價分爲三限每六箇月徵收一次並於查勘廠地時暫駐後山地方傳集商民反復開導釋其疑懼觀望之心附近居民輒肯首先承領現據局員報稱領地民戶較前稍形踴躍統計官民已認之地截至本年十一月底止共有一千餘頃轉瞬春融將屆東作方興願受一廛或可更期暢旺仍當飭令局員隨時認真勸領以冀早日竣事惟廠地既非沃壤辦理又如此其難無論如何設法招致度亦不能放及三分之二奴才熟加籌議與其待價而遺曠土終無以應急需何如選土而習躬耕轉可以

資生計查旗兵坐食錢糧畏憚勤苦久已習爲固然方今庶政修明振興農學而滿營兵弁徒應差操之故事不知耕作之本原體懈志媮安望其緩急可恃奴才到任以來屢加簡閱心竊憂之際此牧荒難放分作屯田計誠兩得前於履邊之頃勘得兩翼馬廠地勢平坦土性亦尙可耕種擬將該處廠地一千一百餘頃儘數撥歸八旗選擇滿蒙壯丁每旗百名仿照吉林雙城堡章程試辦屯墾其詳細辦法容俟擬定另行具奏但建蓋屯丁房屋製買農具籽種需費甚鉅現值旗庫支絀羅掘早空卽將來荒價暢收祇能用之學堂練兵何暇別資挹注應由奴才督飭協佐領等另行設法籌款務在必行使經費不充亦必先就一二處試辦以後漸推漸廣應免土地荒蕪之歎兼有兵農合一之規似可與興學練軍並期兩得至此項屯地既由八旗兵丁自行墾種應懇

恩免徵荒價歲租以示體恤將來屯地漸著成效得有餘資尙可籌撥各旗辦公之費如此則凡爲軍士競務農功教藝屯邊知稼穡艱難而無逸募民

塞下將擾鋤荷舉而偕來於墾務庶有裨益所有變通開放廠地並擬試
辦屯墾各緣由是否有當理合恭摺具陳伏乞

皇太后

皇上聖鑒訓示謹

奏二十九年十二月二十二日奉

硃批著照所請該部知道欽此

再綏遠八旗牧廠墾務係建軍興學所關奴才前既奉

命會商今更責無旁貸無論放墾如何爲難亦必須實力經營期可變通盡利

此次奴才躬親周歷察知辦理疲滯情形已於摺內詳細陳明另籌辦法

惟相機因應全在督理其事者隨時親臨地所操縱得宜奴才自督辦蒙

聖以來並作兼營時虞弗給矧西盟已收各地現正逐端籌辦或招民認

領或相地開渠一俟春融尤須奴才往爲查勘未便專顧牧廠一隅而牧

廠各項興墾近更不容待時因思歸化城副都統文瑞年餘來三次署理

綏遠城將軍篆與奴才商辦墾務遇事和衷資其經畫此項廠地情形該

副都統尤爲熟習查歸化事務尙簡若令其幫同奴才辦理牧廠墾務相

與維持雖遇奴才西逐東馳有該副都統就近畫籌或分赴牧廠放墾處

所爲之督率興辦必克成效漸收於事有裨合無仰懇

天恩俯允將歸化城副都統文瑞幫辦綏遠牧廠墾務之處出自

聖裁理合附片具陳伏乞

聖鑒訓示謹

奏二十九年十二月十一日附

奏本月二十二日奉

硃批著照所請欽此

再奴才前以烏闐察布盟四子郡王旗教案賠款雖經定議延不清償並
不認墊付款項等情於十一月十七日奏請

飭下外務部理藩院俟該郡王入值年班到京就近嚴飭遵辦仍先由奴才派
員前往催商當經揀委協領榮昌並加派察哈爾鑲藍旗總管巴圖德勒
格爾持文飭辦去後查該協領等通達事體因應有方此次派赴四子王
旗催償教款並藉商蒙墾事宜切實開陳曉以利害尙能使該旗漸知就
範據該旗呈請寬限至明年二月二十五日以前派員前赴綏城聽候指
示辦理不敢再有延悞等情覆查該旗議辦賠款一案屢屢狡抗交地交
款迄未清還至開墾尤該旗所惡聞有地可賠教不能報墾之語今乃合
教案墾務定期併議似漸有轉圜之望核其詞意亦尙恭順不能不因勢
利導勉允所請惟蒙古性情反覆難保不至期爽約除再嚴行飭辦並商
明教士緩予期限外理合附片陳明伏乞

聖鑒謹

奏二十九年十二月十一日附

奏本月二十二日奉

硃批該衙門知道欽此

光緒三十年二月初十日具

奏爲叩謝

天恩仰祈

聖鑒事竊奴才於上年十二月二十三日齋摺差弁回城捧到

恩賞福字一方奴才當卽恭設香案望

闕叩頭謝

恩祇領訖伏念奴才忝持使節兼領軍符渥荷

鴻慈毫無報稱茲以履端

施惠復邀

宸翰頒榮拜

寵白

天感慚無地奴才惟有恪供職守益矢慎勤膏雨吟詩勉籌教稼安邊之效陽

春布令敬體

誠民錫極之心所有奴才感激下忱謹恭摺叩謝

天恩伏乞

皇太后

皇上聖鑒謹

奏本年三月初二日奉

硃批知道了欽此

光緒三十年二月初十日具

奏爲叩謝

天恩仰祈

聖鑒事竊

奴才

於光緒三十年正月初一日由兵部遞到恭奉

恩賞福壽字各一方

奴才

當卽恭設香案望

闕叩頭謝

恩祇領訖伏念

奴才

猥以庸愚兼膺重寄乘軺蒙部踵屯田西域之規秉節邊

城衝鎖鑰北門之叙通復蒙

聖慈曲逮

寵賚頻加拜受

蕃釐已荷先春而

沛澤重邀

宸翰欣逢元日以

頌榮陳

建極敷錫之疇敬遵

帝訓繹美意延年之義式煥

天題渙汗欽承淪肌感戴奴才惟有勉驅駑鈍仰答

鴻施籌策綏邊共沐祥和於

盛世農桑勸俗同安耕鑿於康衢開井疆而益地呈岡歲徵豐豫依

日月而普天洽慶頌上

升恆所有奴才感戴下忱謹合恭摺叩謝

天恩伏乞

皇太后

皇上聖鑒謹

奏本年三月初二日奉

硃批知道了欽此

光緒三十年二月十七日具

奏爲綏遠城屯墾需用牛具無款可籌擬請援案開辦牛捐以資接濟而裨耕作恭摺仰祈

聖鑒事竊奴才貽穀於上年十二月間因綏遠城牧廠荒地未能全行開放擬

將兩翼廠地留歸八旗屯墾由奴才設法籌款試辦業經陳明奉

旨允准在案伏維屯田之利史冊昭然我

朝慎重塞防從前疆臣之留意邊陲者罔不視爲急務近日若吉林之雙城

堡天津之鹹水沽新城一帶西北路之烏魯木齊科布多等處地方率皆

行之而有效此次籌開綏城利益因招墾而議及屯田待米爲炊情形尤

急奴才等於奉

旨後熟籌興辦事宜及應需經費無如綏城旗庫向本支絀近年以來更屬羅

掘一空卽如辦理教案各款不過數千猶難應付必待乞援晉省重煩部

撥至改練新軍建立學堂之費仰給於牧廠荒價指禾待實尙苦挹注無

從此外別有經營其難窘更復可想奴才貽穀自上年到任後目覩情形於各項度支無不力從撙節甚至綜理不遺竹木捐貸及於俸廉凡有可爲綏城謀生計助餉需者皆殫竭心力爲之屯墾一舉可以徵旗兵之惰而裕軍食之源奴才既籌畫於先未便因辦理無資遂爾中輟溯查光緒四年十九年直隸年歲災歉耕牛缺乏經前直隸督臣李鴻章兩次奏請由察哈爾各旗羣滿蒙官兵捐助耕牛援案請獎光緒二十六年察哈爾都統奎順等復因餉項支絀奏請開辦牛捐有案現在綏遠屯墾農具在所急需而尤以耕牛爲大宗口外向係產牛之區奴才貽穀辦墾兩年久居蒙地凡有舉動尙爲各蒙衆所信從若以要政向其籌捐似不難於集事擬援照疊次成案在察哈爾左右翼各旗羣地方開辦牛捐凡有滿蒙官兵等捐助耕牛者每牛一隻仍折收實銀十四兩均各按所捐多寡比照成案覈給獎叙如有綏遠城官兵及寄居口外蒙地之商民願助耕牛亦擬請一律收捐請獎惟查二十七年戶部議覆奎順等辦捐原奏嗣後

如因餉需緊要情殷報効者祇准以實銀捐輸不得授案捐助耕牛等語竊思現在因屯墾急需牛隻必待收銀購易不免輾轉稽遲兼之口外去冬牛價驟昂若按定價收捐以時價收買必至虧折此項捐案向祇口外旗蒙官兵及寄買蒙地商民始肯報捐與內地籌餉籌賑各捐毫無妨礙且此次需牛應用始議牛捐與從前成案之重在集欸者情形亦異擬請稍予變通遇有官兵商民人等捐繳實銀未能足數願以牛隻搭捐或願逕以牛隻交納者但察其實係臚壯亦准驗收仍按每隻十四兩折合銀數嗣後他處籌集餉需不得援以爲例其事竣後覈給獎叙仍遵照部章祇准獎給虛銜

封典貢監翎枝概不准請獎實官以符定制但近來各處捐局意在廣爲招致往往按減成數目再行減折收捐覈計牛捐成案較之現行各捐減收之數間有增多誠恐捐生裹足擬請於比照成案之中仍覈與各處捐例不甚懸殊庶期踴躍其有無從比照成案者則照各省工賑捐案章程辦理

俟集捐至三萬兩卽行停止如蒙

俞允卽由

叙才

等遴員在張家口歸化城兩處招捐將來集有成數時再行授

案奏請獎叙叙才等爲屯墾需牛無款購備起見是否有當理合恭摺具

陳伏乞

皇太后

皇上聖鑒訓示謹

奏本年二月二十九日奉

硃批戶部知道欽此

再綏遠城八旗馬廠界內向有煤炭各密民人往往私行開挖經調任將軍信恪籌擴利源於光緒二十七年十一月十六日奏請歸官開辦曾經聲明煤稅由地方官派員徵收湊集賠款其餘礦利歸入本城爲建設武備學堂之費等情奉

旨允行在案查此項礦廠所出向本不旺又以煤質較次滯於銷售信恪於奏歸官辦之後雖經出示招商無人承辦僅飭由本城官兵等集資開採其應收煤稅歸綏道以試辦並未暢旺未經派員抽收當由綏遠城派辦煤礦之人代徵煤稅係仿照土默特抽收煤稅章程辦理每車一套收足錢四十文駱駝每馱收足錢十五文馬驢每馱收足錢十文計自光緒二十八年四月起至二十九年十二月止共代收稅款市錢四千一百七十餘千核銀六百九十餘兩開辦兩年之久僅收此數然尙係代爲徵收未經開支薪工局用故得有此涓滴之入若逕由歸綏道分派員役專收此項煤稅必至不敷費用更何濟賠款於萬一以後煤稅仍擬由綏城代收以


期累寸積銖稍資挹注至礦廠所賣煤炭餘利除開銷工食外自二十八年四月起至今僅賸存市錢八千二百餘千核銀一千三百兩零亦所入甚微以上兩款現均存儲未動伏念綏遠城支絀異常土壤細流不無所補原奏請將歷年礦利備建武備學堂查該學堂前就綏遠官署設立暫可無事恢張所需書籍儀器等項刻不容緩擬即將所存煤稅銀六百餘兩暨礦利餘銀一千三百餘兩零提動購買俾資考究並請將此後每年徵收煤稅礦利作爲貼補學堂膏火之用是以綏入之欸仍用於綏奏建學堂之欸仍用於學堂縱來源不旺綜計歲收銀數不過三四百兩而絲毫裨益亦學務藉助之一端除咨明戶部暨俟學堂章程釐定再咨學務處查照外理合附片具陳伏乞

聖鑒訓示謹

奏光緒三十年二月十七日附

奏本月二十九日奉

硃批戶部知道欽此



奏爲口外後套一帶地方賊匪起事現在徵集兵隊合力勦辦並保護教堂
馳陳大概情形仰祈

聖鑒事竊查口外黃河後套一帶地方遼闊烟戶畸零游勇潰兵久恃爲逋逃
之藪而其間豪霸地商又復蓄養無賴藉以爭渠竊地械鬥相尋乘間搶
奪之事向所恒有然猶未至顯肆猖獗抗拒官兵也詎於本年正月二十
七八等日突有游匪搭木架李老先劉天佑等或二三十人或五六十人
分持槍械先後搶劫後套杭錦旗界五和公黃惱樓阿善村地方民戶高
喜子郭敏修等家馬匹槍械等物據西盟墾務局總辦五原廳同知姚學
鏡稟報前來當查大宗太至後套一帶五六百里之間僅有山西駐防之
口外續備新軍二旗兵力太單不敷分紮又值新舊換防之際該匪等乘
虛竊發搶掠橫行首先搜求軍械擄掠馬匹其起事之初已與尋常盜匪
行劫情形較爲重大若不及早撲滅誠恐滋蔓難圖且該處與烏蘭卜爾
教堂相距匪遙尤急需加意防範奴才立即飛飭奏歸墾務調遣駐紮包

鎮之大同續備軍四旗馬隊旗官譚湧發帶領各哨並協同五原廳巡警
兵隊星速馳往後套迅行緝拏並即分隊保護教堂一面札調大同鎮所
統續備軍頭二旗馬隊加派綏遠城常備軍及留防各隊歸化城之巡警
步隊先後分路前往合力兜拏堵截一面咨會山西巡撫臣張曾敭派兵
會勦聞連據五原廳報稱該匪於二月初二初三初九初十等日四出焚
掠搶劫墾務渠工中西東各局焚燒各商牛具佔據距包鎮五百餘里之
同心西渠工存糧處以爲久居之計又復糾合甯夏著名賊首耿姓李姓
僞稱耿大王李四軍門裹脅人衆已聚至二三百人勢甚洶洶其時所調
各隊未到惟譚湧發一旗及五原廳巡警兵一哨進至後套二月初八日
抵烏蘭卜爾教堂突與匪遇該匪正欲攻撲教堂經譚湧發率隊擊退十
一日譚湧發一旗回攻匪巢該匪百數十人蜂擁而出開炮迎拒經譚湧
發督率弁兵奮力攻擊左哨哨長王殿邦首先衝突致被炮傷陣亡左哨
哨官亦被賊槍擊傷正兵傷者一名自辰至午與匪接仗二時之久擊斃

匪五六人該匪兇焰愈熾未能攻人賊巢嗣駐紮包鎮之口外新軍步隊
二旗旗官胡太才及管帶歸化巡警兵都司崇斌等於二月十六七等日
相繼前進會同譚鴻發於二十日直抵賊匪所踞之存糧官局六七里間
該匪復敢出迎抗拒經該隊左右夾擊擒獲賊首陳玉山一名並獲馬匹
槍子等件時因大風起沙未敢輕進現查前調之大同續備馬隊兩旗先
後開赴後套復經奴才揀撥綏遠礮位數尊派隊星夜馳送以資攻擊計
日亦到後套並派姚學鏡親赴後套聯絡已到各軍刻速進剿嗣由山西
撫臣張曾敷派委歸綏道樸壽親往督同統帶口外新軍陳政詩李益智
等實力率隊剿辦現已進駐大余太相機籌布復准張曾敷咨以口外新
軍未經訓練難期得力添派護大同鎮孔慶塘督率口內續備軍兩旗並
帶省城常備軍兩旗督同各軍會勦不日亦當開拔前往查此項賊匪膽
敢肆行劫擄搶佔官局經官兵往捕復敢屢次開炮抗拒傷我弁兵叛逆
鴟張罪無可逭在初起時不過三四十人乃旬日之間聚至數百人跡其

糾合之易嘯聚之速情形實爲可慮據廳營踏獲之匪首搭木架賊探張占魁等訊係與劉天佑李老先各賊並同時焚香立誓聚夥謀叛似此罪大惡極若非迅速殲除勢必益形猖獗所幸徵調兵隊陸續齊集分道進攻彼匪黨孤守一隅不難蕩平巢穴惟後套廣漠無垠接壤甘陝一經紛竄恐又別滋擾害除咨會甯夏將軍榆林鎮道暨會同撫臣張曾敫飛飭各軍嚴爲兜勦堵截務必悉數殲滅毋令蔓延仍分隊堅護教堂不致稍有疏虞及查明防守不力各官弁分別叅辦外所有口外後套一帶地方賊匪起事現在徵集兵隊合力剿辦並保護教堂大概情形緣由理合恭摺馳陳伏乞

皇太后

皇上聖鑒訓示再該匪初起時奴才卽咨山西派兵會勦業由張曾敫先行電請代奏合併陳明謹

奏二月二十八日具

奏三十初十日奉

硃批著會同張曾歆嚴飭各軍兜勦堵截迅速撲滅並將教堂實力保護毋稍
疏虞欽此

光緒三十年三月初五日附片

再綏遠城向無辦公經費當無事之時所用不多已虞支絀今則疊奉

嚴旨飭令各修邊備保護教堂自上年歲杪即經分派官兵四出巡查凡一役

一差糜不有資領給加以後套賊匪起事搶佔墾局尤應趕速撲滅現在

徵兵撥隊需款尤繁且均有迫不及待之勢綏庫毫無儲積莫奮空拳查

察哈爾右翼墾務押荒前經奉明截留四成爲晉省新廳經費當此晉邊

有事需款孔亟擬卽由此截留押荒項下隨時動用以應亟需將來晉用

若干綏用若干俟事竣報銷時核實開報除咨明戶部暨山西撫臣張曾


敷查照外理合附片陳明伏乞

聖鑒訓示謹

奏

同日奉

硃批戶部知道欽此



光緒三十年三月初六日具

奏爲土默特常備軍餉項不充擬酌改營制餉章並將騰出節省銀兩添置軍裝以應急需而歸實濟恭摺仰祈

聖鑒事竊於光緒二十六年六月間經前任將軍永德副都統奎成奏明由土默特挑選精壯步隊三百名揀派泰佐等官訓練旋聲明該軍月餉並無另款可籌請由該旗六成地租發商生息每年所得息銀項下動支嗣於二十七年十二月間復由奴才文瑞奏請將原設之兵汰弱留強仍使足額以三百名爲常備軍餉項照舊開支先後奉

旨允准遵辦在案查原定章程設委營總一員帶隊佐領三員隊官驍騎校前鋒校六員隨營辦事官及委筆帖式各一員每月共支津貼銀一百五十兩兵三百名每名月餉三兩共九百兩統計常年共需餉銀一萬二千六百兩遇閏之年共需餉銀一萬三千六百五十兩前項地租生息銀八萬九千兩每年僅收息銀一萬零六百八十兩儘數動支仍有不敷復由六

成地租每三年應得租銀四千兩內動用撥補其旗幟號衣皮襖靴帽一項本應每年更換計二十六年成軍製辦一次二十七年更換一次均由官款正項動撥以後因正項無餘暫在該軍月餉內攤辦此歷年辦理之實在情形也竊維土默特兵丁向本散居屯戍不支口糧自編爲常備軍則責以新操用備徵調既已列諸伍籍不得不照他處定制一律支食餉銀而邊地進款無多迥非各行省可比原議就地籌餉祇有此生息一款可暫騰挪又因入少出多遂爲剜肉補瘡之計需用軍裝各件尙須另籌若不急籌變通量入爲出非坐耗正款卽重累兵丁伏思此項常備軍原係更番訓練新舊相代則多其數而備豫固可無虞卽減其數而教演亦能循及且地沿蒙俗似不妨稍示權宜奴才等公同商酌擬將常備兵三百名改爲二百名分爲左右兩翼每翼各設管帶官一員哨官各二員排長各四員認真管轄操練仍照前次奏定章程俟一年後飭令歸農編爲續備再挑新軍遞相更代其應支月餉擬以現裁一百名每月騰出餉銀

三百兩添給現存兵丁二百名每名六錢計每月共需銀一百二十兩下
餘之一百八十兩按月積存爲每年製辦旗幟號衣皮襖靴帽及教習薪
金賃居兵房一切辦公之需至兩翼管帶等官共十四員仍每月共支津
貼銀一百五十兩如此一變通間該兵丁等餉入既增口食稍能自給而
應行製造各件常款有著亦不至搜及庫儲現已自本年正月起先行試
辦遴委參領蘇聯春記名佐領前鋒校倭什珂分充左右翼管帶官其哨
官排長等員亦逐加選擇更調責令實力整頓冀有成效以副

朝廷振武安邊之至意惟查山西暨南北洋常備軍章程均係每月餉四
兩五錢此次土默特各兵雖餉增於前猶較他處減少官餉尤遜將來俟
旗力稍舒再行酌量加添以歸一律至土默特額設駐守官兵一百名前
於二十七年間已改爲巡警兵一切規制應仍其舊所有擬改土默特常
備軍營制餉章並節存銀兩置備軍裝各緣由理合恭摺具陳伏乞

皇上聖鑒訓示謹

奏本月十六日奉

硃批練兵處戶部議奏片併發欽此

再此項常備軍均須改練新操前經奴才文瑞奏明所需洋鎗擬由南洋
咨調暫仍沿用土鎗以免曠時廢業乃因費絀道遠需用鎗枝迄今未能
購到成軍數年尙以土鎗從事竊思行軍以利器爲先冀練精兵仍操鈍
器練如不練此次既將營制酌改自應令該兵丁等一律操演新式快鎗
豈能以無米爲炊遂至因噎廢食擬先購步快鎗二百桿馬快鎗四十桿
以資急用但應需購價運費頗鉅旗庫別無餘款可籌惟查有積年存儲
當課銀七千三百七十餘兩尙未動用湖積款之由土默特當行最小每
座課銀六兩向由口外五廳徵解副都統衙門作爲該衙門每年公費嗣
因戶部預用山西全省當課並此亦提後復經部行令山西巡撫另撥副
都統衙門每年公費銀四百兩遂將按年應徵當課另款存儲伏查口外
歸薩清托和等廳分治地方均在土默特境內是以經收當課房租銀兩
向歸副都統衙門留用辦公以本地之租入供本地之公款原屬自食其
力自光緒十七年戶部奏准加收當稅口外各廳小當舖亦隨同一律加

增積加增之款從未動用始有此數現在練軍購械需費甚殷奴才等擬將前項存儲當課銀兩儘數訂購後膛快鎗以目下定價計之加以運送腳價約計不敷尙多應俟購定後核明鎗價運費實用若干由歸化城商號暫時挪借足數事竣後報部查核仍俟按年收有當課陸續歸還商款除咨部外理合附片具陳伏乞

聖鑒謹

奏光緒三十年三月初六日附

奏三月十四日奉

硃批覽欽此

光緒三十年七月十八日具

奏爲達拉特旗教案完結賠款一律交清謹陳前後辦理情形恭摺仰祈

聖鑒事竊查光緒二十六年間伊克昭盟達拉特旗有效尤仇教殺害教民之

案疊經恭奉

諭旨將該貝子圖們巴雅爾革爵聽候查辦並飭前署將軍奎成前任將軍信
恪查明核辦具奏嗣於二十七年八月經信恪札調蒙員來綏督飭現署
黑龍江副都統前奏辦教案之直隸候補知府壽勳及原辦此案各員與
該主教和衷辦理九月間伊克昭盟長邊派鄂托克杭錦達拉特三旗協
理台吉等官先後抵綏由信恪督同各員會同法國主教閔玉清商辦該
主教因此案受虧過鉅必欲先懲帶兵焚殺之蒙官二員經壽勳等再四
講解始允緩商先議賠款所稱殺害教民八百餘人疊次辯論核減以一
百五十人定議統計該旗地方焚毀大小教堂五處教民房屋六百餘所
及失去糧石牲畜銀器衣物等項並教民價一百五十名共議定達拉特

旗認賠銀三十七萬兩全案賠款均在此內此項賠款該主教允照鄂托克等旗成案交現銀十萬兩牲畜抵銀十萬兩常年地租抵銀十七萬兩定限交清於十一月初三日公同書立草約鈐押完案由信恪先行具奏並聲明俟現款抵款一律交清再立詳細合同以憑永遠遵守嗣因該旗生計甚艱現款難籌經壽勳等與該主教商議仍照原定銀數另籌變通交抵辦法由該旗交出烏蘭卜爾地畝一段計二千四百頃連房院抵銀十四萬零二百兩又交大淖爾地畝一段七十六頃抵銀七千六百兩又由信恪代向晉省籌借庫平銀一萬五千兩合歸化平多四十二兩復由旗署籌墊銀二百五十八兩共一萬五千三百兩又向晉省借雜糧一萬石估抵銀一萬一千五百五十兩零又該旗自交地畝抽捐銀四千七百三十三兩零總共交過銀十七萬九千三百八十四兩零其下欠之十九萬零六百一十五兩零該旗實在無力未能依限措交該貝子復指出四成地一段求抵欠款而教士等不欲復收地畝堅執索款情勢岌岌正值

信恪去任鍾泰出缺文瑞暫署未久此事無人主持功廢半途幾至盡改
前議維時奴才適已督墾來邊目覩教士催欸甚急蒙旗續籌維艱允爲
留地措欸以顧大局於奏設西路公司後迫令股商無論是否受虧先行
承領計議定地二千頃價銀十四萬兩不待收地先交銀七萬兩俾濟教
堂急需旋以教士復向前將軍處索欸刻不可延又由奴才在墾務公費
項下暫借給銀一萬兩下餘六萬兩議俟地畝兌清全數交楚統計已交
及籌定共銀三十二萬兩外尙欠尾數五萬兩該旗萬分無力籌付於二
十八年十一月間經前署將軍文瑞奏請

飭下山西撫臣暫行籌墊並乞

恩賞還該員子原爵奉

旨允准旋由晉省籌借銀五萬兩合歸化平多一百四十兩又由旗署籌墊銀
八百六十兩共銀五萬一千兩交教堂如數領訖上年三月奴才派員丈
收四成地不足二千頃之數復據該旗呈明以後套長勝渠地一段撥補

惟渠未修竣地難即收十月^廿才接任將軍後深知教民困苦教堂待款孔殷長勝渠地丈收尙需時日急飭西路公司股商將前借墾務項下銀一萬兩歸還其下餘應付銀六萬兩先行補交以足十四萬兩之數並派辦理洋務委員山西候補道曹受培奏保知府分省試用同知斌儀等妥爲交付本年四月經斌儀及綏遠城協領榮昌文哲琿會同天主堂主教閔玉清教士南懷義眼同達拉特旗協理台吉巴札爾噶爾第長史唐素克一律交訖除四成地長勝渠兩處地價共應付銀十三萬七千四百五十兩外多付該旗銀二千五百五十兩該貝子允以再行補地此外又自行籌交根石牲畜等項抵銀五百九十兩零實尙欠尾數銀一千五百七十五兩零該主教等念該旗困苦慨允減讓免交計達拉特旗全案賠款三十七萬兩全數收清於四月十五日換立全案詳細合同由主教並委員等及該旗各鈐印畫押將前定草約銷燬其烏蘭卜爾大淖爾兩處地畝亦另訂有詳細合同彼此永遠遵守完案伏查達拉特旗因效尤仇教

以致積成重案上煩

宸慮飭令迅速辦結迨時歷四年事經數任其賠款較各旗爲最鉅其辦理亦較各旗爲最難奴才自到邊以來先在局外而繼在局中匡助經營期於藏事該員壽勳等辯論磋商於前斌儀等籌畫應付於後實亦備極勞瘁今幸償款一律清結從此蒙教相安當棄怨修好之餘愈深後懲前之想惟有嚴飭各該旗嗣後於境內教士教民實力保護勿致再啓猜嫌用仰副

聖主柔遠綏邊之至意至晉省並旗庫先後借墊現款糧石應飭達拉特旗陸續籌還以清款目所有達拉特旗教案完結賠款交清各緣由除照抄合同分咨外務部理藩院查照外謹會同歸化城副都統文瑞恭摺具陳伏乞

皇太后

皇上聖鑒謹

奏本月二十九日奉

硃批該衙門知道欽此

光緒三十年七月二十七日具

奏爲綏遠城常備軍礮隊員弁勦辦後套馬賊出力遵

旨核實的保恭摺仰祈

聖鑒事竊奴才前於本年五月十八日會同山西撫臣張曾歇具奏後套馬賊

肅清聲明在事員弁異常出力擬請擇尤酌保恭奉

硃批著核實的保數員毋許冒濫等因欽此欽遵在案除晉省防軍出力各員

由張曾歇查核請獎外伏查賊匪劉天佑等於正月杪糾衆在後套一帶

滋亂事起倉卒勢甚颯忽維時晉省各路防軍遠在口內一時調集難齊

口外新招續備軍成軍未久驟難應敵該處毗連甘境教堂林立若不急

爲撲滅深恐四出蔓延奴才於聞警之始卽派管帶綏遠常備軍佐領德

克吉克並札飭歸奴才節制之大同續備軍馬隊第四旗管帶都司譚湧

發分投截擊復將前大同鎮總兵劉光才升任時由奴才咨留之莫克森

鋼礮四尊及綏遠城舊存劈山礮八尊派管帶礮隊驍騎校春秀等攜運

兼程前往一面札調大同鎮所統續備軍頭二旗馬隊及歸化城巡警步隊先後合力堵截緣計口內外徵調各軍除譚湧發及遊擊胡太才駐紮較近首先追擊此外則惟綏遠城各軍最爲先至譚湧發胡太才之迅速進勦力遏賊氛其勞苦功高業由奴才與張曾敷據實陳奏早在

聖明洞鑒之中該佐領德克吉克驍騎校春秀等各率兵隊裹糧疾馳會同各軍分任堵勦旋因附近小舍太之什納幹村爲賊匪繞赴後山東竄必由要路逕邏二百餘里處處皆有小徑可通經奴才飭令德克吉克扼紮堵截嗣是匪衆屢謀分逸卒未得逞東路各城鎮賴以保全春秀所帶礮隊冒雨衝淖不肯暫延沿途所過地方糧草悉由自載即箠食盡漿之饋亦絲毫未取民間尤爲向來兵行所無其所攜礮隊前往統領陳政詩恃以有備護鎮孔慶塘資以成功大中灘之捷先由諸軍圍攻數日尙未得手迨礮位到後孔慶塘率春秀等四面轟擊堅壘頓摧其收效於礮隊實爲衆目所共睹至今後套人民猶能責責道之現在賊匪肅清地方安謐孔

慶塘陳政詩等已由張曾敷奏保特選

恩准有案該員德克吉克春秀等同周在事異常出力勞勩復有過之自應由
奴才陳明請獎擬請將管帶綏遠城常備軍佐領德克吉克以協領儘先
升補俟升協領後加三品銜管帶礮隊驍騎校春秀免補防禦以佐領儘
先升補先換頂戴礮隊教習拔補千總桑高才免補千總以守備儘先補
用僅保三員實係奮勇爭先勞績卓著合無仰懇

天恩俯准照擬給獎以示鼓勵其餘隨同出力各員另由奴才酌給外獎除飭
取該員等履歷咨部外所有綏遠城常備軍礮隊出力員弁擇尤請獎緣
由謹恭摺具陳伏乞

皇太后

皇上聖鑒訓示謹

奏本年八月初八日奉

硃批著照所請該部知道欽此

| | | | | | | | | | | | |
|--|--|--|--|--|--|--|--|--|--|--|--|
| | | | | | | | | | | | |
|--|--|--|--|--|--|--|--|--|--|--|--|

光緒三十年八月十九日具

奏爲四子郡王旗教案賠款地畝抵銀一律交清謹陳前後辦理情形恭摺
仰祈

聖鑒事竊查光緒二十六年六七月間烏蘭察布盟四子郡王旗有效尤仇教
殺害焚掠之案疊次欽奉

諭旨嚴飭查辦當經前署將軍奎成前任將軍信恪以案情重大先後奏明派
員詳查並札調該旗家員來綏議辦嗣因該旗延不遵調於二十八年正
月經信恪奏請懲處奉

旨將該郡王勒旺諾爾布交理藩院議處一面嚴飭迅速派員赴綏就議行令
欽遵辦理去後旋據比國派辦教案委員林輔臣教士王達文呈請速催
完案並稱教民遭亂之後有悞耕獲困苦異常請代籌款濟急俟該旗賠
款議定再行歸還由信恪咨請外務部先行指撥銀四萬兩暫付該教堂
以應急需嗣經外務部電由升任山西撫臣岑春煊就近借撥先後共借

銀三萬兩由晉解緩以一萬五千兩撥給該旗交付教堂以一萬五千兩撥給達拉特旗湊付償款是年五月間該郡王遵派札蘭阿迪雅札蘭札木色楞札布抵綏法使亦派其參贊官端貴前來歸化城經前署將軍文瑞督同現署黑龍江副都統前奏辦蒙旗教案之直隸候補知府壽勳於五月二十九日會同該參贊端貴比員林輔臣及教士蒙員開議統全案命價財產等項該教士索賠銀二十餘萬兩壽勳磋商議定仇教禍首概免追究該旗認賠教堂銀十一萬兩除由晉借款付過教堂銀一萬五千兩相除外尙欠銀九萬五千兩訂明由二十八年六月起至三十年底止分期陸續交付於六月十一日書立草約合同署押完案惟賠款雖已議定該旗並無現銀擬以地租一項作抵教士堅不允從端貴等回京後亦以教民極困待款孔急爲言請再撥銀一萬兩旋咨由外務部電商晉省復飭歸綏道在存儲糧項下撥解銀一萬兩交教士賈名遠如數收訖下欠八萬五千兩該主教教士屢次追索刻不容緩二十九年春間

壽勳向該主教等再四懇商始允將所欠銀兩統以地畝作抵而該旗於奉到檄飭以後抗不遵辦亦不承認兩次代籌墊付之款任催罔應視若無干十月間奴才到將軍任後又派員嚴諭催交而該旗延宕如故經奴才奏請

飭下外務部理藩院嚴飭遵辦奉

旨允准札行復揀派綏遠城協領榮昌察哈爾總管巴圖德勒格爾持文前往開導該旗始漸就範呈請寬限派員赴綏亦經奴才奏明在案本年二月已屆緩期該旗仍未將地畝議交奴才復飭派辦洋務之山西即補道曹受培奏保知府斌儀等隨時催辦並向教士等往復婉商五月間教士字嗣安劉拯靈與該旗商明願將地畝作價抵償計每地一畝作銀三錢函請派員會收其前由綏借墊銀二萬五千兩就近於應收地內劃撥奴才即派墾務委員刑部主事周祚麟候補縣丞吳棟棻等前往該旗會同教士蒙員到地監視交收因青苗在地不便行文經教士委員等商明眼同

教民蒙衆總收草地一段勘明四至作爲三千六百六十六頃六十六畝抵銀十一萬兩於此項地內割出八百三十三頃三十三畝作爲教堂歸還官墊二萬五千兩之數其歸入教堂之地該主教教士體恤蒙艱允給歲租墾種之後按畝計算歸還官款之地無租於七月十八日主教方濟衆教士字嗣安劉拯靈易亮委員斌儀等暨蒙員齊集換立全案完結合同鈐印畫押永遠遵守將前訂合同銷燬計四子郡王旗應給賠款十一萬兩一律交清完案奴才伏查該旗因效尤仇教釀成鉅案上煩

宸慮一再嚴飭速辦而該郡王從前倔強抗違較各旗教案尤爲棘手迨事經數任時歷四年始得告蒞奴才到墾之日正值議款發端間不容髮當時雖在局外而周旋樽俎亦嘗爲之排難解紛及身任軍符更屬責無旁貸今幸賠款辦結蒙教照舊相安奴才仍當隨時勸導防維不使再生罅隙用副

聖主修好睦鄰之至意其劃還官墊銀兩地畝應俟招民領墾清還借款除將


合同鈔杏外務部理藩院外所有四子郡王旗教案以地抵銀一律交清
完結緣由理合會同歸化城副都統文瑞恭摺具陳伏乞

皇太后

皇上聖鑒謹

奏本月二十九日奉

硃批該衙門知道欽此



再查伊克昭盟準噶爾旗於光緒二十六年間亦有仇教殺掠之案疊經前任將軍派委現署黑龍江副都統前奏辦教案之直隸知府壽勳會同法國主教閔玉清比國總教士賈名遠教士南懷義議辦於上年二月議定免懲禍首亦不索賠罰由該旗認給教會撫卹銀二萬九千兩公立合同書押鉛印在案嗣因該旗非常貧苦籌措甚艱懇請變通辦理以翟林窩子噶布爾河頭等六村已墾地三百頃作抵業經教堂應允十月間才到任後兩次派員前往丈交查知該處地戶承種地畝業已數世一旦驟令遷移殊覺流離可憫該教士等復以地多磽瘠不值所抵之數欲於三百頃外再行加添而該旗生計甚窘無可撥補相持數月幾翻前議復經委員等商之教士擬令該民戶每年出租銀一千五百兩給予教堂逐年抵扣才詳察蒙地向無如此重租此次雖事屬權宜求爲消弭巨案然因教會而徵通民戶以後恐官民交累難免有意外之虞且教士持增地之議甚堅不如乘此時別籌良策因飭辦理洋務委員奏保知府斌儀

歸化廳同知樊恩慶等約同教士蒙員熟商將所呈地畝歸官由墾務局
籌給現銀了結該教士等欣然樂從又以得銀勝於得地念奴才委曲調
停之心情願減讓銀二千兩祇收現銀二萬七千兩分爲三期籌付限本
年十一月三十一年九月三十二年三月各交歸化城平銀九千兩書立
期券屆時由主教閔玉清派教士親持向將軍衙門分次照數領取公同
先書草約由主教教士委員等各簽字畫押俟款項交清即將草約並前
立合同一併銷燬其該旗歸官地畝擬派員丈收後仿照達拉特旗四成
地辦法由墾務局分別等則招戶領種收回地價將來升科後應徵地租
由托克托城廳按年徵收惟該處地質不佳放給民戶能否收足原價殊
難預定奴才爲速結教案兼恤蒙艱起見不得不如此通融辦理應俟實
收若干再行結算所有準噶爾旗教案完結代籌卹款收回地畝緣由除
分咨外務部理藩院查照外謹會同歸化城副都統文瑞附片具陳伏乞

奏光緒三十年八月十九日附

奏本月二十九日奉

硃批該衙門知道欽此

光緒三十年九月初一日具

奏爲甄別滿蒙候補筆帖式擬請變通揀補以裨公務恭摺具

奏仰祈

聖鑒事竊查綏遠城將軍衙門額設滿洲筆帖式二員蒙古筆帖式一員遇有缺出向由考中候補筆帖式內揆名擬補歷經辦理在案茲於本年五月間滿洲筆帖式祥祿因病出缺自應照章揆名擬補以免虛懸惟筆帖式一缺有承辦摺奏本表經理彙案之責必須通曉文義熟習公事者方可勝任查光緒十七年二月間奉准部咨取中滿洲候補筆帖式三十四名內除陸續陞遷病故以及遠出戍守者不計外現在本城候補者尙有十七名時值多事之秋揀選員缺自應循名責實與其濫竽充數無補要公不如從嚴甄別俾一員收一員之用當經奴才等面加考試或文理荒疎或年齒漸老礙難照章揆名擬補惟第十四名候補筆帖式榮麟第二十二名候補筆帖式景泰二員年富力強熟習公務所有滿洲筆帖式一缺

請即以候補筆帖式榮麟先行擬補如蒙

俞允卽行給咨該員赴部帶領引

見再查蒙古候補筆帖式現有十名亦經奴才等一律甄別除錫齡阿等八名
文理荒疎不錄外其第十五名書綿第十八名百壽文理平順公事尙稱
熟習將來遇有缺出堪以揆次擬補奴才等爲慎重公事起見是否有當
理合恭摺具

奏伏乞

皇太后

皇上聖鑒訓示遵行謹

奏請

旨本月十二日奉

硃批著照所請吏部知道欽此

奏爲整頓綏遠旗務敬將已經籌辦及應行籌辦各事宜恭摺陳仰祈
聖鑒事竊維方今時局貼危百端待理疊奉

諭旨通飭各省將軍督撫於地方一切要政切實講求以圖補救

朝廷勤求治理

宵旰憂勞凡在臣工同深感悚奴才忝爲世僕渥受

國恩念自督墾晉邊經營未及兩年旋復奉

命軍綏兼膺閭寄才輕任重恒以隕越爲虞惟此職分之所當爲時勢之所必

講敬釋

詔旨責成之重熟察旗務張弛之宜有不敢不亟圖整頓者敬爲我

皇太后

皇上縷晰陳之百年之計在樹人未有人不自強而可言幹事者綏遠人民尙

稱循謹惟毫無強固憤發之氣大都爲口外積習所染疲弱不堪十旗二

十佐二千馬甲七百步甲六十三員官察其真無嗜好者不過十之三

若不嚴飭戒除日復一日將盡人皆成痼疾而不可救藥奴才到任後諄諄戒勉期於更新復於揀選差缺之中隱寓勸懲之意俾知嗜好不去向上無由勢不得不爭自洗濯現在常備馬隊各軍武備各學生幾經更換始覺改觀其閑散兵丁亦未便聽其游惰已於奏開之綏城牧廠酌留屯地擇官長之稍知農事者率之耕作使共習勤庶可漸望轉移此培植根本之情形也口外民戶不講蓋藏一遇薄歉偏灾往往室憂懸磬綏遠係滿洲駐防之地八旗官兵皆如客籍俸餉之外生計毫無每處事畜之艱何有蓋藏之術查綏餉按季由晉請領萬家口食仰給於人萬一撥解愆期或偶遇事變有坐困而已奴才慮及意外未雨綢繆幸值上年口外豐收糧價較平得以籌辦積穀每於發放米折之月倡率該各官兵由應領米折銀內各積些須陸續購備現已積有倉米六千石按年出陳易新足以資利賴此籌備緩急之情形也興學練兵尤關緊要前經調任將軍信恪奏請於各項兵丁內選其身體強壯者三百名均補馬甲之餉作爲常

備軍延致教習改練新操並擬將本城步隊官兵每年應支津貼銀七千餘兩歸入該軍以資養贍教練一年期滿改爲續備裁去津貼仍給馬甲餉銀另選三百名充補常備迭相更代歲以爲常係因別無餉項可籌姑作速成普練之望奴才體察情形教練之期既迫練必不精以綏遠風氣未開人安愚拙教習又難得上選豈旦夕可望有成而更補馬甲尤難推行甲有定額不能於額外增添若相繼坐補不數年而甲缺盡矣非設法變通何能持久信恪原擬就綏遠書院改設武備學堂挑學生六十名亦均坐補馬甲之餉卽飭由該掌教爲之講授有用諸書另延教習訓練操法亦係因舊增新略資節省之意惟該書院規模較小不敷武備學堂之用奴才現將空閒旗署一所改作武備學堂卽以武備學堂騰出之書院改建中學堂其從前書院經費亦歸爲中學堂需用不敷之數由奴才倡領八旗官兵認領綏遠牧廠地共三百四十餘頃俟招佃得租作爲津貼中學堂公費復設立蒙養學堂挑選八旗子弟分途教肄以備入中學堂

之選此已經籌辦而尙多未盡者也兵學兩事不難於擴充而難於籌款
信恪改練新軍及興辦武備學堂指由旗庫存儲兵丁各本身照例坐扣
加添駝馬價銀一萬一千餘兩先行動支以後俟綏遠牧廠墾放卽以所
收押荒租項作爲常年經費查此項馬價銀兩奴才到任時業經用罄而
牧廠墾務復以地多磽薄認領寥寥至今僅涓滴之儲難資接濟現在常
備軍僅有步隊津貼一項暫資應用至武備學堂毫無常款可用莫奮空
拳惟查該軍兵隊及武備學生今已教練年餘於各項操法頗爲精熟停
之可惜奴才惟有暫先設法籌墊勉與維持仍一面妥籌久遠的欸期在
必行凡事不辦則已辦必求臻美備有兵無械與無兵同有械不精與無
械同綏遠舊存槍械均係土槍無可揀用且自庚子以後工部火藥一空
無復赴京請領故應急利器非另行購備不可所慮需款甚鉅籌措良難
現雖備有萬餘金不敷尙鉅查察哈爾左右翼墾務所收逾限罰欸一項
前經奏明歸入東路墾務公司股本擬俟股本收回儘數提歸綏遠專爲

購械之用不動正款而有濟要需此應行籌辦而尙多未盡者也綏遠地居邊要爲直晉防邊之後路更爲烏科轉餉之後路西北一帶防守空虛雖有常備軍尙須及時操練未便卽令分防所恃巡防之用祇此馬隊二百名以蒙地教堂林立保護彈壓實屬不敷分佈加以外人游歷月有數起導送保衛疲於奔命在平時已虞不支倘遇有事之時何堪設想卽如春間河套之役才派隊防勦調遣及於武備學生窘迫可知本擬添練數旗以供遣派而現有之隊尙以餉項不給爲憂何有添練之力審時度勢不敢視爲緩圖而又不能不暫從緩議此又應行籌辦而猝難辦理者也才尤有請者綏遠本瘠苦之區又極衝繁之地而將軍統轄東則調遣宣大二鎮西則控馭烏伊兩盟體制既崇一切因公之費自難概從簡畧然尙無辦公之款將軍一缺歲僅支養廉銀五百兩俸及米折人役工食草豆等項一千一百餘兩統計不過一千五六百金應領之數比之州縣簡缺尙不及半何以敷用此外尙有陋規無非取諸兵餉節壽年復

一年遂使旗兵日卽貧弱一至於此奴才到任已盡裁之然裁汰殆盡流弊愈滋近來蒙旗開墾交涉頻仍較前尤多繁費若不預爲籌及以後貪者更有所藉口廉者益不能久任將使綏遠旗務有日敝一日者其歸化副都統情形亦復相同奴才長慮卻願不敢因現居綏任避嫌不言查察哈爾都統副都統前因辦公竭蹶曾由直隸督臣奏添公費二千六百兩奉

旨允准奴才亦擬懇

恩准予仿照辦理綏遠城將軍擬歲加公費銀三千兩歸化城副都統擬歲加公費銀六百兩庶可辦事從容免致櫻心於日用至貧弱旗兵元氣可復更無論矣此項銀兩擬卽於奴才開辦西盟杭達兩旗之渠地租內分別撥用仍期不動庫儲如蒙

兪允應俟租收暢旺再行按年支領屆時奏報奴才爲有裨辦公起見用敢陳請他若裁無名之費節不急之需修葺城垣而不支公帑提倡工藝而藉

挽頹風發餽則弊混悉除選缺則箭槍並試用
人每資於墾務交涉不必有專員
凡可裨益綏旗之事奴才自應竭力圖維以期仰副

聖朝振興庶務之至意所有整頓綏遠旗務已辦未辦各情形是否有當理合

恭摺具陳伏乞


皇太后

皇上聖鑒訓示謹

奏光緒三十年九月初七日具

奏本月十八日奉

硃批著照所請戶部知道片併發欽此



再查綏遠城改練常備軍建設武備學堂前經調任將軍信恪遵

旨酌擬辦法因常款難籌

奏明開墾八旗牧廠荒地即以所入押荒及租項作爲常年經費俾圖久遠開辦之始一切經費暫由旗庫存儲兵丁各本身照例坐扣加添馬價銀一萬一千餘兩內動支以濟要需查此項銀兩奴才到任以前業經用罄庫儲要款不得不徐圖歸補綏城瘠苦別無款項可籌奴才再四思維因與八旗協領等商同酌擬飭令二十佐領公同領地四百頃定繳荒價銀二十兩共銀八千兩分作八年歸補馬價其不敷三千餘兩應俟牧廠押荒暢旺再行以之彌補如此變通辦理不獨馬價借款有著且官兵領地並可爲佃戶樹之風聲近日認墾漸多已不似從前觀望惟該各佐異常困苦公領之地半多磽薄將來能否一律成熟尙不可知獲利未必有期先已公攤荒價若再責其按年輸租誠恐因公受累且係爲籌補庫款起見與留地屯墾辦法情事無殊合無仰懇

天恩俯念旗兵貧困好義急公所有二十佐領公領廠地四百頃可否一律准免歲租以紓兵艱之處出自

聖慈又奴才倡領八旗官兵由廉俸內備繳荒價認領牧廠地三百四十餘頃擬俟招佃得租津貼中學堂公費業經另摺陳明應請一併

恩免升科以資經久除咨部外理合附片具陳伏乞

聖鑒訓示謹

奏九月初七日附

奏本月十八日奉

硃批覽

再綏遠城八旗牧廠前因地瘠民貧開放不易經奴才察看情形酌擬變通辦法經部議覆奏奉

諭旨允准飭遵在案奴才當將變通辦法章程通行出示曉諭以廣招徠而民情避瘠擇肥仍多觀望又經奴才寬限分繳荒價以紓民力更倡領八旗官兵認領地畝以爲之率現在陸續招佃較從前漸形暢旺據牧廠墾務局稟稱將來領戶日多需用部照擬援照察哈爾左右翼成案奏請

飭部預行頒發等情前來奴才查左右兩翼均請領部照一萬五千張牧廠地勢綿亘不遜於左右翼而辦理之遲速則不同蓋土廣民稀又屬久荒之地現雖放墾漸暢仍難一律宏開相應請

旨飭部先頒發空白執照四千張到綏由奴才轉發牧廠墾務局隨時填用俟放地加多再續行請領除咨部查照外理合附片具陳伏乞

聖鑒訓示謹

奏光緒三十年九月初七日附

奏本月十八日奉

硃批戶部知道欽此

光緒三十年九月初九日具

奏爲綏屬全蒙各旗教案一律完結謹陳明前後辦情形並擬將在事出力各員擇尤分別請獎以昭激勸恭摺仰祈

聖鑒事竊查光緒二十六年拳匪肇亂延禍蒙旗以綏遠所屬烏蘭察布伊克昭兩盟十三旗相率效尤仇教釀成鉅案者至有七旗之多而土默特旗無知蒙民亦復屢滋事端經調任將軍信恪及奴才文瑞在署將軍任內於疊奉

諭旨飭辦後當督飭現署黑龍江副都統前調辦蒙旗教案之直隸候補知府壽勳次第磋商並飭綏遠歸化兩城協叅各官會同辦理其時教士憤怨方深諸多要挾幾至無從著手壽勳等相機因應逐案磋商舌敝唇焦不遺餘力當奴才督墾來邊之日正教務吃緊之時於籌贖達旗賠地一案雖奴才時在局外已先相與維持及接綏遠將軍任後益復責無旁貸復派委山西卽補道曹受培奏保知府分省試用同知斌儀等接辦未完各案

皇太后

計自議辦至今時閱三年現在始一律辦結敢將前後辦理各情形爲我

皇上縷晰陳之查伊克昭盟鄂托克烏審札薩克三旗殺害天主教教士一名
教民十名燒燬房屋搶掠財物一案並烏審旗先年允給教堂地畝久懸
未結一案經前任將軍派員馳赴各該旗會同陝西印委各員與該處教
士議定鄂托克等三旗認賠銀十四萬五千兩其釀禍蒙官均免究懲烏
審旗地畝教士允准退還由各該旗認交教堂銀二萬八千兩均經立約
結案應交各款除由各該旗自行籌付外不敷之數業由陝西撫臣籌墊
交清又查達拉特旗殺害教民數百名燒燬天主教堂及教民房屋數十
所搶掠財物爲數甚鉅一案該主教以此案情節重大百端要索經信恪
親督各該委員竭力設法研磋商始得定議釀禍蒙官均免究懲該旗認賠
銀三十七萬兩立約結案除該旗自籌現款及地租抵款共計銀十五萬
兩信恪代籌現款糧石共計銀三萬兩外下欠銀十九萬兩信恪曾爲籌

費款捐之策極屬周妥因該旗經理不善多歸中飽迄用無成遲之又久該旗始交地畝一千頃請代放付賠經信恪鍾泰先後咨由奴才勸令西路墾務公司承領該地惟地僅千頃覈之所欠賠數不敷尙鉅展轉籌商久無成說時則教士催索嚴急蒙人一意延玩幾啓畔端當迭經奴才派委曹受培斌儀等會同壽勳一面設法支吾一面向蒙人再四勸諭該旗方允添地一千頃而該商又以地價過昂堅不允辦更多方開導激以公義凡經數月之久始得議定該旗交地二千頃股商繳價銀十四萬兩分期先交教堂收領各該教士煩言遂息得以化險爲平所餘尾數五萬兩

前經奴才文瑞奏請

飭由山西撫臣暫行籌墊並請

恩施賞還該貝子原爵奉

旨允准現在該旗全案賠款均已清償於本年四月十五日換立全案詳細合同業經另行奏明在案又查四子郡王旗殺害教民百餘人焚掠甚重一

案二十八年法員端貴比員林輔臣先後來城議辦經奴才文瑞督飭各委員向洋員教士等極力磋磨議定免懲禍首該旗認賠銀十一萬兩分期償付立約結案除前由信恪籌借銀二萬五千兩業經交付教堂外下欠銀八萬五千兩該旗無力籌措現款商將該旗地畝劃撥作抵乃又延不指交並不認還墊款幾經催辦近始交收清結又查準格爾旗殺害教民焚燬搶掠一案迭經飭員與該主教商定從輕議辦該主教極敦睦誼不特禍首免究並不議賠罰僅由該旗認給教會撫卹銀二萬九千兩分期交付業經公立合同嗣因該旗無力籌款懇請以地作抵追派員丈撥地畝該地已均有民戶承種不願遷移該主教等亦不願民戶失地切懇由奴才代爲籌墊並允減讓銀二千兩不得不勉予通融現今議定三期分年籌付於本年七月初五日立約結案又查杭錦旗縱匪劫掠一案經各該委員設法和解不議賠罰該旗業經驅逐之犯事匪徒所種地畝歸堂承種遵照蒙旗定章交租俾兩有裨益已立約結案又查土默特旗本

爲口外六廳所隸之地回漢蒙教錯居其間光緒二十六年秋間漢民聚衆仇教蒙人乘勢騷擾覺經教土指名呈請懲辦並索重賠上年經各委員再四磋商洋員林輔臣亦爲之極力講解教士概允減讓犯事蒙民免究該旗認賠銀一千五百兩立約結案款已交清以上各案除情節較重者均經分別奏咨外其餘尚有蒙教因事爭訟之案不下數十件亦經隨時清理此綏屬全蒙各旗教案一律辦結之情形也奴才竊維二十六年拳教之案以晉省爲最鉅其辦理棘手尤以口外蒙旗爲最難蓋各省辦各省教案議賠輕重尙均有自主之權茲則處處兩難窮於操縱溯當初辦之時教士倔強蒙人抗玩百方勸諭始各稍就範圍追款議既成蒙人則交款疲延教士則不少寬假籌維支柱備極拮据今幸一律辦結犯事官民既均免究各旗賠罰等款更能遞減遞輕至準格爾等旗或僅認給撫卹或僅租給地畝並賠罰而俱免焉雖各旗交款玩延蒙人性多愚悍而終得從容就緒未滋事端自非承辦之員措置得宜防維周密而又處

之以堅忍運之以精心舉全蒙既重且繁之案未必能如是之和平蒞事也信恪鍾泰文瑞任內均派該員壽勳爲洋務總辦及奴才到任之前壽勳請咨赴引復派曹受培斌儀等接辦其事該員等聯絡教士勸導蒙旗其間變端疊出並皆先機籌備消息無形洵屬始終尤爲出力其歸綏各該協領索領會同辦理各案和衷共濟遇事贊襄竭慮殫精規畫悉臻妥善佐領以次等官及各蒙官率兵保護教堂各員馳驅朔漠或數千里近亦千餘里不憚勤苦嚴密防維傳教地方均極安謐馳赴各旗查辦案件並駐紮各旗籌辦賠款各員亦均能盡心經理次第集事司理文案各員昕夕在公勤慎經理案牘紛繁毫無貽誤均不無微勞足錄查二十六年各省教案辦竣出力各員均經各督撫臣奏蒙

恩允獎叙卽山西省辦結二十六年教案亦經升任護撫臣趙爾巽奏保百數十員各在案今蒙旗教案頭緒既極繁蹟而內顧藩屬外顧邦交不使畸輕畸重較之各省教案情形辦理尤爲艱棘現經一律辦結裨益大局實

非淺鮮除壽勳曹受培斌儀等三員及主教教士洋員等另片奏保外其餘在事出力之旗蒙文武員弁謹分別異常尋常核實開單請保斷不敢稍涉冒濫合無仰懇

天恩准予從優給獎以昭激勸出自逾格

鴻施除飭取各員履歷咨部並其次出力員弁核給外獎外所有縷陳烏伊兩盟及土默特旗教案一律辦結情形並請將在事各員擇尤獎叙各緣由是否有當謹會同歸化城副都統奴才文瑞恭摺具陳伏乞

皇太后

皇上聖鑒訓示謹

奏本月十九日奉

硃批該衙門議奏單三件併發欽此

謹將辦結蒙旗教案出力文職各員分別異常尋常請獎繕列清單恭呈
御覽

謹開

擬照異常勞績請獎十員

分部筆帖式益齡請俟分部後免補筆帖式以本部主事遇缺卽補

候選筆帖式景洵候選繕本筆帖式崇錕均請免選筆帖式以主事遇缺

卽選

山西試用知縣路普淋指分山西試用知縣呂崇倫指分江蘇試用知縣

查貴廉均請仍以知縣歸候補班補用

候選筆帖式錫嘏請免選筆帖式以知縣不論雙單月遇缺卽選

山西試用縣丞麟慧請免補本班以知縣仍留原省歸候補班補用

舉人岳溥請以知縣不論雙單月遇缺卽選

山西試用巡檢喜祿請免補本班以縣主簿仍留原省歸候補班補用

擬照尋常勞績請獎十一員

花翎在任候補知府山西歸化城同知樊恩慶請加鹽運使銜

奏保仍留原省補用知府山西候補直隸州知州河曲縣知縣姚學鏡請

俟開缺歸知府班後加鹽運使銜

奏保分省補用知府于翰篤馮汝玠均請加鹽運使銜

奏保分省補用直隸州知州陳光遠奏保仍留山西補用直隸州知州

林毓社奏保仍留雲南補用鹽提舉景禔均請加四品銜

奏保遇缺卽選直隸州知州王德榮請俟直隸州得缺後以知府補用

奏保仍留山西補用知縣吳棣葵請俟補缺後以直隸州知州用

府經歷職銜德本請以府經歷不論雙單月選用

縣丞職銜逢昌請以縣丞不論雙單月選用

御覽

謹將辦結蒙旗教案出力武職各員分別異常尋常請獎繕列清單恭呈

謹開

擬照異常勞績請獎九員

副都統銜卓異軍機處記名軍功花翎綬遠城協領榮昌請以副都統

記名簡放

佐領善奎請以協領遇缺卽補先換頂戴

藍翎防禦德普詩巴請俟補佐領後以協領遇缺卽補先換頂戴

藍翎防禦圖伽本請俟補佐領後以協領卽補先換頂戴

儘先卽補驍騎校德克精額請俟補驍騎校後以防禦儘先卽補

驍騎校景雲請俟補防禦後以佐領卽補先換頂戴

驍騎校呢瑪山請以防禦卽補並加四品銜

記名驍騎校恩騎尉喜通請俟補驍騎校後以防禦遇缺卽補先換頂戴

儘先拔補千總胡恩光請免補千總以守備儘先補用

擬照尋常勞績請獎九員

花翎綬遠城協領文哲理景秀均請

賞加副都統銜

花翎佐領圖伽佈佐領祥光均請加三品銜

花翎遇缺卽補防禦後以佐領補用補佐領後以協領卽補先換頂戴鍾

祥請俟歸協領班後加二品銜

佐領銜儘先卽補防禦騎校菱哈蘇請俟補防禦後以佐領遇缺卽補

記名驍騎校奎慶請俟補驍騎校後以防禦遇缺卽補

五品頂戴藍翎卽補防禦吉蘭請加四品銜

六品頂戴前鋒噶渾請以驍騎校遇缺卽補

謹將請獎辦結蒙旗教案出力蒙員繕列清單恭呈

御覽

謹開

歸化城土默特前鋒校倭什珂請以佐領儘先升補先換頂戴

歸化城土默特公中佐領札拉豐阿請以參領升補


達拉特旗協理台吉巴札爾噶爾第杭錦旗梅楞根布均請

賞戴花翎

四子王旗梅楞札木色楞札布鄂托克旗梅楞拉什德勒格爾達拉特旗

梅楞唐素克均請

賞給二品頂戴



再蒙旗教案查辦異常棘手賴有現署黑龍江副都統直隸候補知府壽
勳經信恪奏調來綏派辦蒙教各案該員經權並用因應咸宜調護於兩
族之間籌畫至兩年之久始終以恤蒙艱固邦交爲宗旨所議各旗賠款
綜計僅六十餘萬極爲輕減而又免究釀禍官民尤屬力顧大局似此和
平蕙事洵非該員之力不及此又查署理山西歸綏道遇缺即補道曹受
培奏保知府斌儀當奴才到墾之初於籌贖達旗賠地經該員等磋商勸
導用協機宜及壽勳請咨赴引後所有各案尙多未結均責成該兩員悉
心接辦逐漸清釐其間忽議忽翻調停匪易索款索地應付爲難尤賴該
兩員相與維持次第集事現在全案辦結統論茲事終始壽勳允應推爲
功首曹受培斌儀等亦實卓著勤勞合無仰懇

天恩准予從優給獎以資激勸查壽勳前經信恪保送引

見奉

旨交軍機處存記旋經練兵處奏派要差現復蒙

恩署理黑龍江副都統該員才堪大用早在

聖明洞鑒之中惟此次辦理蒙旗教案成勞尤不可泯至曹受培前於察哈爾右翼墾務出力案內保有二品銜現在署理歸綏道無可加保以上二員均應如何

加恩獎勵之處非奴才所敢擅擬斌儀一員擬請免補知府以道員仍分省遇缺卽補出自逾格

鴻施除分咨外理合附片陳請伏乞

聖鑒訓示謹

奏光緒三十年九月初九日附

奏本月十九日奉

硃批壽勳等均交部從優議叙欽此

再查法國參贊端貴隨員雷登比國委員林輔臣二十八年先後來綏辦理教務各案公正和平毫無偏袒天主教方濟衆閔玉清教士賈名遠南懷義劉拯靈字嗣安等亦均深明大義於磋商各案賠款力從減讓曲就範圍現當各旗教案辦結合無仰懇

天恩俯准將端貴雷登分別

賞給寶星林輔臣係保有候補副將擬請加總兵銜方濟衆係保有二品頂戴

擬請

賞換頭品頂戴閔玉清擬請

賞給二品頂戴賈名遠南懷義均擬請

賞給三品頂戴劉拯靈字嗣安均經保有三品頂戴擬請換二品頂戴以示寵

榮而敦睦誼出自

逾格鴻慈是否有當理合附片陳明伏乞

聖鑒訓示謹

奏光緒三十年九月初九日附

奏本月十九日奉

硃批外務部議奏欽此

光緒三十年九月二十一日具

奏爲攜印赴邊履勘綏遠八旗牧廠開墾情形恭報起程日期仰祈

聖鑒事竊奴才於上年十一月間親赴後山廠地察知土性之瘠放墾之難回

綏後另籌變通辦法並擬將兩翼馬廠地一千一百餘頃儘數歸八旗選

擇壯丁試辦屯墾以爲民望業經奏明在案本年復飭令二十佐領公領

地四百頃分年認繳荒價歸補從前借用旗庫駝馬價銀又復由奴才倡

領八旗官兵認領地三百四十餘頃俟招佃得租作爲津貼中學堂公費

亦經另摺陳明查此項地畝或爲八旗籌生計或備歸補公款津貼學費

指禾待食均難視爲緩圖現已分飭逐漸興辦兼籌併作頭緒紛繁必妥

定其規模乃克垂諸久遠一切經始非躬親周歷難資率作茲於九月二

十一日攜印前往除俟回綏再行奏報外所有攜印赴邊日期緣由理合

恭摺具陳伏乞

皇太后

皇上聖鑒謹

奏本年十月初二日奉

硃批知道了欽此

奏爲綏遠城牧廠屯墾漸次擴充需款不敷擬請推廣屯墾捐輸以裕經費而利耕作恭摺仰祈

聖鑒事竊奴才於本年十二月間因綏遠城屯墾需用牛具無款可籌奏請撥案開辦牛捐集捐銀三萬兩以資接濟奉

硃批戶部議奏欽此嗣經該部議准覆奏令按照現辦直隸山東等省賑捐章程成數獎給虛銜

封典翎枝貢監等項其寄居商民祇准捐輸實銀不准捐助耕牛等因行知奴才派員開辦收捐在案又於九月間因兩翼馬廠留墾地畝及二十位領公領籌補借用駝馬價銀並奴才倡率八旗官兵認領津貼中學堂公費各地均須親往周歷奏明摺印赴邊履勘亦在案在奴才奏請開捐初意良以屯墾要政現已籌有端倪旗庫艱難無從挹注一切房屋牛具農器籽種凡在應需皆屬刻不容緩而耕牛一項尤爲大宗蒙旗以畜牧爲生

因地制宜集捐較易是以按照舊案重在捐牛迨部議以牛捐成案流弊滋多令照賑捐辦理查近時各省開辦賑捐均係照例銀減成核收與牛捐辦法迥不相合奴才既遵照部議辦理自應與各省統歸一律惟賑捐無收牛之例而捐生圖交銀之便利卽亦不復交牛既不能兩項並收則原定之數實不敷現需之款推原其故上年冬間牛患瘟疫大半倒斃今年口外荒歉牛價益昂春季收買每頭已在二十五兩以上夏秋季更又加增按定章每牛一隻折銀十四兩核計收兩牛之捐尙不能償一牛之值第就兩翼一隅而論地凡一千一百餘頃每頃需用一牛已一千一百餘頭加以房屋農具人工費亦甚鉅以捐例繩之則三萬之數既遞減以時價考之卽三萬而所缺尙多此時縱改令捐牛其價已數倍於例在部議謂其取巧在捐生轉覺其受虧此兩翼原辦屯墾已有待推廣者也加以八旗二十佐公認之地爲各該旗生計所關奴才率領官兵認地爲中學堂經費所自出均奏准免其升科緩遠人盡因循若非設法經營實力

督催一鼓作氣及早全開少一遲延則彌望開荒必至畏難生歇無復振興上辜

朝廷免賦之恩下負官兵急公之舉有地一如無地仍於實際竟無補裨以二十佐公費論似可從緩獨至學堂經費本已懸釜特炊竟聽其置爲緩閱將來安望有興學之一日奴才抵任以來熟察綏事俱廢固係乎人然亦因款無從籌遂致心有餘而力不足百圖要舉迄無一成每覽當時興革之端往往前任舉行後任意存畛域而不思爲繼至有不數年事廢半途弊仍故轍者奴才愚見趁此西墾方興墾員率皆熟手將此兩項公地借牛捐餘費與屯墾同時併舉使之一氣呵成否則以緩城之人力財力過此以往未之或知矣此又綏遠官兵認地有待推廣者也口外一帶今年兩遲霜早歲收不過一二成牧廠尤甚奴才履勘所至觸目傷心場圃一空田廬多棄已墾熟地因來年缺乏籽種尙多不肯翻犁至新領生荒置而不營者更無論矣目此噉噉待哺歲前凍餒已不可支來年更可想見

自來救荒之策非平糶卽設賑以緩庫萬分支紕兵餉尙月費躊躇邊能
他顧切實體察糴則賸虧賑則全捨艱窘如緩而於不敢虧不能捨之外
妥爲籌畫計有借給籽種之一法尙能春發秋收於民有益而於國無損
以重官款者濟農艱卽以裕民食者興地利口外向無土著一遇年荒民
皆逃棄故大青山一帶廢地不可勝數奴才身任墾事意重在民實重在
地三年經營牧廠剛有轉機民逃可虞地棄尤可惜如此辦理地無逃民
民無棄地庶種熟者不至輟耕而歎開荒者尙可接踵而來益墾多矣然
論事機則不能少緩論庫儲則不足取償計無可施無如何也若屯捐正
辦坐視民去地荒而不救是直忍人而已矣

朝廷安用此牧民之官乎且牧廠與後套毗連災情無異套民籽種已由西路
公司接濟相形之下不能不一視同仁此又籌措民戶籽種尤宜推廣者
也以上三端奴才熟計兼籌無論原定三萬兩數本減收卽實能集捐至
三萬兩核之各項需用不敷尙鉅地利本自難闢天年又從而歛之奴才

以人事力爭唯有仰懇

聖慈俯念旗屬窘乏民生困苦准將屯墾牛捐俟原定數目捐足三萬兩後再行展捐實銀三萬兩以資接續而便分布出自逾格

恩施如蒙

俞允俟奉

旨後奴才即飭勸捐各員欽遵辦理所有綏遠城屯墾各項需款懇請推廣展捐緣由謹會同歸化城副都統文瑞恭摺具陳伏乞

皇太后

皇上聖鑒訓示再奴才赴邊履勘於十月初五日回城合併陳明謹

奏三十年十一月初三日具

奏本月十五日奉

硃批戶部議奏欽此

再綏遠城常備軍改練新操需用快槍因購費太鉅無款可籌經奴才於籌辦綏遠旗務摺內奏明由察哈爾左右翼墾務所收逾限罰款歸入東路公司股本一項儘數提爲購械之需業蒙

恩允欽遵在案查綏遠常備軍所需操槍以鉅款難措論似應從緩惟改練日久漸有可觀若不及時購辦技力枉用津貼徒糜光陰亦復可惜則改如不改練如不練現與德國泰來洋行定購新式七密粒口徑五響毛瑟步槍四百枝馬槍二百一十枝每枝帶子彈一千粒合天津化寶行平銀六十九兩五錢八分餘共需銀四萬二千四百四十八兩八錢又附購無烟子彈十五萬粒合銀六千七百五十兩單響鉛頭子彈十萬粒合銀二千三百兩定明來年二三月間在天津交槍其價銀分三次交付立有合同查此項槍枝製造堅利銷路最廣山西撫臣張曾敷亦與該洋行定購在先據該商人喀佑斯等來城面稱從前子彈業經售罄新造工本加精價亦增之經奴才會同歸化城副都統文瑞遵委綏遠城協領文哲琿土默

特參領福祿與之月餘商議磋商至萬難再減之數始定每枝六十九兩五錢八分餘雖較山西出價稍多該商已屬讓之又讓考之他商槍價均尚有加於此且合同註明一概不給用錢各委員皆潔已奉公一洗陋規毫無浮冒至購價本指東路公司入股罰款及各項樽節現在公司尙未辦結指款未能提用其樽節各項亦一時未能集齊均屬緩不濟急不能不於庫存補立馬價歲用房租兩項先行挪用並有在商號挪借者將來以所指之項隨收隨還各清各款所有購價係由綏遠自籌未動庫款應免造報其土默特常備軍應需馬步快槍二百四十枝亦仿照綏軍辦理待用本急籌款尤艱原指由當課銀兩提用以現存不敷在辦公款項先挪後補情形亦復相同蓋軍不練則已練必須夫快槍槍不購則已購必求其精利明知兩城窘苦鉅款難籌而練兵爲

朝廷所急購槍又爲練兵所急春間後套之警事起倉卒設使利器應手何至日久始平口外置械談何容易一失日時束手無策當此急不可待之時

奴才不敢以小誤大因噎廢食雖其價少加亦所不計所有亟購綏遠城常備軍槍枝及土默特隨同辦理各緣由除將合同鈔錄咨練兵處外務部暨分咨查照外理合附片具陳伏乞

聖鑒謹

奏三十年十一月初三日附

奏本月十五日奉

硃批該衙門知道欽此

光緒三十年十一月十三日具

奏爲派員勘查渾津黑河莊頭承種園地所餘畝數恭摺仰祈

聖鑒事竊於光緒三十年十月二十日准戶部咨開綏遠城將軍奏援案徵收莊頭糧石遵章改奏一摺並造具清冊咨送到部查據該將軍奏稱糧餉同知應徵光緒二十八年分渾津黑河莊頭十三戶應交米石又帶徵光緒二十六年蠲餘第三年米石均已掃數徵完查此項米石原額係二千六百一十六石八斗七合八勺節經奏請豁免城地米沙淤河佔地奏請豁免米又報墾地升科米是前次請豁後報升科者已非一次何以自道光五年至光緒二十九年已屆八十年之久並未報升科米石一次顯有弊混亟應加意整頓以符原額應令該將軍嚴飭糧餉同知認真覈辦毋得視爲具文空言塞責以重款項而供兵食等因准此奴才隨卽派委防禦博勒合恩驍騎校色拉芬會同糧餉同知吉泰前往認真查勘據實稟報並將所查熟荒地畝繪圖貼說詳細註明並嚴飭該各員查勘固要認

真而有無仍須核實不得意存見好於閭閻上虧

國課亦不得意存見好於長吏下累民生去後茲據該委員同知稟稱勸查

渾津莊頭趙天會等十戶每戶原承種園地六十頃有餘十戶共種地六百一十七頃一十六畝一分七釐九毫內除歇荒城廢道路圯楞河佔水渠房佔草灘民地現在統共祇贖原種糧地二百六十一頃六十七畝一分三毫八絲四忽今餘丈出可承糧地四十八頃四十四畝六分七釐八毫一絲六忽再查勘黑河莊頭胡建基等兩戶每戶原承種園地六十一頃有餘兩戶共承種地一百二十三頃九十四畝三分五釐二毫內除城廢沙淤河佔水渠房佔道路草灘現在統共祇贖原承種糧地一百零四頃七十六畝三釐今丈餘出可承糧地八十六畝五分二釐一毫惟黑河莊頭李自明一戶原承種園地六十頃七十四畝四分二釐二毫內除城廢沙淤河佔水渠房佔道路現在祇贖原承種糧地五十一頃四十九畝六分四釐六毫今丈其可以承種糧地四十六頃六十四畝七分二釐三

毫照原額不敷地四頃八十四畝五分二釐三毫此地因沙灘最多河水難灌致有虧短不能不據實稟明查核辦理等情前來查此項圍地故才抵任後檢查案卷該廳徵收米石虧短甚多卽欲派員清查因事關清賦未敢率行舉辦茲准部咨派員勘查既據該委員等所丈各圍地有增有減尙屬認真核實以增減之數統計共丈出渾津黑河兩圍莊頭餘出可種糧地四十九頃有零足見年久弊混自應令其升科勿任再事隱匿除飭該廳卽將丈出餘地令自明年照數升科以供兵食並擬每年飭令該廳親往兩圍清查一次有無承種隱瞞據實詳報以備稽核而杜流弊此係糧廳所管地畝由奴才督飭辦理情形如此推之他廳亦可概見擬會商山西巡撫臣妥籌清理辦法再行具奏除將勘丈圖冊送部查核外理合恭摺具陳伏乞

皇太后

皇上聖鑒謹

奏

光緒三十年十一月十三日具

奏爲奴才舊疾復發懇

恩賞假調理恭摺仰祈

聖鑒事竊奴才體夙健實自來口外居少行多爲風寒所逼時患痰嗽氣逆之證第以諸事創始躬無旁貸不能不强自振拔前年由歸化赴張家口會議左翼墾務行至大同府感冒風邪萬難支持始請假調醫中途而返去歲又奉

命軍綏責任愈繁精力時有疲殆迄未靜心調養今春後套匪徒滋事奴才日夕焦勞復牽動大同舊病因軍務吃緊未敢乞假仍扶疾督飭各軍勦辦幸及事定病亦就痊詎此次親至後山周勘地畝正交冬令逐日在野感受嚴寒回城後益覺四肢無力心神恍惚氣鬱胸膈不可以風誠恐愈延愈深久更難治惟有仰懇

天恩賞假十個月俾得安心診治及早復元免致纏綿深入現在墾務旗務較

前均漸就緒故敢籲

賞假期遇有緊要事宜仍當力疾辦理萬不敢以薪憂偶抱致悞要公所有
才舊疾復發請假調理緣由理合恭摺具陳伏乞

皇太后

皇上聖鑒謹

奏本月二十六日奉

硃批著賞假一個月欽此

光緒三十年十二月十一日具

奏爲辦理教案應需經費謹將年餘動用各款開支數目彙總核實報銷恭摺仰祈

聖鑒事竊查綏遠城辦理所屬蒙旗教案應需經費經前署將軍歸化城副都統文瑞於光緒二十九年十月間具奏將自光緒二十七年三月起截至二十九年九月底止前後提解並暫借商號各款共銀二萬六千五百兩除需過銀二萬五千九百八十九兩五錢四分報銷外下餘銀五百一十四兩四錢六分一俟用竣歸入年底報銷並年由晉省按年籌撥專款銀三千兩及欠商號之銀二千五百兩亦請一併籌撥以濟急需而免累商等因奉

旨戶部知道欽遵在案奴才自上年十月抵任後以前任謹將賠教款目議定其如何籌款如何交地復經派員分投辦理嗣因日俄失和奉

旨飭令慎固封守各國人民財產教堂一律認真保護當於前派分紮保護教

堂官兵之外加添遊擊巡邏防範之兵所需津貼盤費爲數不貲又前歷任將軍暫挪商號之款久已愆期未補前存餘銀早經用罄奴才到任伊始窘迫萬狀文牘煩仍始准山西撫臣咨覆於舊存押荒款內劃撥辦教案銀三千兩其時又值套匪起事凶焰日熾屢撲教堂圖搶槍械教士告警乞援一日數至綏遠馬隊常備軍盡在前敵加添株守保護教堂之兵直以武備學生充數窘迫可知耗費亦可概見至劃撥賠教地畝忽議忽翻旋停旋丈委員兵丁奔走各旗絡繹於道爲期已久需款尤繁更無論矣以前撥之三千應各項之急用萬不能給當於三月間片奏請將截留察哈爾右翼墾務四成押荒項下動用聲明將來晉用若干綏用若干俟事竣時核實開報奉

旨允准遵即在截留四成押荒項下籌撥銀六千兩除將前欠商號各銀一律還清餘銀祇作保護教堂及交款撥地款待教士之用其津貼常備軍前敵餉需馬乾尙不與焉殆套匪肅清恐根株未淨仍擇要留兵數處保守

教堂隨時巡邏彈壓餘皆撤回自應將前動各款分別報銷以清款目綜計以上前存提解二項共銀九千五百一十兩四錢六分除歸還前任挪借商號銀二千五百兩不再報銷外實共銀七千一十兩四錢六分自光緒二十九年十月起截至三十年十一月底止派赴各旗保護教堂護送洋官官兵需用津貼盤費銀三千一十三兩二錢派赴各旗查辦案件催交賠款丈收地畝各委員等津貼盤費銀一千八十三兩七錢辦理文牘委員字識需用津貼銀三百八十八兩五錢接待教士及游歷洋員等項需用銀二百九十三兩二錢五分通共需用過銀四千七百七兩六錢五分下餘銀二千二百三十一兩八錢一分存備開支以上所需各款均屬核實一無浮冒除將動支細數造冊報部外應請

勅部核銷總計綏遠辦理教案除歷任將軍兩年用過二萬五千九百八十九兩五錢四分業經奏銷外自奴才去年十月到任截至今年十一月底止事皆繁重時已年餘祇用四千七百七十八兩六錢五分但使可節無不

及時節之惟現在雖將奉

旨交辦之案一律辦竣而蒙旗賠款未能一時償訖或以地抵或以借款分年帶交其疲玩故習文札交催熟若罔覩尙須隨時派員守催辦理且洋性最急蒙性最緩以急遇緩時須有人調處其間方不決裂兩盟教堂林立蒙漢雜處性本囂然不靖難保不時小有交涉一派兵官前往動行千百里羈守數十日其津貼盤費仍難一概停支要必以核實爲斷即以現在論烏審鄂托兩旗爭執牽涉教案前經陝省議結今尙爭執委員往辦已四月餘矣蒙旗教案之難了非內省可比綏遠之累實累於此奴才雖力從節省而浮費可期於少教事難必其無前經署任將軍文瑞奏請籌撥常年辦教專款三四十千金當此庫款萬分支絀此項可勿須另籌但期實實用銷則不悞要公亦不至鉅費至以後應需經費由何項動支應即隨時奏明所有報銷奴才經手辦理教案動用各款數目各緣由除咨部查核外

謹繕摺具陳伏乞

皇太后

皇上聖鑒訓示施行謹

奏本月二十三日奉

硃批戶部知道欽此

光緒三十年十二月十三日附片

再緩遠城兵米不敷月放改將一年應放之米一半歸成月折卽此月折且推行積欠數月自兵食一愆期遂使人人朝不謀夕重爲各旗無窮之累始尙自行典當賠補久亦典當無資一有急需動須指米餉息借舖店按月攤還而商賈壟斷居奇外加內扣層層剝削甚至循環一本百利兵之積累日多一日商之盤剝亦日甚一日卒至餉不自有貧不聊生較之京城米碓房之苦制旗兵情形尤爲可憫奴才到任年餘切加體察欲蘇兵困惟有仿照奉天湖北江西河南在省城設立官錢局辦法於緩遠城試辦有無緩急調劑盈虛俾市面流通公私兩便庶兵丁從此永不爲奸商所制在各省統籌國法係維全省之利源此則隱恤兵艱借紓一城之生計大以成大小以成小以具體而徵之劃規濟當務爲急之要用雖官家利益尙待將來而各旗佐窘苦異常已於目前均需實惠惟開辦官本旗庫無款可籌暫由墾務公司借銀一萬兩以資經始俟辦理有效陸續

歸並委廉公協領一員總司其事現屆歲暮又值年荒八旗萬家待濟
孔亟已飭先行試辦如經理得法利於推行再行酌量推廣奴才爲流通
錢法體恤兵艱起見是否有當理合附片具陳伏乞

聖鑒謹

奏本月二十八日奉

硃批戶部知道欽此

光緒三十年十二月十五日具

奏爲防禦年邁舊疾舉發恐悞差操呈請休致恭摺仰祈

聖鑒事竊據署理兩翼蒙古協領哈布爾札布轉據鑲紅旗蒙古防禦春林現年七十五歲食俸餉當差六十年由武舉出身咸豐年間跟隨江甯將軍托明阿郡王僧格林沁副都統德楞額等迭次出征江南山東等省前後共打仗三十四次殺賊四十餘名捉生五名經副都統德楞額會同山東巡撫奏保山東江南一律肅清案內以委驍騎校武舉春林打仗奮勇殺賊甚多

奏保以驍騎校儘先即補同治十一年補授驍騎校光緒十七年坐補防禦均經咨部核准註冊各在案茲因壯歲從戎臨陣多次積勞成疾不時舉發誠恐有悞差操呈請原品休致等情當飭署協領哈布爾札布前往查驗屬實加結呈報前來奴才等覆核無異查例載各省駐防及東三省察哈爾新疆等處遇有告休革退官員如五品以上者由該管大臣或奏或

題聲明請

旨俟奉

旨後再行開缺等語又例載內外三品以下官員年老因病告休均准其原品
休致其曾經出征打仗或殺賊捉生或受傷有一二項功績者年至六十
以上俱以可否賞食全俸請

旨等語復查綏遠城佐領雅爾哈因年邁有出征打仗勞績呈請休致經奴才
等奏蒙

恩賞全俸在案此次防禦春林曾經出征打仗殺賊捉生著有勞績現年七十
五歲核與請食全俸例案相符可否賞給全俸之處出自

恩施除將該員履歷送部查核外所有防禦年邁舊疾舉發恐悞差操呈請原
品休致緣由理合恭摺具陳伏乞

皇太后

皇上聖鑒訓示謹

奏本月二十七日奉

硃批著原品休致賞食全俸兵部知道欽此

再前因口外蒙教案一律辦理結經奴才等將在事出力各員擇尤分別開單

奏請獎勵奉

硃批該衙門議奏欽此茲准兵部議覆單開之協領榮昌請以副都統記名簡放該員所請官階較崇應令該將軍另行奏明請

旨等因奉

旨依議欽此咨行前來奴才等伏查協領榮昌前因光緒二十八年軍政案內奏准卓異於二十九年閏五月十一日經部帶領引

見奉

硃筆圈出准其卓異著交軍機處記名欽此欽遵在案此次該協領於辦理蒙旗教案隨機因應始終其事實屬最爲出力前經以卓異記名例係應升副都統而續著異常勞績又不便聽其向隅合無仰懇

天恩將該協領榮昌仍以副都統交軍機處存記並請遇缺請

旨簡放出白

逾格鴻慈所有遵照部議專案保獎異常出力協領緣由是否有當謹附片具

陳伏乞

聖鑒訓示謹

奏光緒三十年十二月十五日附

奏本月二十七日奉

硃批榮昌著交軍機處存記欽此

再綏遠購買槍枝及現存快礮非有存儲之所不足以昭慎重前派各協領相度基址據稟武備學堂尙有空閒院落堪以建蓋奴才親往履勘地勢甚屬相宜惟甄瓦木石動需鉅款實已無從籌措而建蓋軍械所亦屬事不容緩奴才伏思再四設法通融查綏遠舊有米倉共計一十五處僅一二倉尙屬完整餘皆非常倒塌甚有屋中生樹脫頂而出大至合抱察其形勢蓋近百年久已失修奴才接任以來查看倉廩見滿地甄木縱橫遂卽派員檢點俾無失落近年綏遠兵米改由各廳解銀款到隨購隨放其暫存者均係尾贖未放之米多不過百石少亦僅十數石一二倉卽已敷用所餘甄木漸卽腐壞且亦失去十之七八刻雖派員稽查封存久亦必至全失奴才切實籌算與其委之於地將來一無所存何若用之於公目前已多節省况實無款可籌擬卽將廢倉甄木挪建軍械所以陳倉之棄材作武庫之實用於彼無損毫末於此足當鉅資洵爲兩得其宜奴才前用損裂之舊式槍礮改鑄屯墾農器及鑄洋操帶鐵礮均此化無用

爲有用之意現皆大適於用且此項廢紙奴才曾擇其完整者補修城垣
總期以公治公款不另籌物無虛擲事關借用倉料不能不據實陳明所
有請以廢倉紙木建蓋軍械所緣由是否有當伏乞

聖鑒訓示謹

奏光緒三十年十二月十五日附

奏本月二十七日奉

硃批知道了欽此

再綏遠購買槍枝及現存快砲非有存儲之所不足以昭慎重前派各協領相度基址據稟武備學堂尙有空閒院落堪以建蓋奴才親往履勘地勢甚屬相宜惟甄瓦木石動需鉅款實已無從籌措而建蓋軍械所亦屬事不容緩奴才再四設法通融查綏遠舊有米倉共計一十五處僅一二倉尙屬完整餘皆非常倒塌甚有屋中生樹脫頂而出大至合抱察其形勢蓋近百年久已失修奴才接任以來查看倉廩見滿地甄木縱橫遂卽派員檢點俾無失落近年綏遠兵米改由各廳解銀款到隨購隨放其暫存者均係尾賸未放之米多不過百石少亦僅十數石一二倉卽已敷用所餘甄木漸卽腐壞且亦失去十之七八刻雖派員稽查封存久亦必至全失奴才切實籌算與其委之於地將來一無所存何若用之於公目前已多節省况實無款可籌擬卽將廢倉甄木挪建軍械所以陳倉之棄材作武庫之實用於彼無損毫末於此足當鉅資洵爲兩得其宜奴才前用損裂之舊式槍砲改鑄屯墾農器及鑄洋操隨帶鐵鍬均此化無用爲有

用之意現皆大適於用且此項廢軛奴才曾擇其完整者補修城垣總期以公治公款不另籌物無虛擲事關借用倉料不能不據實陳明所有請以廢倉軛木建蓋軍械所緣由是否有當

伏乞

聖鑒訓示謹

奏光緒三十年十二月十五日附

奏

光緒三十年十二月十六日具

奏爲叩謝

天恩恭摺仰祈

聖鑒事竊奴才欽奉光緒三十年十一月十二日

上諭蒙

加恩賞給奴才祖母

御書匾額一面紫檀三鑲玉如意一柄大卷江綢袍褂料二疋大八緞袍褂料

二疋資捧到綏當卽恭設香案望

闕叩頭謝

恩祇領訖伏念奴才祖母生際

昌期幸逢

慶節因舉引年之典更推

錫類之仁舊德式巾車累世胥歸

蒙養重闈絲歲月餘年悉荷

生成

奴才祖母几杖優游桑榆遲暮沐

恩施於罔極愧仰答之未能奴才惟有益矢慎勤勉酬

知遇推

聖世作人之化教孝卽以教忠竭微臣事

上之心報劉彌殷報

國從此

堯天普慶千秋永沐

皇仁還看

禹甸長春十載重登

壽宇所有奴才感激下忱謹繕摺叩謝

天恩伏乞

皇太后

皇上聖鑒謹

奏

A large rectangular table with 12 empty columns. The table is oriented vertically on the page. On the right side of the table, there is a small, dark, triangular tab protruding outwards. At the bottom right corner of the table, there is a small rectangular box, possibly a label or a mark.

光緒三十年十二月十八日具

奏爲土默特常備軍創辦數年訓練有效擬將翼長管帶官遵章酌保以資鼓勵恭摺仰祈

聖鑒事竊於光緒二十六年六月間因近畿構兵邊鄙不靖經前任將軍副都統奏明由土默特兵丁內挑選壯步隊三百名揀派叅佐等官訓練嗣於二十七年間復經如才文瑞奏請汰弱留強編爲常備兵仍使足三百名之額上年十月間如才貽穀到將軍任後復將該軍營制餉章益加整頓因常年餉需不足奏請改爲每年選練二百名分爲左右兩翼飭令管帶各官認真管轄操練各在案查土默特蒙古兵丁向本散居屯戍雖襲卒伍之號實不知軍隊之方自

朝廷庶政維新講求武備於是羸幕旣喪之侶亦與諸州精銳同約束於步伐止齊初猶扞格而不易通繼乃相習而與俱化計二十六年成軍後迄今已閱五年經該軍翼長及管帶等官遵照各省常備軍規制勤加訓練

該兵丁等生長蒙地本有樸厚勇猛之氣近更師他人之長技棄當時之陋俗蒸蒸日上漸覺改觀奴才貽穀等於本年春秋兩次校閱見其坐作進退均合新軍操法春間套匪滋事該軍亦曾應徵調守禦有勞平時巡緝保衛地方復能不遺餘力洵屬著有成效該軍翼長叅領伊精額福祿自成軍以來督率教練並於籌餉製械倍爲出力管帶叅領蘇聯春奏保佐領倭什珂認真簡習不憚繁難用使僻陋之蒙旗亦爲奮興之勁旅其勞績均未可沒伏查練兵處奏定陸軍營制獎勵章程內開創練新軍訓練漸熟可任征戰校閱後果能一切如法者准按異常勞績請獎二次限營隊每百人奏獎二人咨獎三人等語又本年八月間曾經涼州副都統玉崑以創辦新操練有實效將涼州駐防佐領斌昌防禦增春保獎升銜升階奉

特旨允准有案今該叅領伊精額等事同一律且所練蒙兵質性畧鈍不比八旗子弟靈通雖口食稍增仍未足餉章之定數居然能嫻熟軍旅較之內

地兵丁駐防旗卒似覺更難近日蒙藩如喀喇沁親王於興學振武諸端極力考求各國良法論時務者遂以蒙兵可練爲言土默特亦蒙古支流又與烏伊兩盟接壤倘從此益圖深造非獨爲邊城開其風氣亦且爲盟部樹之先聲現正稍有進步之機不得不及時鼓舞合無仰懇

天恩將土默特叅領伊精額福祿均

賞加副都統銜叅領蘇聯春加二品銜奏保佐領倭什珂俟補佐領後以叅領

儘先升補先換頂戴出自逾格

鴻慈共保四員按定章並未逾額亦未全照異常請獎如蒙

俞允再將該員等履歷咨送理藩院查照所有土默特常備新軍訓練有效請

將翼長管帶各員遵章獎勵緣由理合恭摺具陳伏乞

皇太后

皇上聖鑒訓示謹

奏本月二十九日奉

硃批著照所請該衙門知道欽此

再育才以興學爲先興學以籌款爲亟綏遠創設武備學堂前經調任將軍信恪墾八旗牧廠即以押荒歲租作該學堂經費並因開辦無款奏由旗庫存儲兵丁本身照例坐扣馬價銀兩暫行支用未幾馬價一項即陸續用罄而牧廠墾荒尙難遽期成效指禾待食幾至無米爲炊奴才貽穀接任以來查該學堂操練日精規模大有可觀停辦未免可惜隨時責以大義勗以將來將各生均坐補馬甲俾無內顧之憂專心嚮學但甲餉僅足養贍室家不能有所餘以資學業奴才方慮其因貧而懈向學不殷乃疊次親至學堂按名考驗見諸生艱苦卓絕爭自研求此等自強有志之人求之邊徼旗兵洵不易得即比之蠶螢映雪亦不多讓計自開辦以來勉強敷衍已近三年迄無專款即教習薪水學堂燈炭爲款不多尙於常備軍津貼項下通融分用窘可知矣就目前而論已有岌岌不可終日之勢日復一日益難久支在諸生耐時篤學原期經費之必加設使徒托空言是口惠而實不至必至督催勸勉之俱窮以時計之明年即卒業之期


瞬滿三年爭在數月若仍令枵腹相從將前之業廢半途者可惜今之功
虧一簣者尤可惜也當時毫無准款輒即興學不得不謂之鹵莽從事要
非八旗子弟層層節制能忍艱辛亦安能強恃於今日夫學問之道於堅
苦中見志士豈能於敷衍中得真才時時存一敷衍之心轉有負諸生之
堅苦奴才既嘉其堅苦之志即不忍不籌以津貼之資年來汰不時之需
裁無名之費於各項公款撙節通挪湊成二萬四千兩發商生息自明年
正月起月得商息二分計按年可有二千八百八十兩以之津貼武備學
堂益以六十名馬甲不扣之成平目前足可支拄至加足經費與晉省學
章同歸一律仍俟諸牧廠押荒暢旺之時其如何現行章程應俟妥定後
另行奏明所有專籌武備學堂經費緣由理合附片具陳伏乞

聖鑒謹

奏光緒三十年十二月十八日具

奏本月二十九日奏

硃批該衙門知道



再歸化城土默特地大物博向稱富庶乃積廢弛而成凋敝遂至愈久愈窮竊查該旗習俗委靡非一朝一夕之故上下朦蔽豈一官一任爲然前經升任撫臣張之洞奎斌先後密陳該旗積弊奎斌並痛陳旗務廢弛弊端百出兵丁受制於官苦累萬狀各節尤爲詳盡在當時因旗漢畛域未能及時整頓以致受病日深幾於不可救藥奴才備員綏遠有統轄土默特之責自到任後並顧兼籌年餘剛將綏遠旗務理有端倪土默特情形最難著手僅與歸化城副都統文瑞先將該旗常備軍積弊悉除現已改觀其餘亟應釐剔之處尙多固副都統責有攸歸亦奴才力有未逮夏間烏蘭察布盟長以含混札台支應希圖到處滋擾呈請認真辦理烏里雅蘇台將軍復以台差弊甚商加整飭查其弊全在土默特首站派差之時在此明賈官差在彼敢携私貨偷漏之廣

國課暗虧騷擾之繁蒙台全累然此僅百弊之一累尙在於外旗至該旗兵官交困疊據十二參領公同印稟詳請整頓前來處處牽涉副都統文瑞

察其情詞迫切亦似少有過當處查副都統人尙和平惟不知兵丁疾苦往往於興革應辦之事情心餘而力不足因其弊而習爲常者此在識力未充之故現已與奴才力求整頓事認眞核實不復如初夫天下事惟患不認眞核實耳若從此抱定是意永遠做去何事不治何治不成奴才愚意在不追既往但期有裨於將來

朝廷屢下詔書時以貪官污吏賤民脂膏痛加責戒今土默特全旗顛連無告若不及時補救既拂輿情益成痼疾將來敗壞日甚一日恐有求如今日而不得者溯該旗自

國初率土來歸而後歷數百年與內地滿蒙漢無異而該管官視同化外一切施行率多任意甚至層層剝削直如入無人之境奴才既知其情形如此自未便再任不肖官吏躡無天日爲所欲爲其如何整頓總以弊去太甚事期可行爲本義而其切要之圖尤在上保

國帑下蘇兵銀力杜中飽三者盡之矣容俟會商副都統文瑞擬定辦法再

隨時奏

聞所有土默特旗務亟應整頓緣由理合附片具陳伏乞

聖鑒謹

奏

光緒三十年十一月十四日

奏爲佐領年邁舊疾復發恐悞差操呈請休致恭摺仰祈

聖鑒事竊據署理兩翼蒙古協領哈布爾札布轉據正黃旗蒙古副都統銜儘先補用協領軍功花翎佐領雅爾哈現年七十九歲食俸餉當差六十四年咸豐十一年間奉派北路軍營戍守由委署筆帖式經烏里雅蘇台將軍大臣及督辦新疆軍務烏魯木齊都統景廉等先後因軍務出力登次奏保至副都統銜儘先即補佐領後儘先補用協領並

賞戴軍功花翎均經兵部覆准註冊光緒十三年借補防禦十六年補授佐領亦經部覆核准註冊各在案前因新疆漢狗叛亂逆獮白彥虎分股竄至布倫托海阿爾泰山一帶蒙古地方擾亂各旗游牧共打仗六次督隊殺賊一百七十餘名生擒首賊二名本身殺賊六名捉生一名左膀膺受矛傷一處隨即調治痊愈尙能勉力當差詎於今冬矛傷復發步履維艱恐悞差操呈請休致等情當飭奏保副都統銜花翎協領文哲渾前往查驗

屬寔加結呈報前來奴才等覆核無異查例載各省駐防及東三省察哈爾新疆等處遇有告休革退官員如五品以上者由該管大臣或奏或題聲明請

旨俟奉

旨後再行開缺等語又例載內外三品以下官員年老因病告休均准其原品休致其曾經出征打仗或殺賊捉生或受傷有一二項功績者年至六十以上俱以可否賞給全俸請

旨等語近閱邸鈔吉林將軍富順等奏協領富通山因年邁休致該員有出兵打仗勞績與請給全俸例條相符業經蒙

恩賞食全俸今綏遠城正黃旗蒙古副都統銜儘先補用協領佐領雅爾哈壯歲從戎早矢請纓之志衰年乞退不存戀棧之心其知足知止誠可嘉許查該員曾經出征打仗殺賊捉生著有勞績且年已七十九歲核與定例及富通山年邁休致蒙

恩賞食全俸成案相符可否賞給全俸之處出自

恩施除將該員履歷造冊咨送兵部查核外所有佐領年邁舊疾復發恐誤差

操呈請休致緣由理合恭摺具陳伏乞

皇太后

皇上聖鑒訓示謹

奏

光緒三十一年正月二十四日具

奏爲叩謝

天恩仰祈

聖鑒事竊奴才於光緒三十年十二月二十日欽奉

恩賞福字一方本年正月十六日賫捧到綬奴才當卽恭設香案望

闕叩頭謝

恩祇領訖伏念奴才庸愚下質

賞賚頻邀忝掌兵農兼受腹心之寄濃霑

雨露曾無毫髮之酬乃當鳳律初更共慶陽回

禹甸又奉

鸞章下逮欣瞻

畫煥義文緬

建極五福之疇協

均禧九域之義自

天錫

寵伏地懷慚奴才惟有益欠懼忱徐圖報稱中邦成賦效銍秝粟米之輸將邊
徼治軍循綱狩蒐苗之典則覩

雲漢而思

恩澤永戴

生成依

日月以仰

光華爰廣喜起所有奴才感激下忱理合恭摺叩謝

天恩伏乞

皇太后

皇上聖鑒謹

奏

光緒三十一年正月二十四日具

奏爲叩謝

天恩事竊奴才於光緒三十年十二月二十三日恭逢

恩賞福壽字各一方三十一年正月十六日賫捧到綬奴才當卽恭設香案望

闕叩頭祇領訖伏念奴才滿洲世僕知識庸愚昔年忝附清班毫無建樹此

日頻膺重寄未答涓埃止慚職守之多虧乃荷

寵榮之煥錫遙接

日邊春色欣迎

天上恩光

皇躬廣建極之敷晉

福疇而介祉

盛世彰作人之化遊

壽字以延禧

渙汗欽承淪肌感戴奴才惟有益加勤慎仰副

生成乘輅間四境膏腴秉節詢八旗疾苦策雖柔雖愚之質矢已力於百千勵

得尺得寸之功答

聖慈於萬一所有奴才感激下忱理合恭摺叩謝

天恩伏乞

太后

皇上聖鑒謹

奏

光緒三十一年二月二十八日具奏

奏爲土默特官兵失業苦累萬分亟宜整頓清釐以資生計恭摺仰祈

聖鑒事竊查土默特蒙旗地界口外五廳設於茲東與察哈爾毗連西北與烏
伊兩盟接壤兵五千五百餘甲官百數十員就土地人民論非不足以資
富強乃考其土地有若無也觀其人民貧且弱也本無賦重政煩之擾而
有日朘月削之虞奴才貽穀到任以來疊經全旗叅領公同印稟籲請清
釐官兵地畝初猶以爲事可從緩後則情事汲汲若有不可終日者是以
於上年將該旗亟應整頓之處先行奏明在案茲復詳加考察更叅以輿
論洞知其受病之原敬爲我

皇太后

皇上觀縷陳之士默特附近邊內其服食起居與內地民人無異漸至鹵惰成
性有地而不習耕耘無畜而難爲孳牧惟賴客民租種其地藉資當差久
之土客混淆漫無稽考而奸民非以利餌即以術欺有本非業主挺然冒

稱者有朝種多年抗租不給者侵佔不已世業全失無地者有地有地者無地此亟宜整頓者一也劣蒙覬覦公產勾串奸民私相租典或以一地而轉售數人或藉一地而侵越數地輾轉弊混盡入私肥轆轤不清愈久愈結將有甚於察哈爾左右翼者此亟宜整頓者二也蒙旗兵官向無俸餉全指所分租項當差今世產流傳半多迷失何能聚千百赤貧之族而責以講求政治之端本無缺地無如何也若本有而歸於無地可惜人尤可憐在一人差不能當在一旗公不能辦此亟宜整頓者三也口外各廳蒙漢纏訟起於地事居多世產無部照蒙例嚴禁賣地租典自無印契昔年蒙俗渾噩並白契亦無之一遇涉訟官斷無從惟有私鬪而已甚至釀成命案仇殺相尋是地畝一日不清即爭端一日不息此亟宜整頓者四也五廳糧地綏遠米地雜出土默特一旗中自來隱地匿糧一經官查皆藉蒙產爲影射以致兵米不繼

國課多虧其弊莫可窮究公田報棄不聞一復其初缺地暗侵其勢漸歸於

盡彼則兩混此則兩妨蒙地一清則此疆彼界不辨自明既尺土不得私自正賦無從隱漏此又一舉兩得之道也游牧本蒙人生計從前不知耕作者以地租於客民仍自留牧場今牧業全廢牧地亦無卽欲自務躬耕尙須驅轉他租至舍己芸人之日雖愚弱亦積不能平以數百里膏腴而不能自食其利以千萬人游手而不能自安其生當貧累未極之時官力猶得而制之所慮者在數十年後耳此又思患預防之心也在該旗當年率土來歸蒙

恩賞居其地乃以

朝廷之實惠竟便痞棍之私圖默奪潛移致令地非其有固由不善自理亦以任斯土者漠視其地與人上則疾苦罔聞下則顛連無告卽有不忍坐視者終以旗漢畛域不敢舉辦亦並不敢

奏聞奴才貽穀督墾頻年開通蒙部東之察哈爾兩翼旣已疆理井然西之伊克昭七旗亦將經營就緒獨此土默特一旗如絲團結雜錯其間蒙窮

固可矜而以地大物博之區不能與左界右疆結成一塊完土撫茲沃壤
惋惜殊深夫爲政必自經界始經界不正而欲人人各守己業耕鑿相安
此必不能之勢也即以各廳一境論既多迷失無所屬之田又結蒙漢不
相安之患誰無覬覦豈盡善良而欲民不爭政不擾又豈可得乎況其全
旗官民經年祈籲若不及時經治是痛癢無關直以化外視之既拂輿情
益深痼疾後雖有屬鵠難爲醫也現聞晉省派員出口分赴各廳清理糧
賦奴才等亦擬遴派委員附同一律辦理惟綏與晉同時並舉斯蒙地糧
地不至彼此互推藉詞隱匿其如何辦法總期蒙地不失漢民不擾寬以
既往兩持其平遇有蒙漢交涉事件當隨時商同山西撫臣妥爲籌辦所
有土默特官兵失業苦累萬分現擬清理地畝緣由合恭摺具陳伏乞

皇太后

皇上聖鑒訓示謹

奏三月初九日奉

硃批著照所請片併發欽此

再口外歸薩托和清五廳城鎮皆就土默特地面建設昔年蒙俗渾噩所有官兵各分世產皆不善自經營任客民寄居或建築田廬或開設鋪戶但歲得地基之常租並不知其地在何處與夫四至廣狹年復一年遂至弱爲強脇愚爲智欺非侵佔卽隱藏愈牽混愈迷失初則地多而漸至於少久亦有地而全歸於無至有祖父租典於漢民約有年限至其子孫不知收產且不知祖父之名者此則無心遺失彼則有意隱匿如此情事尤多就歸化一城論公產十之二三乃比戶數萬家歲租無幾頻年報市房傾塌租日就減其實填城溢郭並無一處空閒蒙旗兵官無餉無俸衙署又無經費全指各項租產接濟當差辦公若竟聽民戶行欺蒙業半失官差舞弊公用日虧將使市廛全無反客爲主後之貧累更不知伊於胡底以地大物博之旗成財盡民窮之勢其業可惜其人實亦可矜疊據全旗各叅佐印稟公請整頓前來奴才等以所稟情節證以平夙見聞實有不忍坐視者查蒙地例不准賣其自立約據私典私租者豈能經官稅契以

故無案可稽一遇蒙漢爭執雖有聽訟之才亦無從判斷且有奸蒙暗訪地無業主出而冒認久爭纏訟轉累商家今一團亂絲未便聽其再結惟有以查保甲之法清理地基就已有之戶籍過而詢之其跡可尋不難一時就緒所易著手者各處就蒙地建設房間雖年久戶多房產有時而變遷地基則百年而不易但查其房間屬自何人地基屬於何姓其房地各有業主者以司印蓋契詳註冊檔仍發還令其各守己業若房有所屬而地無所屬則爲侵佔隱匿也無疑此項地基卽作公產租歸公用寬其既往由官另給新契蓋印發交原主不奪其房業如此辦理蒙業可保官產不失公用亦饒有餘資洵屬一勞永逸之計所有整理土默特地基緣由理合附片具陳伏乞

聖鑒謹

奏光緒三十一年二月二十八日附

奏於三月初九日奉

硃批覽欽此

土默特六成官地被水成災擬請分別蠲緩疏三十一年二月

竊查薩拉齊所屬各村承種土默特六成官地上年被水冲淹成災當卽飭廳查驗前據署薩拉齊同知清治署武川廳通判魏銓等會勘詳稱奉飭查得六成官地被災處所逐段履勘河東一局德潤堂等九戶被水冲刷地九頃八十畝現已成河不能復墾所有額徵正耗租銀應請一律豁免被淹成災地三百五十一頃三十畝又河西三局被淹地七百七十一頃五十畝該村等濱臨黃河地勢低窪積水三四尺不等秋稼被淹均已成災七分河東各村地勢高低不一積水深淺不等勘明被淹成災六分六百七頃八畝五分查例載被災七分者應請蠲免十分之二成災六分者地蠲免十分之一蠲餘租銀分年帶徵等語今該地戶承種地畝除冲刷成河不能復墾應請豁免外其被災七分六分之地並應徵光緒三十一年新賦租銀援照被災成案分年帶徵至民欠未完租銀應請遞緩至三十三年再行徵收以紓民力查被水各村災民現均糊口有資毋庸用籌

款撫恤所有被災地畝分數及應蠲應緩數目分晰造具清冊並加具印
勘各結詳報核辦前來查此項官地遇有被災之年係由山西巡撫統歸
災案奏明辦理此次大成地畝被水成災經文瑞咨報戶部查核在案今
奉戶部咨覆指令會同綏遠城將軍補行具奏等因准此如才貽穀覆查
無異除將薩廳冊結咨送戶部山西巡撫查核外再此案往返咨覆具奏
運合併陳明理合恭摺具陳伏乞

皇太后

皇上聖鑒敕部覈覆施行謹

奏三月初十日奉

硃批戶部知道欽此

光緒三十一年三月十五日具

奏爲携印親赴後套履勘西盟墾務情形恭報起程日期仰祈

聖鑒事竊查伊克昭七旗上年一律報墾始有套匪之亂繼有黃水之災以致事多阻擱現在各旗暢行開辦達拉特則定分渠租矣杭錦則改收押荒矣郡王烏審札薩則請領部照報効歲租矣其鄂托克準噶爾亦同時丈放有應接不遑之勢凡茲百端並舉胥持周歷詳求上年奴才卽擬赴套地履勘乃河患頻仍至秋猶復漫漲周歷無從竟未前往茲當東作方始彌殷西顧之心各旗情形不同辦法亦異均非身臨其境不能損益得中且西墾地畝之精華全在杭達西路公司之資本全在渠工地恃渠爲緩急渠視地爲遠近尤須勘驗工程爲一勞永逸之計現定於三月二十七日携印起程遇有緊要文件遵例封送途次以免稽壓除俟巡視完竣將各旗之押荒租則未定者應如何酌核已定者或尙須變通再行另陳外所有携印履勘西墾恭報起程日期緣由理合恭摺具陳伏乞

皇太后

皇上聖鑒謹

奏

光緒三十一年七月二十一日具

奏爲奴才接署歸化城副都統篆務叩謝

天恩恭摺仰祈

聖鑒事竊調任青州副都統歸化城副都統文瑞因祖塋失修請假回旗修理
奏奉

上諭文瑞奏請假修墓一摺文瑞著賞假三個月歸化城副都統著貽穀兼署
欽此茲於本年七月二十日文瑞將副都統印信暨文卷等件派委署歸化
廳同知陳壽昌印務叅領蘇克精額齎交前來奴才當卽望

闕叩頭謝

恩祇領任事查歸化副都統管理土默特旗事務職有等於國高之守地無殊
於侯甸之分事似簡而正繁權雖微而實重以該旗漸染習俗日卽弱貧
生計之艱難旗務之廢弛庫儲之支絀台站之困窮近四五年較前尤甚
自非及時整頓何以除積弊而濟蒙艱惟奴才忝縮軍符籌開蒙地念茲

綏墾兩事已深顧此失彼之虞兼及歸化一城彌有綆短汲深之懼時復東馳西逐隨處經營勞難專駐一隅致多窒礙現在新任副都統悞壽遠在庫倫既一時未能到任擬即敬舉賢能懇

恩簡署以重職守除另摺具陳外所有奴才暫行接署歸化城副都統篆務日期情形理合恭摺

奏報叩謝

天恩伏乞

皇太后

皇上聖鑒謹

奏八月十二日奉

硃批知道了欽此

光緒三十一年七月二十一日具

奏爲歸化副都統篆務奴才力難兼理敬舉調墾賢員懇

恩簡署以重職守恭摺仰祈

聖鑒事竊歸化城副都統文瑞現奉

命調補青州副都統本應俟新任候壽到來再行交卸惟文瑞於未奉調缺之

先因祖塋失修請假回旗修理業奏奉

諭旨允准刻卽欽遵回旗所遺歸化副都統篆務奴才應遵

旨暫行兼理伏思奴才忝任綏城本有統轄土默特之責即文瑞在任遇有興

革變通應須商榷之事無不和衷籌辦期可相與有成茲復兼署承

恩更何敢稍形退讓惟查現在綏遠旗務全蒙墾務在在均關緊要事事有賴

經營奴才自後套履勘回城遠矚近瞻百端待理恆有顧慮不及之懼若

再益以歸化篆務彌覺竭蹶不遑兼之土默特積弊日深兵官交困前經

奴才奏請清釐該旗地畝地基並抽收鴛粟畝捐以資生計而濟要需均

蒙

恩准施行今正籌議整頓之時又值事機緊迫之際樸壽遠在庫倫到任尙需時日是歸化副都統一缺雖暫時承乏關係匪輕奴才深知兼營並顧之難敢作薦賢自代之請查歸綏兩城協恭原不乏人而或多出要差或未孚衆望一時殊無相當之員查有奴才調辦墾務之花翎分省補用知府斌儀公明勤果事事認真待下尤能寬恕前隨依克唐阿辦理奉天營務糧餉措置裕如伊克唐阿深資倚重此次調赴晉邊該員於東西蒙旗墾務隨時與奴才詳定章程妥籌辦法殫精竭慮洞中機宜其經理度支亦復絲毫不苟洵屬爲守俱優並經派赴察哈爾勘辦地案任怨任勞能謀善斷用使積年轆轤次第清釐右翼墾效之成半屬該員之力及奴才履任綏遠又當蒙旗教案吃緊之際復經派委該員逐案磋商相機因應其間索款索地屢議屢翻尤賴該員力與維持始獲和平歲事上年於全蒙教案奏結時曾經附片彙保蒙

恩交部從優議叙知該員才堪大用已在

聖明洞鑒之中現在該員總辦土默特清查土田各事於該旗利弊情形早經熟習而其人又爲蒙情所悅服若以之暫署歸化副都統缺必能勝任而愉快比來時艱日亟幹濟需人

朝廷任用羣才往往不拘成格或以下僚而躋崇秩或以文職而授武符至候補道府署副都統者近更多有仰見

聖主立賢無方無非爲地擇人之至意奴才用敢不揣冒昧推薦賢能合無仰懇

天恩俯念歸化副都統篆務綦重於樸壽未到任以前准以斌儀暫行署理以重職守之處出自

聖裁所有歸化副都統篆務奴才力難兼理敬舉調掣賢員懇

恩簡署各緣由理合恭摺具陳伏乞

皇太后

皇上聖鑒訓示謹

奏八月十二日奉

硃批著文哲琿暫行署理欽此

光緒三十一年九月初八日附片

再據杭錦旗貝子阿爾賓巴雅爾之子二等台吉阿勒坦鄂齊爾呈稱台吉有養贍地畝近來多得租項不忍私自私謹報効綏遠城購買槍銀五千兩如數呈交前來查奴才上年因綏遠常備軍改練新操急需利器奏明訂購外洋馬步快槍惟槍價需款甚多旗庫久形支絀現雖竭力挹注仍苦不敷正在續籌措集間適該台吉以前項銀兩報効洵屬深明大義裨益要公近年官民人等報効銀兩購買槍械歷經奉


旨獎勵有案今該台吉阿勒坦鄂齊爾報効綏遠槍費至五千兩之多奉上急公在蒙部尤爲難得應如何量予

恩施之處出自

聖裁除將銀兩飭令旗庫兌收歸入購槍項下存儲備用外謹附片具陳伏乞

聖鑒訓示謹

奏



光緒三十一年九月二十六日具

奏爲携印巡視伊克昭盟河南各旗恭報起程日期仰祈

聖鑒事竊奴才前以後套墾地暢行開辦胥待周歷詳勘於本年三月二十七

日親往西盟杭達各旗勘驗渠地妥議擴充於五月二十一日回綏均經

奏報在案惟奴才前所履者黃河以北之地至河南現查郡王烏審準噶

爾各旗其先後報地開墾或待濟蒙艱或備償教款均有迫不及待之勢

仍應及時周歷分飭各局員妥速租放以副蒙望而濟利源今擬於九月

二十六日携印起程遇有緊要文件飭司遵例封送途次以免稽壓除俟

履勘事竣再行奏報外所有奴才携印巡視伊克昭盟河南各旗恭報起

程日期緣由謹繕摺具陳伏乞

皇太后

皇上聖鑒謹

奏十月初八日奉

殊批知道了

再查土默特向本額設駐守官兵一百名前於光緒二十七年間經調任副都統文瑞改爲巡警兵原其酌改之初心自爲保衛地面起見乃日久生弊漸至名實不符又兼山西省於歸化廳地方另設有巡警營同處一方同辦一事此則因緣舊制彼則創闢新規土默特巡兵竟成虛設地方視爲疣贅任斯土者自視亦覺可有可無於是事未實行額多不補奴才本年八月間兼署副都統時逐加點驗按之冊籍大半虛額卽現有之兵亦多沾染嗜好課其事則有名無實查其人不惟無實亦並無名積弊已非一朝窮追諸多不便遂飭將此項兵餉一概停發暫免虛糜惟巡警所以綏靖地方蒙漢巡兵各有當盡之義務似此要政固不可聽其以無爲有亦豈能竟使因噎廢食奴才正擬酌訂規制妥籌辦法挑足精壯兵丁百名責以實行警察然後另行起支月餉適倉卒交卸未及舉行然既有此餉未便久停而警察尤爲當務之急現在新任副都統文哲珲到任後亟思整頓一切奴才卽日有巡閱伊盟各旗之行已於行前將應行釐定

大概情形詳告該副都統並札飭土默特該管各叅領妥議章程認真改革興辦務期力除舊習有裨實際此不過應行整頓之一端其餘弊端百出廢闕待舉之事尤多容俟奴才商同文哲琿次第考查分別整飭冀使蒙旗政法改觀謹附片具陳伏乞

聖鑒謹

奏十月初八日奉

硃批知道了

光緒三十一年十一月二十七日具

奏爲綏遠屯墾牛捐需用甚繁懇將收捐銀數按減折實銀核計以竟屯功而昭民信恭摺仰祈

聖鑒事竊奴才於光緒三十年二月間因綏遠城屯墾需用牛具奏請按照察哈爾歷次成案開辦牛捐集實銀三萬兩經戶部議准令按照現辦直隸山東等省賑捐章程成數辦理遵卽咨取直東等省捐章遴派委員分投開辦嗣於十一月間復因屯墾漸次擴充兼之荒歉借放籽種需款不敷請推廣展捐實銀三萬兩亦經該部議准行知轉飭遵照先後將收捐銀數捐生姓名分次咨部核獎在案茲准戶部電開牛捐原請收足六萬卽行停止現查三四次報部收數逾額至三萬七千餘兩應將原冊發還另造以符奏案等因在部臣恪守成規慎重名器自係查照向章辦理惟實在下情有不得不上陳

宸聽者查察哈爾歷辦牛捐成案均係以每牛折收實銀十四兩積成銀若干

兩所謂實銀者一兩得一兩之用非賑捐章程之所謂幾成實銀也近來各省辦理賑捐皆按十成例銀折收數目再加減折往往有報部之數名爲四成五成實祇收一成餘者原其初意蓋因捐項久成弩末饑黎又待哺孔殷且銜封等項類屬虛榮迥非實官可比不能不通融辦理以期迅速而廣招徠各省皆然亦每案皆然雖與部章稍有未符非得已也奴才初次請收實銀三萬兩原因光緒四年十九年二十六年疊次牛捐之案皆實集銀數萬兩是以擬請援照辦理原奏內已將各處捐局按減成數目再行減收情形據實陳明迨部議令照賑捐辦理實與牛捐成案迥不相同當開辦之始據直東等省送到賑捐章程皆以四成報部而附刊外辦章程則以一成二三收之奴才內計實用外核捐章深以爲難因於奏請展捐摺內將賑捐減收辦法難合之處再行聲明其所以難已於言者良以屯墾關繫八旗生計既經籌議必在實行一切房屋牛具農器籽種在在需用甚鉅而耕牛尤爲大宗第就兩翼屯墾而論地凡一千一百餘

頃每頃一牛已需牛一千一百餘頭以平價計之約需銀三萬餘兩加以八旗二十佐公認之地及奴才率領官兵所認地畝均擬一律開墾費更不費此外農具人工製辦偏覓之資尙不在內又以去年後山荒歉奏請接濟被災貧民籽種均取資於此積此數端自非實銀六萬不敷應用既經二次奏明賑捐係屬減成屯墾皆歸實用仿辦爲難各節奉部照准推廣奴才愚以爲准令照賑捐減折之數收足兩次所請實用之數當飭各員推廣辦理今接部電倉皇不知所措雖已飛文停止惟捐項本屬急需前此早已隨收隨用現在榛莽已開牛具大備田廬廣起籽種在民按迹可稽昭人耳目若必勉遵部示造冊另送則已收之款項既難發還已報之捐生更難失信至於議行之政若因此遵停一實功虧尤所深惜方今朝廷力行新政務除禁忌一切盡從其實臣子之對

君父尤貴勿欺似不宜蹈故襲常徒爲掩耳盜鈴之舉才奴本請實捐集六萬兩今例章限制如此屯墾需用又如此若內虧其數而外襲其名勢將使

承行之人苟且牽就於用款造冊時飾爲名目強令相符實用而虛收必至虛收而虛報甚非

聖主實事求是之意而況兵食攸關之政與窮困待救之民萬非此五六萬金之虛數所能濟用此項牛捐以四成例銀計之固屬逾額其實尙未足前奏三萬兩之數卽以借放籽種一項論今秋歲又告歉非獨先借之糧難責令一律償還察看情形來春仍不能不籌接濟此款不動

國帑而立拯農艱有其舉之萬難中輟種種急不能待情形卽實能集捐六萬毫無欠缺分布尙慮不敷况號稱鉅萬數則暗減幾倍不止才奴碌碌之性率以實心行實政辦一事務期必成志之無他不復瞻前顧後遂以迂拙誤會致干部駁然此捐可停繳款不易所收雖溢實項在屯當此進退維谷之時惟有仰懇

聖慈鑒奴才愚衷之苦念窮邊集款之難要政垂成兵民可憫准將牛捐收數按減折實銀核計俾經費稍能寬裕於籌邊裨益良多抑或准將現收之

捐儘數截止俾得昭信於捐生亦

聖恩之寬大也迫切瀝陳不勝悚惶待

命之至除咨覆戶部外理合恭摺具陳伏乞


皇太后

皇上聖鑒訓示謹

奏於光緒三十一年十一月二十七日由驛具

奏於十二月十一日接奉

硃批戶部議奏欽此



奏爲添購新式步槍以儲兵備而固邊防恭摺仰祈

聖鑒事竊奴才前向秦來信義各洋行分購七密粒五嚮毛瑟新式馬步快槍共一千一百六十枝並土默特搭購二百四十枝均經先後奏明已於上年派員驗收運解到綏荒城有此利器聊壯聲威而奴才上承練兵之

明詔下顧西北之巖疆猶無日不以邊備空虛爲慮綏遠地處漠南秦晉直倚爲藩籬庫烏科特爲堂奧大青山狼山以後廣袤萬餘里平沙無垠合庫烏科三處邊防尙不足一營之數然皆差站雜役有兵之名其實無一兵也以此地勢當此時艱不獨外患堪虞卽內藩亦不可無所鎮懾既知履霜之漸不能不爲未雨之防全局統籌口外備緩急之需非一鎮不足以資策應少亦須備練一協但晉省方自顧不暇何能籌及綏遠綏自爲籌竭慮殫精稍寬時日以常年正餉之所出量旗署棉力之可行將來能練一標足矣願駐防編伍頃刻能成邊徼置槍經年難到若待成軍之後用武之時始行議購將以兵待械無事則徒糜餉項有事則大誤戎機

奴才


既持必練二標之議其應用軍械自應先期籌備但目此情形不能無備限於財力又不敢多備因於上年十月間復委知府斌儀赴津續向信義洋行定購一千九百零四支最新式毛瑟步槍四百枝每枝隨帶皮帶背帶等件並無煙子母一千粒計每分價值行平化寶銀七十兩零五錢共合二萬八千二百兩從前所購槍械措款已極艱難剜肉補瘡至今孔尙未復此次更須於無中生有竭全力以圖之急固恥難堪緩或集裘可望乃與洋行議定合同先不交定銀限九個月槍到驗收再行如數付價或備價少有不敷而歸期尙能展緩公家辦事且爭此數月騰挪緩遠籌款之難於茲益見方今新政日多邊備尤要若皆待財力充足而後興辦必致事無一舉政無一行此奴才所以不敢因噎廢食臨渴掘井也所有添購步槍需用各項擬仍由綏自籌不動正款應請照迭次成案免其造報除將合同鈔錄咨送陸軍部外務部暨分咨查照外理合恭摺具陳伏

乞

皇太后

皇上聖鑒謹

奏



三十一年十二月初四日具奏附

再奴才前因綏遠城常備軍改練新操需用新式快槍籌款向德商泰來洋行訂購七密粒五響毛瑟步槍四百枝馬槍二百一十枝並土默特步槍二百枝馬槍四十枝及附購子彈等件以備應用於上年十一月片附具

奏在案本年春間派員赴津驗收其原帶及附購子彈共一百一十萬粒業經陸續轉運到綏惟所購槍枝間有受潮鏽澀及與原定碼號不符等情未便含糊接收已飭將步槍除挑留百枝外餘均駁退另換馬槍全數退還計扣回銀六千一百四十七兩五錢另向別行購買查該軍需械孔殷此項槍枝即使全數如期運回尙覺不敷分撥既經退換輾轉需時軍無利器緩急將何所恃復由奴才派委綏遠城協領新授伊犁額魯特領隊大臣榮昌赴津續向德商信義洋行訂購七密粒五響毛瑟步槍三百枝馬槍四百六十枝土默特搭購馬槍四十枝以期迅速運回應用惟是口

外地方平沙無垠絕少險阻遇有兵事就現有兵力槍隊以之追逐游擊
尙覺取攜便易馳騁裕如若用之攻堅擊遠則非添置礮位斷難獲收效
益綏遠轄境與甯夏庫倫烏科等處轄境毗連沿邊要地數千里內並無
一旅礮隊若沿疆偶有騷動何以爲防守之資奴才日夕思維實勝焦慮
晉省雖練有礮隊數營然以相距過遠艱於運轉且亦呼應不靈上年套
匪之役設非奴才前經截留升任大同鎮總兵劉光才莫克森洋礮四尊
運赴前敵則燎原之勢未易刻期撲滅明證昭然尤足爲鑒現雖庫儲奇
窘亦不敢置此事爲緩圖復飭榮昌在京面商比國使臣葛飛業代購比
國考克利爾廠所造新式四十七米利邁達口徑過山鋼礮六尊計足一
隊之用配齊子彈訂立合同限十箇月運到交收邊城得此利器頗足建
威銷萌惟惜籌款艱難窮於羅掘未克廣爲儲備斯則限於財力無可如
何不能不期待異日之擴增也計此次續購步槍每枝合銀二十六兩五
錢馬槍每枝合銀二十六兩共槍價銀一萬九千九百一十兩正鋼礮連

礮車輪馬鞍彈箱及一切應用零件每尊合銀二千八百六十兩正共銀價銀一萬七千一百六十兩正無煙開花彈一千二百顆連引火每顆合銀六兩四錢三分五釐無煙子母彈六百顆連漫藥嘴每顆合銀五兩七錢二分共子彈價銀一萬一千一百五十四兩正除土默特應付槍價另計外統共合銀四萬八千二百二十四兩正除將杭錦旗貝子阿爾賓巴雅爾前次報効綏遠購械銀五千兩儘數撥用外復由奴才將東路公司入股罰款所得餘利暨綏遠修理城垣支存銀兩一并全數撥用計銀一萬三千餘兩並綏遠官錢局今年所獲餘利三千兩此外由奴才將節年應得公費節省湊集并飭綏遠官弁均各量力湊捐及裁減各處冗費核計兩年以來共湊集銀九千數百兩尙覺不敷甚鉅所幸末次交款之期係在明年夏季時日尙寬應由奴才隨時設法以預爲騰挪者先其當務之急仍以力從節省者措其有用之錢涓滴歸之寸銖積之窮邊籌款如是而已迭次購械各款均係由綏遠自籌并未動用庫款仍請免其造冊

報銷所有續購槍礮子彈緣由除將合同抄錄咨呈練兵處外務部暨分
咨查照外理合附片具陳伏乞

聖鑒謹

奏光緒三十一年十二月初四日具

奏本月十六日奉

硃批該衙門知道欽此

光緒三十一年十二月初六日具

奏爲綏遠城官兵貼補米價擬請定立限制以節度支而規久遠恭摺仰祈
聖鑒事竊查綏遠城官兵應支月米因庫款不充月欠積久改以一半本色一
半折銀支放嗣因各廳徵解本色日久滋弊民以爲病光緒九年間經升
山西撫臣張之洞奏准將各廳應徵本色改徵折銀除扣留各廳補平火
耗及辦公經費外以每石一兩三錢解交糧餉同知衙門買米發放如遇
年荒穀貴正價不敷再由山西藩庫存運腳請領貼補當其改章之始兵
食既足民困亦紓立法至爲美善第所定價值係就當時糧價酌核惟時
口內外年歲順成所定價銀已足敷用自光緒十八年以後比歲不登米
價騰貴有時每米一倉石竟長至四兩八錢縱遇平減之時亦遠過於正
價此項兵米爲計口授食之需歷任將軍目都官兵困苦情形不能不通
融挹注每遇放米之期或挪借於他項庫儲或取用於藩庫脚價而脚價
銀兩近已漸次用罄數年以來採買米石隨時奏請貼價移緩就急已將

庫儲雜款羅掘一空叔才二十九年到任後爲之通盤熟籌不禁長顧却慮祇以軍食孔急此兩年又值歉收暫循舊章奏明動用他款貼價又爲之催解運脚復清釐各款撙節羨餘以資應付而心未嘗不竊竊憂之查從前貼補正價取用之項除運脚銀兩外惟仰給於大青山後空閑廠地及歸薩清托和五廳額徵土默特廠地租銀豐甯兩廳撥補托和豁缺兵米銀兩然總計之不過八千餘兩而貼補米價以上年及本年用過銀數計之均在一萬數千兩之多再四思維與其愈久愈虧轉以貼價難籌致牽正價不能及時發放常悞兵食孰若明定限制俾易貼補放米應期在

旗兵世沐

國家參養之恩當此庫款萬難少有人心靡不甘心茹苦况此實爲久長之計擬自光緒三十二年正月爲始嗣後採買米石於正價外貼補價銀不得過於正價一兩三錢之數雖現時米價已在三兩以上而年荒穀貴不能歲歲皆然有此酌中不易之規人心自力歸於省嗇而亟自爲謀當平

價時二兩上下儘足採購縱遇異常災歉卽酌量加增亦不至漫無節制
自此兵已久困年復屢荒奴才煦煦性成豈甘爲忍人而不顧但綏庫督
庫同屬艱難在此旣已罄積穀之藏在彼更難爲發棠之請勢已至此卽
欲不如此辦理亦實有所不能否則就兩年用過貼價及本年歲收現在
米價論之預計來年米必倍昂買米六個月再加閏月放米始將用至四
萬餘兩旣不能籌款於省省復不能取資於部庫以有著之正價待無著
貼價無論急何能待卽久待亦仍無著本擬奏請規復收米舊制仍由各
廳收米解交綏廳以原收者原放冀不兩虧但查升任撫臣張之洞原奏
係因民戶交米擾累難堪乃請改米爲價今欲紓兵苦仍復累民殊失
朝廷一視同仁之意且各廳糧地近更報廢多多延未實查而口外年屢歉收
徵米尤匪易事計無所出惟有明定限制庶可敷衍持久定章之後卽以
歲積運脚大青山後藏地及五廳廠地租銀豐富兩廳撥補豁缺兵米銀
兩專作此項貼補米價之需以上四項共八千餘兩係常年有著之款然

按現在不過正價之章其不敷者仍有九千餘兩容由奴才設法籌款期應目前之急並防後繼之難明正放米在卽若俟籌定各款後再行請

旨已悞放期茲先如此擬辦實出於萬不得已設使不敷之款畢竟難籌或此法一行兵累益甚仍由奴才體察情形再行奏請變通以期妥善並隨時咨商山西撫臣悉心籌畫務敷貼補之資今應先將藩庫應收運米腳價截至三十一年底所欠銀數結算解清暨嚴飭各廳將應徵地租等項實力稽徵報解俾得源源接濟奴才爲兵食庫儲兩期兼顧起見是否有當理合恭摺具陳伏乞

皇太后

皇上聖鑒訓示謹

奏本月十七日奉

硃批戶部知道欽此

籌補五月兵米片

再綏遠城兵米不敷散發愆期延放積欠至五月之多而漸推漸補往往停本年本月之米追放前欠缺後彌前亂如絲結旗兵本無恆產又不能出外營謀專指月米生活放一愆期則指餉息借於鋪戶奸商遂以重利盤剝及餉到手除還舊負已無所餘以故年復一年困累至於此極現既奏明貼補米價定以限制不得過正價一兩三錢之數計一石兵米照時價已暗減分數在

國家本萬不得已而在旗兵亦無可如何然溯其困累之由實因於月米之多欠今貼價之數已限而積欠之米依然是庫儲有不虧之時而兵困無再紓之日揆諸甘苦與同之義未免第重

國帑不顧兵艱理既未安心尤不忍奴才從長籌畫擬將積欠五箇月兵米一律籌款補還於限制之中使之大霑

恩澤日後縱多茹苦目前則已飽騰所歎在此所補在彼八旗萬衆亦復何詞

惟積欠者實米也以現在時價計正貼兩款補還此五箇月自非四萬餘兩不敷縱令百計強籌究亦萬難措出奴才擬按照月折發放不過一萬一千餘兩即可還四萬餘兩米欠况年歲屢歉以還欠代賑於

國於兵兩有裨益如此變通補齊自明年正月始以後放米放折各按本月期既不愆章亦無從而亂當循序如此款擬由奏留右翼押荒四成項下提爲綏用與案亦符理合附片具陳伏乞

聖鑒謹

奏光緒三十一年十二月初六日附

奏奉

硃批戶部知道欽此

光緒三十一年十二月十二日具

奏爲續籌綏遠武備學堂經費以資接濟而勵進修恭摺仰祈

聖鑒事竊前因綏遠城武備學堂自開辦以來操練已有可觀經費並無專款
經奴才於各項公款內撙節通挪湊集銀二萬四千兩自本年正月起發
商生息於上年十二月間附奏在案伏查該學堂經調任將軍信恪奏議
創設以邊城之地留守之兵選擇雋才力開風氣其用意至爲深遠惟所
指開放八旗廠地以押荒歲租作爲常年經費望梅止渴本已難應急需
當時又因開辦無資奏由庫存兵丁本身照例坐扣馬價銀兩暫行支用
未幾馬價亦復無存初本意美法良其後乃心餘力絀奴才到任伊始卽
思力爲廣續又親見該學堂學生嚮學專勤恪遵規範非獨不染風潮之
習抑且共安堅苦之常於到堂督課時心焉憫之因於公用裁其無名而
爲該堂先其所急竭力挹注始積成前款二萬四千兩以每月商息一分
計之按年僅得二千八百八十兩之數又益以該學生本身馬甲之餉不

打成平雖薪火稍裕於前而轉瞬終虞不繼兼以派赴日本游學及咨送北洋學堂肄業學生十餘名按照各處學費章程需款尤鉅亦不能不取資於此本同杯勺况又從而分之不濟其源流亦將涸該學生等人堂三年有餘本年已逾畢業之期因管學官員暨教習等赴津購買鎗枝未回是以暫於考試尙未給予文憑現仍不懈進修爭相淬勵殊不以緩其獎勵稍介於懷奴才每月必數次蒞堂考察程度嘉其奮勉之志愈思擴其鼓舞之資查有前據杭錦旗貝子阿爾賓巴雅爾報効綏遠學堂經費五千兩城工經費五千兩經奴才奏明儲庫待用現在綏遠中學堂經費雖亦不紓尙可勉強支拄暫時無須添款且同一興學而時方向武尤以軍人資格爲先至城工業已竣功猶能節出餘資湊補購置鎗礮之用則此款更無可需擬一併移緩就急將該貝子前項報効銀共一萬兩添作武備學堂經費仍照前案發商生息自明年正月所得商息合之前籌經費息銀約有四千餘兩以普省學章比較此仍相形見絀而窮邊籌款非

易惟有以繼長增高者積漸充之將來俟廠地多放荒價暢收再照奏定
學堂章程及信恪原奏寬籌應付期與晉省一律所有添籌綏遠武備學
堂經費緣由理合恭摺具陳伏乞

皇太后

皇上聖鑒謹

奏本月二十四日奉

硃批該部知道欽此

光緒三十一年十二月十二日附片

再綏遠城武備學堂係經調任將軍信恪就綏遠書院改設而中學堂尙付闕如猶襲書院考課之舊奴才二十九年十月到任後即將書院立行停止移武備學堂於空閒旗署而以書院舊地改建中學堂另挑八旗聰穎子弟入堂選擇教習按照學堂章程分班教肄兼習清蒙洋文卽以書院常年進款改作該堂經費又由奴才倡領八旗官兵認領綏遠牧廠地三百四十餘頃俟招佃得租擴充添補於上年九月奏明在案現在該學生入堂兩年雖風氣初開程度未能深造而均篤志向學恪守規條奴才不時到堂傳集該教習學生等考其學業與之講解問難加以督勉將來可望日臻進步其經費雖未十分充裕就目前而論亦尙足敷衍應用此外復添設蒙養學堂挑選學生授以清漢各文並習練武操以備升入中學堂之選另設蒙小學堂五所擇八旗幼丁肄業此兩項學生未能驟語科學然亦於誦經體操外俾其漸通粗淺算法地理等學以植初基此項

學費籌自各旗佐雖以微乎其微而人近知向學皆爭附入統計三項學堂共有五百餘人讀書_{奴才}亦常親往考察教法尙屬認真各學生中不乏敏悟可造之材其所習洋文分數較優於清蒙文_{奴才}仍當隨時督飭教習各員加意訓迪務期多造英才堪備論秀書升之選冀副

盛世作人至意謹附片具陳伏乞

聖鑒謹

奏本月二十四日奉

硃批該部知道欽此

光緒三十一年十二月十七日具

奏爲土默特盟粟畝捐收數無多擬請留充該旗舉行要政津貼辦公以示體恤而資補助恭摺仰祈

聖鑒事竊奴才貽穀於本年四月間會同調任副都統文瑞奏請將土默特裁

種畧粟地畝仿照晉省畝捐一律試辦抽捐爲該旗練兵興學之需奉

硃批戶部議奏欽此旋經戶部議覆照准並聲稱將來收有確數仍應據實奏

報聽候撥用等因奉

旨依議欽此欽遵咨行前來奴才等當卽遴派委員前往歸薩清托和五應地

方會同各該處釐局委員分別詳細查勘將蒙古所種煙畝隨時劃出不

使稍有隱混行令遵辦去後嗣據查地委員暨釐局各員會勘冊報並詳

稱本年春夏間煙苗出土之際猝被風沙積壓雖經補種又因雨澤愆期

大半枯萎惟近水之地稍有成熟然煙漿不甚飽滿亦未能全數收割且

各蒙民因種煙迭遭風旱收成無望又曉然於重懲嚴禁之意多有於四

五月間將煙苗拔去改種五穀者此項地畝又當隨時開除總計應收畝捐不過二三成之譜查晉省章程上半年履畝稽查仍須下半年始能將捐項征收蓋其輸捐之由雖起於煙畝而捐所從出不能不借資於秋成本年雨水過遲秋糧未得及時播種閭閻困苦蒙又甚焉縱使加緊稽查終難暢旺創辦之年奴才又格外體恤出示減徵一成統共僅收蒙地畝捐錢一千五百四十四千八百二十六文此本年查勘抽收之實在情形也伏思奴才等奏請抽捐之初意原因鴉片流毒日甚法令幾窮惟有寓禁於征尙可稍遏其流於籌款亦不無小補土默特蒙古一隅之地所種罌粟與漢民相較原不過十之二三第以痼癖宜除不能於蒙獨恕而困苦之旗辦公無費又惟此可以取償在部臣亦謂蒙旗耕牧爲生

朝廷不利其租稅祇慮其廣種罌粟化外逃捐是奴才等挽積習籌經費並行不悖之議部臣早已深識其原其行令報部候撥者亦將以蒙出之款仍

歸蒙用猶是

朝廷不利其租稅之心不過使數有可稽思出自

上也奴才等職任籌邊目覩此窮蒙之可憫要政之當興公費之無從出有不忍不上瀆

宸聰者近來百度維新土黑特雖屬僻陋在夷而別出於藩封附庸於晉鄙相觀而善豈能政教獨殊奴才貽穀自到將軍任後將土默特常備軍營制餉章等爲之力求整頓近復擬照綏遠城一律創設蒙小學堂漸化椎髻此外行警察勸工藝一切待舉之政尙多無如生計艱難既非若東南殷阜之區可集鉅款於本省並非若甘新邊地之餉尙能受協於鄰疆祇此勺水蹶浮仍供本地之用猶必涓滴儲之奴才錙銖惜之奴才貽穀到邊四年奴才文哲瑾生長於此親見土默特官無廉俸兵無餉精有官至叅佐領而仍敝衣糞食者兵丁更無論矣以言治理則宜修以言庫藏則如洗不得已而無中生有議抽煙畝養贍之地竟與賦役之地同科使非窮無復之其官若兵何至忍而出此現在甫經試辦又值歉歲收數既屬寥寥卽

將來能否暢收亦未敢操券以奴才等之愚縱使徵收盈餘能於辦理度
政之外稍有積蓄時事如此蒙困如此度亦

聖朝軫念邊陲無恤臣僕之仁恩所未忍概爲提取者也合無仰懇

天恩俯准仍照奴才等原奏將土默特所收罌粟畝捐留爲該旗練兵興學之
資並津貼各官辦公經費出自逾格

鴻慈如蒙

俞允奴才等卽欽遵辦理仍照章將每年徵收實數於年終奏咨查考以防流
弊所有土默特畝捐擬請留辦該旗要公緣由理合恭摺具陳伏乞

皇太后

皇上聖鑒訓示謹

奏

光緒三十二年三月初七日具

奏爲綏遠兵米改定限制貼價不敷擬請截留減平銀兩以資補助而期經久恭摺仰祈

聖鑒事竊查前因綏遠城官兵應支月米貼價太昂庫款無從籌措經奴才等

於上年十二月

奏定限制請自本年正月爲始嗣後採買米石正價外貼補價銀不得過於正價三兩三錢之數定章之後卽以歲積運脚大青山後及五廳廠地租銀撥補豁缺米銀專作貼補米價之需以上四項共八千餘兩係常年有著之款其不敷者仍有九千餘兩聲明由奴才設法籌款敷貼價之資奉

硃批戶部知道欽此欽遵在案伏查此項貼價爲常年兵食所需必須預計續籌方免臨時有悞惟現在處處帑項同一空虛既不敢望晉省之發棠復不能煩司農之仰屋奴才再四籌畫惟有就八旗節出之款仍以補八旗

不足之用似於兵食庫儲兩有裨益卷查光緒二十四年七月間奉准部
文加扣六分減平一項綏遠八旗官兵應領俸餉米折等項每年應扣六
分減平銀一萬零八九百兩不等向係由綏遠同知交省解部之項以此
添補貼價計可有盈無絀在部庫少此解款不過捐涓滴之微而邊域得
此的款即可收飽騰之效合無仰懇

天恩俯念官兵困苦准將此項減平儘數截留彌補購米貼價俾歸久遠而應
急需除咨戶部晉撫查照外理合恭摺具陳伏乞

皇太后

皇上聖鑒訓示遵行謹

奏茲於三月二十五日接奉

硃批戶部知道欽此

光緒三十二年四月初十日具

奏爲土默特叅領特勢詐財苦累蒙屬擬請先行革職歸案審訊恭摺仰祈
聖鑒事竊維土默特政體日壞蒙計日艱爭地爭財訟多於民詞而案難以理
斷其弊在無訟不有人唆尤多出於叅佐各官在聽訟者已曲意瞻徇在
唆訟者尙多方挾制故訟案歲至百餘起迄無一案能結奴才貽穀有統
轄該旗之責軍綏後僅將營制台務釐稅庫儲諸大端漸次整頓獨於一
切詞訟未能一一悉心經理固副都統責有攸歸亦奴才力有未逮奴才
文瑞自上年抵任每於接見旗屬各員無不留心考察並隨時勗以清潔
自愛正會商籌加公費俾養廉隅乃有叅領福森泰恃勢欺凌詐財唆訟
據該屬已故世管佐領福克津之妻呈控該叅領勒逼該氏改節各情疊
派戶兵兩司傳訊均以挾制迫之迴避嗣經奴才文瑞傳集面訊暨一應
人證該叅領雖認贓不諱仍恃符狡展正在約辦間復據該屬下領僅七
十二等聯名呈控該叅領疊次勒指屬下地約多張索贓多款業已取入

現復苦逼不休實屬無力支應等情前來奴才等伏思土默特蒙業全失
生路已無該參領以蒙治蒙宜如何格外撫恤乃自殘族類肆行剝削所
屬無男婦均敢怒而不敢言一有挺險伸懇遂至一控百隨其平日虐加
苦累令人萬難隱忍者已可概見似此目無法紀形同無賴之員若不從
嚴查辦何以儆官邪而蘇蒙困相應請

旨將參領福森泰先行革職以便飭交歸化廳同知會同蒙員審訊按例擬辦
所有參領恃勢詐財請革職歸案審辦緣由理合恭摺具陳伏乞

皇太后

皇上聖鑒訓示再奴才貽穀前因感冒觸發舊疾請假一箇月旋又續假二十
日現已調治尅痊遵卽銷假合併陳明謹

奏茲於四月二十三日接奉

硃批著照所請該衙門知道欽此

再查歸化城土默特蒙古向以耕牧爲生

國初時各有戶口地畝得食屯租該旗官兵等藉資養贍迄今二百餘年漢民租墾寄居蒙地漸促失業者多生計艱難已非一日兼以官兵皆無俸餉其廉靜守法者或因公賠累其居心貪鄙者不免因緣爲奸奴才等到任後詳加體察非籌給津貼俾得稍資補助勢難責其潔已奉公查該旗向在大青山後設有卡倫原爲保護往來商旅刻下山後一帶牧地開墾村落漸密業經添設武川廳治復禁有口外續備軍綏遠城亦有防駐卡倫官兵隨時巡邏足資保衛土默特卡倫已成虛設此項卡倫盤費向由歸化廳經徵土默特生息項下照案支發近因該廳歷年積欠其支發之款亦未盡作卡倫正用奴才等公同商酌與其循例虛糜不如改歸實濟已飭自上年十月停放擬請將此項卡倫盤費每年約計銀三千四百兩內留將軍衙門辦理土默特一切公事經費二百兩續添副都統公費四百兩餘分作各處當差參佐驍騎校前鋒校各官及各項當差兵丁津貼之

需如此一轉移間各官兵等必當漸生感奮遇有差遺亦可責以廉隅於政體不無裨益如蒙

俞允卽將該官兵津貼數目先行造冊咨部備案俟每歲年底再行報銷一面嚴飭歸化廳徵新催舊毋任拖欠奴才等爲整頓蒙旗政治起見是否有當謹合詞附片具陳伏乞

聖鑒訓示謹

奏三十二年四月初十日附

奏本月二十三日奉

硃批著照所請該衙門知道欽此

光緒三十二年四月十一日具

奏爲綏遠年又荒旱八旗兵丁困苦不支現已籌款購糧預備賑撫恭摺仰
祈

聖鑒事竊查歸綏各廳地當晉省邊境民情貧困素鮮蓋藏一遇荒年輒至道
殣相望而八旗兵丁專恃錢糧不能別謀生計更無儲蓄之可言其情形
尤爲艱窘奴才到任以來目覩心惻每思坐食待哺不可以久因變通舊
制掃除積習開廠地以教之屯墾創習藝以教之工作勸商業以教之營
謀而又購運油煤採買鹽米減價放給以紓其日用之資嚴禁吸烟刀戒
服用侈靡革除攤扣陋規以杜其耗財之路凡此經營補救無非願旗兵
生機漸闢貧弱漸蘇顧人事能勉爲而天時終無可恃自三十年三十一
年邊廳附近一帶雨遲霜早比歲不登糧價日昂增至倍蓰溯自奉減成
減平之令該兵丁等所領月餉本已遞虧矧值兩年荒歉之餘平時可購
糧兩斗者此時不能一斗平時可餬口兩人者此時不敷一人而貼補米

價酌定限制則又因經久之計迫於無可如何至於閑散向不謀生專待
選甲久已受害於無形至是而益無生路入春以來異常亢旱現節已立
夏猶未得雨郊原一覽不見新苗正當青黃不接之時無復耕種得禾之
望絳麥已矣就令月內渥沛甘霖勉可播種幸轉歉爲豐穀賤亦在秋後
此數月何以爲生近日四鄉流亡覓食者于于而來絡繹於道奴才權限
所及不能濟衆博施使遍野嗷鴻皆得安集顧此日與衆處視同家人父
子之兵丁亦坐視待斃而不早爲之所是直忍入而已矣惟綏庫如洗籌
備無從目茲岌岌之情祇有從旁挹注已在東路公司借銀二萬兩赴他
屬糧價平減之處購買各項糧石轉運濟荒現已派委員分投採買源源
起運到綏後擬於月折月米之外外加放兩月兵米俾資接濟按現購定價
仍作爲兵丁暫借一俟年豐物阜兵力漸舒卽由月放餉米內分月帶扣
歸還公司若竟旱歉依然尤須寬爲籌賑此項借款卽以該公司官得餘
利劃抵免其扣還尤屬

天恩浩蕩其閑散以及孤寡千餘戶則於如才到任後所積穀米六千石內提
放賑恤如此辦理庶萬口嗷嗷足可支持數月所祝天佑軍民及時澤下
雖遲東作猶望西成非惟邊疆之幸卽墾務亦得所假手也所有籌款購
糧預備賑撫緣由是否有當理合恭摺具陳伏乞

皇太后

皇上聖鑒訓示謹

奏茲於四月二十二日接奉

硃批戶部知道欽此

This image shows a blank ledger page with 13 vertical columns. A horizontal line is drawn across the top of the page, creating a header space. The columns are of varying widths, with the two outermost columns being the widest. The page is otherwise empty of any text or markings.

光緒三十二年四月十一日具

奏爲綏遠城常備軍按照定制挑足一營改名陸軍並變通餉章暫行支給
津貼恭摺仰祈

聖鑒事竊查綏遠城常備軍前於光緒二十七年間經調任將軍信恪奏請在
八旗各項兵丁內選其身體強壯者三百名均補馬甲之餉延致教習改
練新操並將本城舊支步隊官兵每年津貼七千餘兩歸入該軍以須養
贍教練一年期滿改爲續備另選三百名充補常備兵迭相更代歲以爲
常常時係因前無餉項可籌姑作速成普練之望且其立軍時在練兵處
奏定陸軍營制以前原係暫行章程不能垂爲經久奴才到任後體察情
形亟思設法整頓別值

朝廷振興武備各處陸軍規制無不遵照練兵處新章改訂務求畫一整齊綏
遠爲西北屏藩彈壓巡防在在悉資兵力卽不能如各行省之合爲軍鎮
成爲協標亦斷不可不足一營之數奴才前已將原設之三百人隨時練

擇疊次更換必求年歲身材合格真無嗜好習氣者方准入選茲復傳集八旗各項兵丁親赴校場逐加選驗續挑新兵二百零四名各項兵三十名將管帶督隊各官員數正副目兵名數及號兵護兵匠目等悉按奏定陸軍營制更正遵委充補編爲一營改名陸軍揀派花翎守備北洋武備學生胡恩光爲該營管帶官此項兵丁除已補馬甲者皆仍其舊其未補者遇有馬甲缺出一律先儘坐補至應支官薪兵餉若照陸軍定章開支每月本需三千餘兩按年即需三萬七八千兩綏城地當邊徼非若各省有地丁釐稅可以取給一旦增此鉅款更覺挹注無從奴才通盤計議除前項例支津貼由晉省每年請領銀七千三百五十兩此外則惟綏遠同知每年撥解叩留減平銀三千五百五十七兩共祇一萬九百餘兩尙不足定章三分之一再四籌畫惟有將管帶督操官照章支給正薪該營應需公費減支爲每月八十兩排長司務長各員分別酌給津貼正副目兵等各就其馬甲底餉外加津貼一兩五錢約計無間常年不扣小建該

官兵薪餉共需銀一萬三千餘兩尚不敷銀二千四百兩由奴才飭在綏遠應分豐甯等廳四廳另租項下動支如再不敷卽由官錢局暫借俟收廠押荒收數暢旺時再行歸補其每年應製軍衣帽靴之需不在此數查放餉平兌該軍向按歸化市平而各省則均以新湘平發給奴才酌中定擬所有各官兵應支薪餉及公費等項統按湘平發給庶於節省之中仍寓體恤之意此項平餘銀兩擬另款存儲備添置軍衣之用又查有八旗庫儲棉甲自乾隆初迄今垂二百年從未動用迭經派員詳查大半虧朽擬揀其未全霉爛者變價改製軍衣凡此皆限於餉項之支絀遂爲此酌劑之權宜邊城籌款艱難於斯可見且以各兵甲餉津貼併計似較各省陸軍兵餉有盈無絀但旗兵底餉原以贍養其家及其身所取資者僅有此一兩五錢則似多而實仍少目前餉源難繼計惟如此通變後如款項充裕軍制能與各省一律尙擬按名加添俾其騰飽至陸軍兵例應三年出伍退充續備惟綏城兵皆旗籍取材太隘選舉較難擬請滿三年後如

察其技藝精嫻年歲尙能及格者仍酌留充陸軍其不合格者卽行退換
此次所設號兵護兵較定章互有添減軍醫槍匠備補兵伙夫等現均未
設亦爲節省經費起見如遇有行軍之事自宜照章添設並將官兵薪餉
酌加以應緩急除將現擬該軍營制暨官兵薪津公費數目另繕清單並
咨明練兵處戶部兵部查照外所有緩遠城陸軍挑足一營並變通餉章
暫支津貼緣由謹會同歸化城副都統文哲輝恭摺具陳伏乞

皇太后

皇上聖鑒訓示謹

奏茲於四月二十三日接奉

硃批該衙門知道單併發欽此

光緒三十二年閏四月初七日具

奏爲據情代奏恭摺仰祈

聖鑒事竊據花翎副都統銜新授伊犁額魯特領隊大臣榮昌呈稱竊榮昌前於上年秋間在綏遠城協領任內奉派赴京津購買軍械便道赴河間隨觀秋操旋於十一月十三日恭奉

上諭著賞給副都統銜作爲伊犁額魯特領隊大臣馳驛前往欽此十五日謝恩二十四日請

訓並奏明請假兩個月回綏交納軍械假滿請由蒙古台站就近馳赴新任面奉

諭旨允准欽遵在案茲已假期屆滿接奉兵部勘合照驗等件飭由山西陝西甘肅等省驛站行走在部中自係循照成案辦理惟榮昌前奏請假滿由台站赴任業蒙

俞允此次接奉部文仍案舊章進退傍徨莫能自決此處距伊犁遠在萬里就

近由蒙古台站前往兩月餘可到若再繞赴內地驛台行走非半年不能到任誠恐遲誤限期有違

恩旨咎戾滋大應否仍遵前

旨由蒙古台站赴任之處呈請代奏候

旨遵行等情前來查該領隊大臣上年經奴才派赴京津購運快槍等件旋因洋行交到槍枝查與原訂合同式樣號碼多有不符經該大臣逐件揀驗駁斥退換改立合同正在辦理間奉

命補授領隊大臣因係往訂購之員必須親身回綏一手經理當於奏明回綏後將退換槍枝換立合同各事料理清楚假期已滿例應起程赴任惟現准兵部行文及所發照驗仍照成案飭由山西平定州按站前往查綏遠已入蒙古台站若由綏城繞赴平定州再按內地驛站前進與由蒙古台站逕赴伊犁遠近大相懸殊且該大臣前次既面奉有由台站赴任

諭旨可否仍准遵

旨由台站馳赴新任之處伏候

命下轉飭遵行理合據情代

奏恭摺具陳伏乞

皇太后

皇上聖鑒訓示謹

奏本月十八日奉

硃批著照所請該衙門知道欽此



奏爲土默特停支巡警兵餉銀請移作陸軍添兵加餉武備學生津貼蒙小學堂經費恭摺仰祈

聖鑒事竊查歸化城土默特旗向設有巡警兵一百名每歲額支餉銀三千兩嗣因日久生弊名實不符經奴才貽穀於上年九月間奏請將此項兵餉一概暫行停發另行妥籌辦法奉

旨允准在案竊思巡警之設固所以保衛閭閻第土默特地方久爲晉邊各廳所寄治近年歸化城設有山西巡警營綏遠城復經奴才貽穀添設巡警兵分任保安足資守望土默特事同疢贅款更虛糜奴才等公同籌商擬省無名之需移資當務之急查該旗常備兵本係三百名以餉項不敷前經奴才貽穀會同調任副都統文瑞奏改爲二百名新舊相代更番訓練惟時在三十年八月練兵處奏定新章以前一切規制未能悉合現在各省常備軍均已遵章改爲陸軍卽綏遠亦已挑足陸軍一營土默特風氣

晚開壯丁較少身材年歲及格殊難兼以瘠苦蒙旗餉源無出其不能與他處一律勢實限之奴才等因地制宜擬請將該旗常備軍改名陸軍暫按一營減半設爲兩隊先行添募目兵二十名俾練隊分合足敷因應而無牽制該兵原餉每名月支銀三兩六錢今擬每名月加銀四錢與新添兵二十名均以每月四兩開支計無開常年新舊兵添餉共需銀一千九百二十兩卽以停發巡警餉銀移入二千兩作爲的款除添餉外餘多銀八十兩另款積儲留備閏年加放月餉及該軍小有修補之需至武備學生所以儲軍入資格該旗力有未逮勢難專建學堂而振武所關亦不能竟無其選現擬就土默特弁兵中挑選年歲合格文理粗通之學生十名附入綏遠城陸軍學堂隨同練習一切課程每名月給津貼銀四兩每年需銀四百八十兩加以常年置辦操衣雜費等項約計銀一百二十兩共需銀六百兩亦由停發巡警餉銀項下動支計前項餉銀尙餘銀四百兩擬儘數移入新建蒙小學堂充作經費仍有不敷由奴才等設法籌款補

足並將分支津貼數目另片陳明以上數端事在當行而款難猝致惟有移緩就急挹彼注茲以節之兵精者仍用之講武名義既不相背取攜亦無待他求其捉襟見肘之形固爲當時所笑而剜肉醫瘡之苦必爲聖慮所矜奴才等惟有將該旗應辦事宜極力籌畫整頓冀興自然之利以開不匱之源庶能次第擴充上副


國家訓俗型方至意所有土默特停支巡警兵餉銀分作陸軍加餉學生津貼學堂經費各緣由謹合詞恭摺具陳伏乞

皇太后

皇上聖鑒訓示謹

奏本月十五日奉

硃批該衙門知道片併發欽此



再土默特旗地處邊城政沿蒙古人情惟魯絃誦寂然甚至有身為職官而尚不識字者奴才等心焉憫之因擬仿照綏遠城一律創設蒙小學堂曾於上年九月奏陳在案惟開辦之初不獨經費難籌卽學生亦不能多得現就歸化城內擇地建立土默特蒙小學堂一所先行額設學生四十名延致教習分授滿蒙漢文及淺近教科之學計監督一員月給津貼銀五兩司事一員月給銀三兩漢教習一員月給銀十二兩滿蒙教習一員月給銀七兩每年共銀三百二十四兩學生四十名每名月給津貼銀一兩二錢每年共銀五百七十六兩統共需銀九百兩除在停發巡警餉銀項下撥給銀四百兩外查有補修軍器一項每年例支錢八百千現在槍械業已新購製辦操衣靴帽之費亦已另籌此款儘可力從撙節擬酌留陸軍補修軍器錢二百千已足敷用下餘錢六百千約易銀五百兩合之前項銀四百兩共湊成九百兩盡作蒙小學堂按年經費之需至購買書籍及常年雜費等項暫由該員生等自籌俟將來款項稍充程度稍進仍

當增廣學生額數加添津貼銀數並由堂購置書籍及應用各物以拓規模謹附片陳明伏乞

聖鑒訓示謹

奏本月十五日奉

硃批覽欽此

奏爲驍騎校年逾六旬舊證復發恐悞差操呈請休致恭摺仰祈

聖鑒事竊據鑲黃正白二旗滿洲協領普祥轉據正白旗滿洲驍騎校薩拉哈本呈稱現年六十五歲食俸餉五十年咸豐年間跟隨副都統桂成出征山東一帶打仗奮勉屢次獲勝賞給六品頂戴同治元年派往包鎮沿河一帶防堵繼在科布多軍營差委光緒二年烏魯木齊回逆竄擾沙札蓋等處派隊迎勦獲勝案內經科布多大臣等奏保以驍騎校儘先卽補旋於七年間期滿回綏於十年三月間補授正白旗滿洲驍騎校經部核准註冊在案茲因前在軍營染受潮溼舊證復發延醫調治一時難望就痊當此改修新政需員之際曷敢以病軀戀棧致悞差操懇請原品休致等情當飭協領普祥前往查驗屬實加結呈報前來奴才等覆核無異相應請

旨俯准驍騎校薩拉哈本以原品休致俾資調養查綏遠城佐領雅爾哈防禦

春林因年邁有出征打仗勞績前經奴才等奏蒙

恩賞全俸在案此次薩拉哈本亦曾經出征打仗著有微勞可否賞給全俸之處出自逾格

鴻慈非奴才所敢擅擬除將該員履歷咨送兵部查核外所有驍騎校年逾六旬舊證復發懇請原品休致緣由是否有當理合恭摺具陳伏乞

皇太后

皇上聖鑒訓示謹

奏茲於八月十二日接奉

硃批薩拉哈本著原品休致賞食全俸兵部知道欽此

光緒三十二年九月初二日具

奏爲職官在公署相毆後彼此互訐據實參請懲處以肅官常恭摺仰祈

聖鑒事竊奴才等於八月十一日據土默特叅領齊佈森稟稱叅領初八日赴

戶司將前央託納佐領照抄右翼二甲五屬下先年散給各村戶口地官

灘草地冊單校對間忽有參領福祿入門大罵隨到戶司章程房內手執

馬鞭將參領頂帽頭上手亂打又將勸解之章京人等打罵不絕村言

辱詈稟請究辦又於十二日據掌戶司關防叅領福祿稟稱叅領齊佈森

於初七日乘職赴軍署稟商公事之際私到戶司託值差章京雙明索看

伊屬下戶口底檔雙明答以底檔不應私看况伊不在戶司充差更不應

爲齊佈森大言辱罵聲稱明日還來次日職著入邀伊來司講理始則推

延不到迨職等散署後齊佈森到司混罵並亂翻檔案職急乘馬赴司將

馬鞭放立門傍入室與伊辨理伊混罵擡頭並奪門傍馬鞭職不容奪互

相吵曠不料伊先稟控稟請懲辦各等情前來越日復據齊佈森以被毆

屬實等詞赴奴才等衙門稟訴當卽申斥各散查職官相殿相訾彼此互訐均干例禁此案叅領齊佈森以並非戶司有差人員私向司員強索檮案已屬非是迨該章京雙明斥阻不與又復迭次向其罵詈甚至在該司撞頭奪械互鬪實屬形同無賴應請將該叅領齊佈森照例卽行革職叅領福祿平日辦事尙稱勤能在土默特官員中操持亦較爲謹飭惟此次於齊佈森到司尋衅時未能平情理喻輒因一時之忿將同官肆行鞭擊亦屬逞性妄爲未便曲爲原恕相應請

旨一併革職以昭儆戒現在土默特舉辦清理地畝及各項新政在在需人該叅領福祿素有廉名才具尙堪任使擬仍暫行留旗差遣俾觀後效而贖前愆如果能知愧奮再由奴才等奏請

恩施所有職官相殿互訐據實叅處緣由理合恭摺具陳伏乞

皇太后

皇上聖鑒訓示謹

奏本月十四日奉

硃批著照所請該衙門知道欽此

再查土默特公中佐領札拉豐阿前於光緒二十九年間請假赴京還恩
迄未回旗現據該管叅領松阿哩等稟明前來奴才等查該佐領札拉豐
阿責任旗務雖既經派員署理亦不便久曠職守相應請

旨將佐領札拉豐阿開去佐領員缺另行揀員充補以專責成是否有當理合
附片具陳伏乞

聖鑒謹

奏

光緒三十二年九月初二日附

奏本月十四日奉

硃批著照所請該衙門知道欽此

A blank ledger page with 13 vertical columns and a horizontal header line. The columns are of varying widths, with the first column being the widest. The page is otherwise empty of text or data.

光緒三十二年九月初六日具

奏爲甄別旗員以資整頓恭摺仰祈

聖鑒事竊光緒三十二年五月二十日接准練兵處咨議覆侍講學士達壽奏

請變通旗營舊制一摺奉

旨依議欽此行令欽遵查照辦理查原摺內開所有現任之叅佐領亦請由該

旗都統嚴行甄別倘實係不諳文牘難於料理旗務暨有別項劣跡者均

卽奏令開缺分別降革揀員另補又開叅領以下各員嚴加甄核酌擬歸

併等因自應遵照舉行查甄別之典行於地方不行於旗署卽五年軍政

亦祇校以箭支而不及文藝且但有舉無効以故旗務日弛一日人才日

乏一日凡屬駐防類皆如是當此百度維新不拘成例挽回積弊激勵人

才洵非甄別不可綏遠官缺自協佐以至筆帖式共六十三員其中真無

嗜好者不過十居三四一切政務有廢無舉不問可知奴才貽穀到任後

力圖振作禁導兼施於揀派缺差之中實行勸懲之法俾知習染不去向

上無由三年於茲旗務始漸有起色無如駐防本多不學邊地更嘆乏才
方今要政待興舉凡學堂陸軍警察工藝諸大端即在窮邊亦皆次第籌
辦加之教案不減於內地鎮撫兼理夫蒙旗以及牧廠屯田荒徼邊備處
處興作卽事事需人至烏科兩城亦率取才於此在昔綏缺本多疊經併
裁祇贖此數現在旗務之外時政日益常缺之外未添一官祇此數十員
以之辦各項要舉但使才非極鈍無不以一人而兼數差而一值事體煩
難且時時資員於墾務其在今日不難通力合作所難在墾竣之後耳
才等生性皆好撙節且此時艱屢商歸併卒以事繁員少未果議行願缺
無可裁惟有實力甄別易庸劣以賢能使一員得一員之用庶幾官非虛
設俸不徒糜茲將考試各員分別懲處查有滿洲佐領佈勒合恩不諳文
牘難理旗務僅可任人指揮其原係雲騎尉世職擬請以防禦對品降補
蒙古佐領景雲擅動官款恣用治遊以一城兵官腋集之資隨便冒支揮
霍實屬忍心害理大膽妄爲應請革職永不敘用其動款甚鉅並著勒限

追繳防禦穆合林鴉片毒深直成廢棄驍騎枝文華慣事鑽營官以庸致亦復嗜好甚深均請革職以肅官常所遺各缺由奴才等另行揀員奏補凡此皆擇其已甚者示之儆戒其他入癮未重堪望革除識字無多能資奔走擬令與克勤厥職各員一併照常供職若概使開缺而候補之得力本不多人學堂之成才尙待異日卽令勉強更換就現在人才論前後大抵相似當亦無甚改觀願後瞻前祇好爲一時節取遷就之計改過寬予以限期取材不遺夫下體仍擬隨時考察以觀其究竟何如倘竟愧奮不知毫無成就再由奴才等續行糾劾除咨部查照外謹合詞恭摺具陳伏乞

皇太后

皇上聖鑒謹

奏本月十八日奉

硃批著照所請兵部知道欽此

九月初九日具

奏爲奴才三年任滿懇請

陛見恭摺仰祈

聖鑒事竊奴才奉

命督墾蒙旗於光緒二十八年春間馳赴晉邊兩年之中仰荷

寵畀院銜旋蒙

簡授綏遠城將軍之任

天恩高厚重寄謬膺在

朝廷以軍墾兼營易相資而爲理在奴才則兵農並課恒交結之堪虞蒞任以

來察知綏遠風氣未開百端待理爲之興教養勤訓練廣儲備課農工均

經和定規模隨時奏報墾事則自東墾告成之後併力於西或議治渠工

或招領旱地現正分行暢辦其烏盟六旗近亦仰賴

朝廷恩威相與指地報墾五年稟議一旦輸誠由此墾政推行或有不至如前

阻格者惟念奴才馳驅隴畝周諮農牧之宜睽隔

宮門彌切就瞻之願寸衷耿耿匪伊朝夕今幸任綬報滿墾事稍鬆合無仰

懇

天恩俯允入

覲俾得祇聆

聖訓依戀稍申並冀面陳一切如蒙

俞允擬將墾事趕速布置周備卽行束裝北上臨表瀝情不勝惶悚待

命之至所有奴才三年任滿籲請

陛見緣由理合恭摺具陳伏乞

皇太后

皇上聖鑒訓示謹

奏茲於九月二十九日接奉

硃批毋庸來見欽此

奏爲審明已革叅領詐財唆訟各情並幫同索詐之家丁分別擬結恭摺仰
祈

聖鑒事竊奴才等前於本年四月間因土默特叅領福森泰有被控詐財唆訟

苦累蒙衆情事奏請革職審訊奉

硃批著照所請等因欽此當經恭錄

諭旨並將此案應訊人證卷宗札飭歸綏道轉飭歸化廳同知會同派出叅領
松阿哩都格爾札布提訊擬辦詳覆去後茲據該署同知張嘉楨等詳稱
訊據已革叅領福森泰供稱所管屬目公產牧地向來租給民人耕種得
租辦公光緒二十四年領催自來子病故該革員將其家內所存平泉營
子村公產約據五十一張取來二十五年又將領催七十二經管佛廟上
公產約據六十八張後巧爾報村領催溫都遜經管絕戶約據六十二張
一併取來收存所有租錢仍歸各領催收取三十一年十二月該革員令

領催藍套向添密村民人趙應圖找使地價市錢三百千存公備用今違斷將公產地約並找使地價錢文一併如數交案其餘被控各節均不知情等語又據福森泰家丁賈閏月子供稱本年春間福森泰因挑換前鋒派伊到鑛籠素村傳知經蒙兵金保七金各許給福森泰錢文邀免挑選伊並得過帖錢二千旋即被控到案復據蒙兵圪旦藍套七十二各供稱福森泰收取本屬自公產約據並派藍套向添密村趙應圖找得地價帖錢三百千及賈閏月子因往鑛籠素村傳知挑缺得過七金等錢文屬實各等語至已故佐領福克津之妻呈控該革員唆訟逼離一案訊據福森泰供稱福克津之妻翠環係該革員妻妹上年十二月與伊孀孀雲碩佈氏因家務口角雲碩佈氏來向申訴當經飭令邀同親族調處未了該革員遂囑翠環先回母家翠環疑其挑唆勾串遂以逼令改嫁等情赴奴才文哲珩衙門控告質之雲碩佈氏翠環暨該族長金金翠環之堂兄七十二等供亦相同於福森泰逼令翠環改嫁一節均未能指實該前代理同

知林以絞審明未及會詳卸事移交該署同知會同委員松阿哩都格爾札布提案復訊據供前情不諱再三究詰矢口不移詳請核辦前來奴才等覆核無異查此案福森泰於雲頌佈氏等家務口角一案雖無逼令翠環改嫁實據而唆訟一節已非無因況身為叅領不知潔己奉公輒敢將該屬目各領催經管公產約據索取收存據爲己有又擅自找使公產地價市錢三百千迨被控到案始供稱存公備用雖據將地約及私使地價一併繳出究屬罔利營私本應按例擬辦惟查土默特地沿蒙古政治官常敗壞已久幾於不可究詰其罪不專在一二人且該官員等向無廉俸公費與各處地方官吏稍有不同該革員事犯到官亦在奴才等奏定的給津貼以前此次一經到案即將約據地價呈繳尙知悔罪畏法擬請量從末減業經革職免予再議賈閏月子以跟隨家丁代其主向屬下索財並自行得使錢文雖爲數無多亦屬不法業經奴才等批飭交廳重責遞籍管束福森泰交出之公產約據一百八十一張飭交該署叅領達恒泰

分別發還各該佐選派委員經管徵租歸公其私收之地價市錢三百千
發交土默特學堂充作經費虛許錢文未到免追蒙兵圪旦等訊無不合
均予省釋婦婦雲碩佈氏翠環訊由懷疑誤控應免深究未到各證案結
免提以省拖累所有奴才等審明已革叅領詐財唆訟各情擬辦緣由是
否有當理合恭摺具陳伏乞

皇太后

皇上聖鑒訓示謹

奏於光緒三十二年九月十三日具

奏茲於九月二十六日接奉

硃批著照所請該衙門知道欽此

光緒三十二年九月十九日具

奏爲變通官缺揀補章程以期得人而收實效恭摺仰祈

聖鑒事竊維有官不得其人與無官同有人不得其用與無人同綏遠城滿洲各項官缺分左右翼向來揀補章程均係本翼人員補本翼之缺他翼不得借補至蒙古於滿洲官缺界限尤嚴更不相通假即偶有借補或因保案得有借補班次或在軍營出缺留營就近借補仍係暫而非常在定章之初原爲各示限制就地取材起見無如承行日久動多窒礙往往有此翼缺出本翼應揀人員按之規制則相符而察其才地則不稱他翼雖有可用人員又因格於例章不能通借以致遷就補用後人缺不宜曠職債事甚至循例洊升協佐猶或不諳政治不通文義縱使隨時甄別已誤事機旗務廢弛莫此爲甚奴才到任以來揀補各項官缺時於其人才質優劣無不詳加考核其請補雖循成案而選取不敢苟同然亦有時爲例所拘稍鄰勉強者竊思擇人而任惟在舉能其官方合

朝廷庶政咸修實事求是破除成格一秉大公伏覩近日

簡放員缺但期得人滿漢且可互用况同爲旗屬本無畛域可分若必泥守故常計較旗翼滿蒙之別恐補缺者未必勝任而得力人員叙補稽遲轉無見用之地於旗務大有妨礙邊城需人孔亟在今日尤不相宜擬請嗣後遇有協佐防驍各項官缺如本翼本旗能有相當之人仍照舊章辦理倘人不相當即不分左右兩翼滿蒙各旗通行揀選但擇其人地實在相需均准酌量一體請補如此一變通間庶不使微幸得官者濫竽充數勤能自奮者從事失時官得其人人得其用小之祇益旗務大之不抑邊才綏遠爲西北要區官缺無多人才又少若再因循遷就爲日愈久貽誤愈深此奴才一爲官缺惜一爲人才惜所以亟思補救而不避更變之名者也若以滿蒙隔旗究有區別不妨少爲界限之留而同一滿洲其補缺似不必強以左右翼分故作此無益有損之舉如蒙

俞允將來揀補何旗之缺仍歸京城何旗帶領引

見所有擬請變通官缺緣由是否有當謹會同歸化城副都統奴才文哲琿合


詞具陳伏乞

皇太后

皇上聖鑒訓示謹

奏茲於十月初三日接奉

硃批著照所請該衙門知道欽此



奏爲防禦驍騎校舊病復發恐悞差操呈請休致恭摺仰祈

聖鑒事竊據黃旗蒙古防禦榮尙呈稱現年五十二歲食俸餉三十八年光緒十五年間調往烏里雅蘇臺換防戍守當差奮勉洵保至額外防禦二十三年六月引

見回城候補二十六年間因勦辦匪徒案內經將軍永德奏保以本班防禦儘先卽補並

賞戴藍翎奉

旨允准在案二十九年十一月間坐補鑲黃旗蒙古防禦惟前在烏城軍營感受嚴寒時患腰腿疼痛之證本年入秋舊疾復發未見就痊不敢以病軀戀棧正紅旗滿洲防禦祥林呈稱現年五十四歲食俸餉三十八年光緒二十一年閏五月間經署將軍奎英因差使勤奮揀選鑲藍旗滿洲驍騎校二十二年十月經將軍永德揀選正紅旗滿洲防禦擬陪二十三年三

月間引

見卽於是年九月補授防禦在案惟因在營年久染受風寒遂患痰喘近來血氣漸衰益難支持鑲藍旗滿洲防禦普呈稱現年六十歲食俸餉四十五年同治十年調往烏里雅蘇臺當差十一年間經將軍奎昌奏保以驍騎校卽補是年九月差赴塔爾巴哈台解交戰馬駝隻經將軍榮全奏保以防禦卽補光緒五年八月間引

見二十三年三月經將軍永德揀選鑲藍旗滿洲防禦現在精神漸衰誠恐有誤公事鑲白滿洲防禦德克吉克呈稱現年六十五歲食俸餉五十年同治十年護解伊犁軍餉遂留烏里雅蘇台當差經烏城伊犁將軍參贊遞保至補驍騎校後以防禦儘先卽補均經兵部核准註冊在案光緒十三年補授驍騎校十八年補授鑲白旗滿洲防禦現在溼疾加重一時難望就痊又據鑲藍滿洲驍騎校詩莫訥賀呈稱現年五十三歲食俸餉三十八年光緒二十一年十月揀選鑲藍旗滿洲驍騎校惟近來身弱多病難

膺差務鑲紅旗滿洲驍騎校多斯歡呈稱現年六十三歲食俸餉四十七年光緒二十九年間坐補鑲紅旗滿洲驍騎校近因精力衰頹情願將缺開去正白旗滿洲驍騎校安祥呈稱現年五十七歲食俸餉四十二年光緒二十六年間揀選正白旗滿洲驍騎校近因年老多病深恐有悞要差以上防禦四員驍騎校三員均以年衰病久由該管旗協領等轉呈懇請原品休致當飭前往查驗屬實加結呈報前來奴才等覆核無異查例載各省駐防及東三省察哈爾新疆等處遇有告休革退官員如五品以上者由該管大臣或題或奏或聲明請

旨俟奉

旨後再行開缺又例載內外三品以下官員年老因病告休均准其原品休致各等因此次防禦榮尙祥林祿普德克吉克驍騎校詩莫訥賀多斯歡安祥俱年逾五六旬因病呈請休致與例亦符合無仰懇

天恩俯准予原品休致如蒙

恩允恭候

命下之日再由奴才等欽遵辦理除飭取該員履歷咨送陸軍部查核外所有防禦騎校舊病復發懇請原品休致緣由理合恭摺具陳伏乞

皇太后

皇上聖鑒訓示謹

奏於光緒三十二年十一月初三日具

奏茲於本月十七日接奉

硃批著照所請陸軍部知道欽此

再正白旗滿洲防禦榮壽不諳旗務亦復沾染嗜好未便久令濫竽應請
旨開缺揀員另補惟查該員係世襲雲騎尉平日尙知守分並無犯貪污及行
止不端各項劣跡現在年力未衰堪供奔走旗務雖非其長而於農務尙
能勝任擬懇

恩仍准其承襲世職留于屯墾當差以觀後效謹附片具陳伏乞

聖鑒訓示謹

奏於光緒三十二年十一月初三日具

奏茲於本月十七日接奉

硃批著照所請該衙門知道欽此



奏爲叩謝

天恩仰祈

聖鑒事竊奴才恭逢本年十月初十日

皇太后萬壽聖節

恩賞藍色駝色絳色石青江綢各一匹到綬奴才當即恭設香案望

闕叩頭祇領訖伏念奴才遭逢

盛世游歷崇班

詔授師于赤芾早承夫

三命箴循節儉素絲常慄夫五統昔年

禁儉朝

天親瞻

紉纓光華之治頻歲邊城闢地愧乏經綸草昧之功適因幸值

昌期重荷逾頒

寵賚冰蠶霞綺拜

芝檢以開題紫鳳天吳映蔥蘢而綯采

賜比三公之服

澤逮檐帷製成一品之衣香攜襟袖駢蕃

施惠鵝翼滋慚奴才惟有益勵職司勉酬

高厚治兵振旅期同挾纘於楚軍教稼興屯敬念授衣於爾俗講武而當農隙

敢輕裘緩帶之徒誇摛文而頌

聖仁擬細葛香羅之入詠所有奴才感激下忱理合恭摺叩謝

天恩伏乞

皇太后

皇上聖鑒謹

奏茲於十一月二十九日接奉

硃批知道了欽此

光緒三十二年十二月初六日具

奏爲武備學堂學生畢業謹將在事各員擇尤請獎恭摺仰祈

聖鑒事竊查綏遠武備學堂經前將軍信恪於光緒二十七年十二月間奏請設立額選學生六十名入堂肄業並聲明俟三年畢業擇尤獎敘奉

旨允准在案查綏遠風氣晚開創辦之始難在籌款更難在用人其時八旗牧廠甫經奏請開墾所指此項押荒歲租爲該學堂常年經費仍屬指禾待食無米爲炊故遵委教習及承辦人員數難足額薪難照章且多不領薪者人少事煩勢所必至迨奴才接任後隨時親往學堂督飭認真訓練並添聘洋文教習暨添委監督提調等員漸次擴充辦理乃值牧廠連年旱歉押荒難收學堂毫無經費當以規模已具不忍廢於半途先由他項百計通挪勉強支持曾經兩次奏明學生艱苦情形籌添學堂經費然亦微乎其微矣夫款絀如此居然造就成才者不獨學生堅忍嚮學能耐艱辛即在事各員經奴才責以大義勗以將來亦皆勉効馳驅不計薪俸朝夕

從事與諸生厥苦惟均查該學堂六十學生前經練兵處考選送赴日本留學兩名暨派附北洋武備學堂留學七名現均在留學地方考取優等次第卒業本年五月間派員帶領在堂學生四十五名送京考驗內除在途病故一名不計外到京與考者四十四名經練兵處考取五成以上者十五名四成以上者十八名其不及格者十一名發回本旗是合之留學畢業各生成就已在四十名以上此外有留充本城陸軍教練長五名並經科布多咨調赴科委派練兵一名皆因現充要職未經咨送到京考試而其學業程度實均合格亦與卒業無異夫興學之難不難於有款而難於無款育才之難不難在內地而難在邊地至邊地而在綏遠尤難乎其難內地有款以興學邊地無之卽各省駐防辦理學務亦皆由本省督撫籌撥獨至綏遠學堂數年之久未由晉省籌撥分毫其間之萬不能支幾至停辦者蓋已數次矣而卒克底於成者固八旗子弟層層節制不敢以艱苦難忍輒起風潮然非各員之日日苦口開導結成團體心力俱瘁艱

苦與同曷克臻此在諸生之自苦志在前程畢業一領文憑頭頭是道其在各員茹己之苦成人之材薪微而事繁更無薪而事舉而且款籌有限事舉無遺數載於茲良非易易叔才每至學堂心焉憫之既重其義難沒其勞蓋無財力之區專資人力所望於日後者多矣查前准練兵處會同吏兵二部議定新章各省武備學堂俟學生畢業成就在六七十人以上准將在事人員請獎每案文武併計不得過十六員尤爲出力者准照異常勞績酌保二三員餘均照尋常給獎等因此次綏遠成就學生雖未及六七十人而荒徼風氣初開不啻以移山之愚成興學之舉艱苦百倍於他處自不能與各省比論齊衡且卒業四十餘名在創辦之時處窮困之地有此成就之數已非意料所及承辦各員如此勤勞若不從優給獎何以昭激勵而勵將來查有兵學教習胡恩光洋文教習方蘇學業深粹善誘循循派送學生晉京考驗照料一切亦極臻妥協學堂監督陳光遠於考核功課申明條教及督理全學事務無不悉心經理力任繁難漢文教

習喬桐蔭所夕在公誨人不倦該四員勞績最著應請照異常給獎又提調文瑞文案委員蔡煥勳稽查委員德本均屬厥職克勤有勞足錄應請照尋常給獎其餘在事各員悉從刪汰不敢稍涉冒濫核計所保異常勞績按之新章溢保一員而學堂之難易迥別邊防之情勢不同萬苦千辛收此績效祇此得力數人若令一二人員獨抱向隅是其從公枵腹以前徒負成勞將至在事灰心此後必難爲繼且合之尋常共保七員較部定每案文武併計不得過十六員之數尙不及半實屬慎之又慎減無可減加以學堂多辦一年雖在事不敢言勞而論功更宜加獎合無仰懇

天恩俯念邊地興學用人之難與各員堅忍卓絕之苦准將花翎儘先補用守備胡恩光免補守備以都司補用並加游擊銜花翎分省補用直隸州知州陳光遠花翎分省試用同知方懋免補直隸州同知均以知府分省補用分省試用府經歷喬桐蔭免補府經歷以知縣分省補用佐領文瑞俟補協領後加二品銜廩生蔡煥勳以縣丞歸部選用府經歷職銜德本以

府經歷歸部選用出自


逾格鴻慈除飭取該員等履歷咨部外所有武備學堂學生畢業請將在事出力人員擇尤獎敘各緣由理合恭摺具陳伏乞

皇太后

皇上聖鑒訓示謹

奏本月二十一日奉

硃批該部議奏欽此



光緒三十二年十二月十六日具

奏爲籌辦綏遠巡警情形恭摺仰祈

聖鑒事竊維保甲團練久已有名無實徒法不行欲肅內治而安民生自以巡警爲先務近年疊奉

明詔諭令各省一體舉辦尤不得視爲緩圖綏遠僻在邊徼居盡旗兵近則客籍紛投儼同內地與歸化城僅隔數里歸化五方雜處良莠不一游手散勇窩聚其間現已設立警察巡緝綦嚴往往逸匪潛蹤此拿彼竄敲魚敲爵防不勝防至穿窬小竊托旗地以窩贓尤爲逋逃之藪此宜亟設巡警以靖外盜也八旗兵丁坐食餉糧不知自謀生業凡精壯有用皆已選入軍隊其嗜好甚深游惰不振者悉從刪汰貧極則無賴困極則爲非往往勾串漢民滋生事端戶口繁多各旗佐實有防察難周之勢此宜亟設巡警以靖內奸也現於城內適中之地設巡警總局東西南北四街各設分局一所統歸總局鈐東挑選健壯兵丁粗識字義一百二十名日夕分段

站崗仍輪班抽調演練委派陸軍學堂教習已保知府分省試用同知方
懋兼充總辦該員游學歐美多年習知警政飭令查照北洋及各省警章
參以東西各國警察規則擬定法程先行試辦並設幫辦提調等員其警
官巡官則用前武備學堂學生赴考未卒業者充之以知兵者習警事本
相近用亦得宜並採購各種警察講義令各員於辦公之餘按日自課且
分授所率警兵使共知警察作用意義仍責成該局總辦督飭認真講習
雖未立學堂而已寓教育之法此非徒具形式但進規美備極合章程冀
民政風氣之開示蒙部觀瞻之則立法能推行盡利儲材則廣績有資自
非設學堂教育不可第以綏遠一隅論似亦可以不必若但鋪張粉飾徒
博其名於事何濟且亦無此經費擬於明年選警官之中聰穎合格者或
咨送部立高等巡警學堂或派赴北洋巡警學堂學習必期警務多一成
材即多一進步此又徐圖推廣之辦法也至該局常年經費查有擡槍營
每年津貼閑散兵丁一百六十名每月一兩除減成外每年淨餉銀

一千五百三十六兩該營演練久成具文擬卽行停撤將此項津貼銀兩統歸巡警又綏遠月放土默特卡倫盤費銀三十四兩五錢一年共四百一十四兩遇閏加增亦飭撥入該局又耗羨兩萬生息銀每年二千四百兩放給綏遠官兵巡查大青山後卡倫常年盤費一千六百零八兩又放給操演壯丁常年口糧七百六十八兩此亦徒事虛文不如一併裁汰騰出每年二千四百兩亦作爲巡警經費有此款項目前足可支持如此變通以後盡歸實用且以公濟公仍以兵餉餉兵名實旣符名義亦順該局試辦伊始所有委員額數及月支薪津未必盡合規則限於財力不得不如是權宜應俟部中頒發各省通行警章再行籌款擴充隨時照章辦理除俟該局開辦將試辦章程暨局員經費列表咨明民政部度支部查照外所有綏遠籌辦巡警緣由理合恭摺具陳伏乞

皇太后

皇上聖鑒訓示謹

奏茲於三十三年正月初一日接奉

硃批該部知道欽此

再綏遠武備學堂學生業經赴考畢業既觀成效於前亟宜接辦於後現已遵照前練兵處奏定章程將武備學堂改爲陸軍小學堂卽就原建堂舍另招新生入學查荊州福州察哈爾三處駐防專設學堂學生均定額九十名分三年收足綏遠擬卽比照辦理業於本年八月間開學應挑頭班學生三十名除按格考選本旗子弟外又附以土默特右衛數名奴才育籌普及之方期於人人知兵處處知學土旗及右衛皆隸綏管轄該兩處爲限於窮僻未立學堂故亦令附入於此以宏造就而免向隅至教習及承辦各員現在甫立頭班暫用從前武備學堂人員尙足敷佈至明年添收二班擬調用前班武備畢業生分充教員執事員擴充辦理以符定章除咨部查照外理合附片具陳伏乞

聖鑒謹

奏光緒三十二年十二月十六日附

奏本月二十一日接奉

硃批陸軍部知道欽此

再緩遠八旗津貼一項原爲閑散充當擡槍營兵以之代餉日久弊生漸以步甲養育兵充數騰出此項津貼盡作爲窮苦老幼養贍其初尙爲恤貧起見後則瞻徇情面卽富貴子弟亦補此額在各協佐不思名義每遇缺出輒假矜恤寒苦之詞率請點補且公然不諱視爲故常數十年於茲耗帑多矣奴才到任之初尙不知似此情節後察悉其弊漸於此項額出扣留不補實作擡槍營津貼已扣過半矣今統歸巡警兵餉本應將此項卽時一律裁併但其中實在窮苦幼未及歲老養餘年者尙多賴此生活以奴才照煦安懷之意謹擬姑少從緩留此有餘不盡之

皇恩必俟出一缺然後扣一餉惟警兵已設餉本不充再四籌思祇好照現定餉章俾兵得其全官得其半一俟閑散扣齊卽當照章全領現擬擡槍營截至十二月停止巡警局卽自是月開辦自明年正月再照現定餉章支領其間一月以已扣閑散之津貼爲開辦警察之經費以後續扣若干統歸該局實用年終再行造報其所指此項津貼未扣齊以前尙有不敷當

另行設法騰挪以裨警政理合附片陳明伏乞

聖鑒謹

奏光緒三十二年十二月十六日附

奏三十三年正月初一日奉

硃批該部知道欽此

奏爲叩謝

天恩仰祈

聖鑒事竊奴才於光緒三十三年正月初一日由陸軍部遞到恭奉

恩賞福壽字各一方奴才當卽恭設香案望

闕叩頭謝

恩祇領訖伏念奴才滿洲世僕知識庸愚謬領軍符三載毫無報稱兼膺墾事

兩盟尙待擴充正慚職守之多虧乃荷

寵榮之疊錫晉

福時而介祉歡承

天語琳瑯遊

壽宇以延禧喜見

雲章璀璨

鴻施廣被益載彌殷奴才惟有益矢慎勤勉酬

高厚治軍邊徼效春蒐講武之勞成賦中邦課夏扈勸農之政所有奴才感激

下忱謹繕摺叩謝

天恩伏乞

皇太后

皇上聖鑒謹

奏

光緒三十三年二月十六日具 奏

奏爲循案徵收助馬口外各莊頭改徵折色銀兩恭摺仰祈

聖鑒事竊查朔平同知經徵助馬口外十五戶莊頭應交改徵折色銀二千七百兩因嘉慶道光年間據各莊頭等三次呈報沙淤廢地應折糧銀一千三百二十九兩八錢一分均經前任山西撫臣委員查明地屬荒蕪會報具

奏遵

旨查明州縣未攤丁糧分別減豁坍塌無著之銀懇

恩永遠豁免隨發

上諭騰黃頒發張貼在案今據朔平同知普恒詳送冊開光緒三十二年分經徵助馬口外十五戶莊頭等應交折色銀二千七百兩內除豁免廢地銀一千三百二十九兩八錢一分外現應徵銀一千三百七十兩一錢九分經該同知如數徵收全完已徵銀兩留存廳庫就近充餉至前項廢地經

奴才委員勘明續墾地八十四頃六十三畝按照舊則加徵銀二百五十三兩八錢九分令自光緒三十三年起如數升科以供兵精已於本年三月初五日

奏奉

硃批度支部知道欽此欽遵在案其餘廢地並飭各廳每年清查一次如有續墾再行核辦合併聲明除將該同知造具原冊送部查覈外理合恭摺馳陳伏乞

皇太后

皇上聖鑒敕部覈覆施行謹

奏

光緒三十三年二月二十二日具 奏

奏爲叩謝

天恩仰祈

聖鑒事竊奴才於光緒三十二年十二月欽奉

恩賞福字一方三十三年二月二十日由京賚到奴才當卽恭設香案望

闕叩頭謝

恩祇領訖伏念奴才塞下屯田未聞軍旅本農隙以講武實鴛廣而多荒建樹

毫無屢荷

絲綸錫寵涓埃未荅復承

文字稱祥綬

洪範之疇

禹甸山河歡呼

萬歲托

義爰之隆

堯天雨露聞到九邊

渙汗欽承淪肌感戴奴才惟有力量報稱益矢慎勤讀史記河渠之書勉興地

利考蒙古游牧之記遠拓邊疆所有奴才感激下忱謹恭摺叩謝

天恩伏乞

皇太后

皇上聖鑒謹

奏

光緒三十三年二月二十九日具 奉

奏爲添購新式步槍以儲兵備而固邊防恭摺仰祈

聖鑒事竊奴才前向德商泰來信義各洋行分購七密粒五響毛瑟新式馬步

快槍共一千一百六十枝並土獸特搭購二百四十枝均經先後奏明已於上年派員驗收運解到綏荒城有此利器聊壯聲威而奴才上承練兵之

明詔下顧西北之巖疆猶無日不以邊備空虛爲慮綏遠地處漢南秦晉直倚爲藩籬庫烏科特爲堂奧大青山狼山以後廣袤萬餘里平沙無垠合庫烏科三處邊防尙不足一營之數然皆差站雜役有兵之名其實無一兵也以此地勢當此時艱不獨外患堪虞即內藩亦不可無所鎮懾既知履霜之漸不能不爲未雨之防全局統籌口外備緩急之需非一鎮不足以資策應少亦須備練一協但督省方自顧不暇何能籌及綏遠綏自爲籌竭慮殫精稍寬時日以常年正餉之所出量旗署棉力之可行將來能練

一標足矣顧駐防編伍頃刻能成邊徼置槍經年難到若待成軍之後用武之時始行議購將以兵待械無事則徒糜餉項有事則大悞戎機奴才既持必練一標之議其應用軍械自應先期籌備但目此情形不能無備限於財力又不敢多備因於上年十月間復委知府斌儀赴津續向信義洋行定購一千九百零四年最新式毛瑟步槍四百枝每枝隨帶皮帶背帶等件並無煙子母一千粒計每分價值行平化寶銀七十兩零五錢共合二萬八千二百兩從前所購槍械措款已極艱難剜肉補瘡至今孔尚未復此次更須於無中生有竭全力以圖之急固恥艱難堪緩或集裘可望乃與該洋行議定合同先不交定銀限九箇月槍到驗收再行如數付價或備價少有不敷而歸期尚能展緩公家辦事且爭此數月騰挪綏遠籌款之難於茲益見方今新政日多邊備尤要若皆待財力充足而後興辦必致事無一舉政無一行此奴才所以不敢因噎廢食臨渴掘井也所有添購步槍需用各項擬仍由綏自籌不動正款應請照迭次成案免其

造報除將合同鈔錄咨送陸軍部外務部暨分咨查照外理合恭摺具陳


伏乞

皇太后

皇上聖鑒謹

奏

光緒三十三年二月二十九日具 奏



奏爲縷陳現辦學務經費款大概情形恭摺仰祈

聖鑒事竊查口外學校近自光緒十三年始建且僅以一學官統教七廳其教與學概可知矣而在綏旗更不待問以此亟需才之地遇此皆不學之人數十年來所有一切邊備宏規廢弛殆盡而猶曰駐防尙武何必讀書以故自是其愚自安其陋相延再久必至一無識字之人奴才愚之到任伊始卽就書院舊址改建中學堂選擇聰穎子弟肄業並令兼習清蒙洋文此外添設蒙養學堂又設蒙小學堂五所均經奏明在案維時學堂甫立學生程度尙淺且未奉部定新章綏遠本風氣晚開八旗子弟又坐食錢糧習於逸惰其失學已非一日若驟語以各科之課本無此合格之資才奴才惟注重漢文以培其本漸及科學以引其機數載於茲稍立基礎乃爲進步之圖查教育一端師資爲重上年因由督聘講科學畢業生二員分充中小學堂教習將原設之蒙養學堂改爲初等小學堂以符名實科

學教習本應多聘祇以籌款有限暫選通達漢文亦知新學者任副教員之職名目課程均照奏定新章辦理尙能中律中度實力奉行至高等小學堂爲初等升學之階俟財力稍紓再行籌辦不特此也蒙學爲養正始基尤宜普及東西各國凡兒童已及就學之年無故不入學者責其長上所以進化益速民智國強奴才撫此駐防有統率之權尙易施強迫之教茲由舊設之蒙小學堂五所設法推廣分爲東西南北中五路蒙學每路設兩學堂共成十所傳集幼童悉使入學復於左右兩翼分設半日學堂專收寒峻子弟既不使曠時失學仍不悞作苦營生又清蒙兩科前已附入中學堂俾學生兼習嗣因中學堂改照奏定章程科學更訂界限宜清又奉部咨注重國語於是另設清文學堂蒙文附之國語爲創垂成憲習焉不講既差於數典更窘於辦公另立一科俾業精於專速成猶易其蒙文之設則因綏遠統轄烏伊兩盟日與蒙接現在報墾愈廣交涉愈多繙譯需才亟應預爲造就藩服亦

朝廷赤子並令來學冀可開通蒙智藉以聯絡蒙情去歲奴才通飭兩盟開誠勸諭現已有一旗派送子弟前來就學者從此聞風興起以學爲轉移或能化其愚悍之心使知尊親之義裨益尤非淺鮮惟學堂愈加擴充經費愈形支絀卽以中學堂論常年的款不敷幾至中輟奴才將應得公費悉數捐入勉持至今台所有學堂統計至少亦歲需兩萬餘金之譜現又修築講堂添設校舍用款非六千金不辦鳩工庀材興嗟仰屋至購置書器津貼火食尙不在內籌定之款一係書院舊有經費發商息一係右衛馬廠地租此外則奴才捐廉及應得公費益以旗佐攤認雖杯水不濟與薪而成裘亦資集腋預指之款一係倡率八旗官兵認領牧廠地三百四十餘頃擬俟招佃得租添補學費但此地畝因連歲歉收顆粒之租未經徵入一係上年台站墾局稟請在東素海台境內設立官鹽號整飭土鹽釐稅歸公當奏明將所收稅課銀兩充作學堂公費現因鞫未清尙遲舉辦以上兩項需之甚急應之轉緩雖屬指禾待實究尙有實可待此外

收來達拉特河頭餘地四子王與察哈爾鑲藍旗因爭界報効間田均向
未經丈放且此二地輪自蒙旗所得租項祇應歸入蒙文學堂他不能用
夫興學莫難於籌款而在綏遠尤難乎其難各省辦一學堂多則十餘萬
少亦數萬金故規模宏闊措置裕如卽他處駐防亦皆賴本省督撫會等
辦理接濟堪資綏遠則旗庫既艱窘異常晉庫亦無可挹注空拳赤手譬
如平地樓臺挾奢願以圖成既有無米爲炊之患若畏難而中止又有因
噎廢食之嫌奴才惟勉力支持設法籌措無論如何難辦必不使八旗失
學積以歲時或得稍効尺寸耳除將各學堂章程表式照章分別咨送學
部查核外謹就現辦情形恭摺具陳伏乞

皇太后

皇上聖鑒謹

奏

光緒三十三年三月二十一具 奏

光緒三十三年三月二十一日具

奏爲馳赴西盟巡視渠地並循例帶查廣覺寺恭報攜印起程日期仰祈

聖鑒事竊奴才於杭達兩旗報墾以來經營租放詳定章程而尤注重於渠工

三十一年夏間奴才曾親赴套地週歷勘驗當飭墾務局司擴充修治或

疏其故道或浚其來源派別流分均非旦夕所能集事現在東作方始仍

應前往詳細查勘規畫久遠近復因勘收烏盟各旗報地如西公所報改

指什拉胡魯素及紅門岡等處均在後套東偏毗連達地亦非有適用之

渠不足以資引灌奴才業於上年收地後委員相度勘估此次奴才赴套

尤當一併覆勘及時興辦又查奴才管理之大青山後廣覺寺例應於三

年往查一次奴才到任後曾經派委前任協領文哲琿於二十九年冬間

查過該廟現在又屆三年應查之期奴才擬即便道親往查看茲擬三月

二十一日攜印起程馳赴西盟後套查看渠地并帶查廣覺寺喇嘛徒衆

以符舊例除俟事畢回綏再行奏報外所有奴才由綏赴套各緣由理合

恭摺具陳伏乞

皇太后

皇上聖鑒謹

奏本年四月初六日奉

硃批知道了欽此

奏爲叩謝

天恩仰祈

聖鑒事竊奴才恭閱邸鈔奴才胞姪鍾岳於本年四月二十八日奉

旨補授吏部文選司郎中奴才之子鍾崙於四月二十九日奉

旨擬補吏部郎中准其補授等因欽此跪聆之下感激莫名伏念奴才遭際

聖朝渥承

恩遇課田功於朔漠殊慚將帥登壇叨門蔭於南曹並應郎官列宿

寵榮逾分兢惕方深迺蒙

澤降自

天賞延於世羣從兄弟同參典選之班一日後先疊拜真除之

命九邊聞

詔五內增慚奴才惟有遠訓義方俾勤職事期嚴敦於謹敕寄書常懷飛鳶教

建慶以敬恭對

仗無忘數馬庶幾涖官從政佐藤廳而勉效銓衡冀能資父事

君依

楓陛而仰酬

高原所有奴才感激下忱謹繕摺叩謝

天恩伏乞

皇太后

皇上聖鑒謹

奏

光緒三十三年六月初七日具 奏

再綏遠所管之廣覺寺向來每歲春秋兩季派員往查寺中喇嘛按冊點名每屆將軍到任亦循例親往查看三年又往查一次溯查從前奏案所以如是慎重者惟恐該寺僻在深山聚僧衆千數百人難免滋事更番查點用意極深奴才此次親往查閱自薩拉齊境石拐子入山口紆繞數十里始達其地查廟宇宏闊繚以僧舍千餘間盡是層臺處處爲犄角之形居建瓴之勢寺前後百里內外均屬廟產供給不難招致最易一入冬令遠近喇嘛以習經爲名往往聚至一二千人而其報部則不過循例分別喇嘛黑徒兩項三四百名而已奴才到寺詳加點查仍是向來例數第聞前一二日匿於山後散布該寺地戶處居多密派人探情事屬實此本由來已久無足詫異但深巖寂壑之中據此形勢聚此徒衆廟產又足以濟之似不宜任其密集漫無限制當經嚴飭嗣後統內外遐邇各僧不得過五百名之數並視爲勸導宣布

聖諭廣立學堂兼習漢字講以時勞利害証以慣受人愚唯唯環聽似有所悟

及至奴才去後附近漢民聚集數百人道遮跪乞情詞懇切其勢洶洶均以該寺素行霸惡爲控其大端在泉流極旺卽不屬在廟界者亦不使民田灌溉滿山煤礦一撮土之挖犯其禁者非重罰卽痛打打在貧戶罰在小康究竟受罰多於受打斂財之意已概可見民非水火不生活故積怨如此其深奴才遂於近寺處又住一日盡悉實情水利尙不甚多惟禁礦愈嚴爲禍愈烈查廟地捨自土默特烏拉特後旗該兩旗爲五原薩拉齊兩廳轄境當札飭各該廳妥爲辦理戒其特衆行霸不爲害於一方面以慈悲便民務使蒙漢各遂其生相安無事固地方之幸亦佛界所宜所有查看廣覺寺現在情形緣由理合附片具陳伏乞

聖鑒謹

奏

光緒三十三年六月初七日附 奏

再綏遠旗務經奴才歷年整頓政事較前愈煩用人較前愈衆加以兼督
蒙旗墾務交涉之事日見其多繙譯之才日見其少故亟設蒙文學堂以
廣造就惟目前之教授需員辦公需員求其堪膺斯選者尤不易覓茲查
花翎三品頂戴儘先卽補佐領玉崑前由綏遠調往烏里雅蘇臺戍守歷
保今職該員通達政體於蒙文尤屬擅長現奉烏城署將軍奎煥派委來
綏提領本年經費銀兩奴才需才正殷擬留該員差遣委用以資得力除
咨烏里雅蘇台將軍暨分咨部旗查照外理合附片具陳伏乞

聖鑒謹

奏於光緒三十三年八月初二日附

奏於九月初二日接奉

硃批該衙門知道欽此

光緒三十三年八月十六日附 奏



奏爲遵議綏遠建省以固邊衛謹條擬大概辦法恭摺仰祈

聖鑒事竊奴才於四月間巡視河套在途次兩准

軍機大臣字寄光緒三十三年四月二十八日奉

上諭岑春煊奏統籌西北全局酌擬變通辦法以興本利而固邊衛各摺片著徐世昌袁世凱升允趙爾巽錫良唐紹儀朱家寶程德全恩壽曹鴻勳聯魁貽穀廷杰誠勳長庚馬亮延祉連魁錫恆穆特春慶恕聯豫體察情形各抒所見妥議具奏原摺片均著鈔給閱看欽此光緒三十三年五月初二日奉上諭前據岑春煊奏統籌西北全局各節業經諭令徐世昌等妥議具奏茲又據該督奏各邊擬設民官亟應變通舊例並錄呈左紹佐原奏各摺片查左紹佐原奏請設西北行省一摺經政務處議覆飭下直隸山西督撫熱河察哈爾都統體察情形奏明辦理至今尙未舉辦著徐世昌等歸入該督前奏一併妥議具奏原摺片並左紹佐原奏均著鈔給閱看欽此先後遵

旨寄信前來仰見

朝廷眷顧邊陲博訪周諮至意跪聆之下欽服莫名伏念時局不能無變遷卽
治法不能無興革我

朝統一區宇遠播威稜西北諸藩悉列戎衛當時因俗施政設武職而不設文
員蓋趨重駐防正利其風氣未開窮荒隔絕有以限戎馬之足嚴門戶之
防今則邊禁已弛矣向所恃爲藩籬之固者此日實毫無可恃及今設法
布置猶恐後時若有憚煩難因循舊轍後患何堪設想奴才待罪普邊審
察情勢憂隣氛之日逼歎蒙族之式微深維疆索之空虛熟慮邊防之預
備是以上年議奏程德全廣開蒙墾摺內詳陳邊蒙情形以建置爲不可
緩爲興墾計實爲備邊計也茲岑春煊通籌西北全局擬將各邊改設行
省先自熱河察哈爾及綏遠三處入手酌擬變通辦法並覆陳左紹佐議
請綏熱建省原奏奏奉

諭旨一併飭議

聖謨罔遠規畫幾先啓因時制宜之機發強幹及枝之策奴才忝奉末議蓄有見聞敢就綏遠所宜愚慮所及敬爲我

皇太后

皇上縷晰陳之奴才詳釋岑春煊左紹佐各原奏意皆以西北邊防喫重欲爲一勞永逸之計舍置郡縣易舊制別鮮良圖一擬分綏遠熱河察哈爾爲三省一擬合熱河察哈爾爲一省而綏遠應自成一省意見則同核其所擬辦法岑春煊之奏尤爲切實詳盡施之綏遠多可仿行蓋岑春煊前曾撫晉洞悉晉邊情形故言之獨詳籌之尤備請自近始既非重大而難行事尙可爲惟在變通之盡利今第就綏遠情勢論以言管轄蒙旗爲將軍之屬部而非將軍之領土彼其性嗜小利輒以借貸之細嫌隙之微質產於外人甚且割棄弗顧而不能過問以彼可以直接授受也如烏盟之四子王旗伊盟之杭錦鄂托克等旗類皆若是無以維繫於其後蒙地將徧爲牧產矣此其可慮者一以言政令省吏管地方而蒙旗不受其約束將

軍統蒙旗而地方不聽其指揮每當交涉兩難之時土客之勢相傾是非之真莫辨劣蒙莠漢勾串爲奸往往廳署不能自主其應理之事旗署不能自制其受治之人責無所專詞有可諉無怪訟案無結時盜案無獲期命案無信讞也牽掣之甚勢必日卽因循此其可慮者二以言防守晉省兵力本單口外防隊數營僅分布於各廳附近之區不能遠顧於蒙人游牧之所以後墾地愈廣防範愈難先不能自保其治安又何能遠聯其聲勢萬一邊疆有事在晉爲域外之警在綏無應變之力如三十年套匪之起甘兵後至晉隊遲來卽近在歸化之兵亦必聽省命而後行幸而旋起旋滅早日肅清倘或蔓延咎將誰執此其可慮者三以言開墾蒙旗之士田大半皆私放私租久已成蒙漢雜居之勢今更振興墾務煙戶日多其間良莠不齊紛擾滋煩小之屢啓爭端大之動釀鉅案械鬪割劫時有所聞而邊廳或漠不相關意存歧視否則藉端需索苛虐隨之寄民無以爲依奸民因以得計省吏之耳目既有未周軍府之維持更多不便長此遷

就卽在無事時已難自治況乎邊事之日棘也此其可慮者四如是種種可慮其宜及時整頓易轍改絃也明矣建省之議已無可疑且建置之所關固不僅在此數端已也自來行法在得人然莫患於事權之不一籌邊無善策然莫要於遠近之相維從前新疆巡撫劉錦棠於籌議新疆設治摺內有長治久安之道在增設郡縣之語又謂苟爲形勢所必爭卽爲政教所必及質之今日晉邊情形似異實同查上年政務處議奏左紹佐擬建西北行省之奏亦謂控制撫綏行省較軍府爲合宜惟以附近廳縣過少款項過絀礙難猝辦令先於要害處所添設地方各官徐圖布置是已權衡輕重燭照邊情欲成蒙漢合治之規姑作一時權宜之計然而事機已迫豈曰有待將來勢局日新胡可仍安故步建置主義祇以備防原有不能仿照內省者因戶口之繁增設郡縣因郡縣之多增設監司腹地之建置重在治內設官吏以繫人民有人民以廣墾闢因墾闢以資保衛邊地之建置則重在備外緩急之勢異因創之事自殊也且晉邊歸綏道屬

現已有廳十二視吉林黑龍江兩省本足相埒此後墾務所至尙可添官似無慮廳縣之少若謂財力過絀然亦有稅釐糧賦等項尙非無可憑藉稍資協撥足濟設施似亦不至有耗中事外之虞也尤有請者綏遠果議建行省以綏遠爲山西之屏藩仍應以山西爲綏遠之根本雖畫疆分界各有守土然新建省分不必獨立當如新疆之轄於甘肅庶相承一氣援應有資除將籌撥大概辦法另繕清單恭呈

御覽外所有遵議綏遠建省以固邊衛各情形緣由是否有當理合恭摺具陳
伏乞

皇太后

皇上聖鑒訓示謹

奏

謹將籌擬綏遠建省大概辦法繕具清單恭呈

御覽

一變通官制查綏遠城將軍由右衛移駐綏遠名爲鎮守實則祇能管理駐防各旗及土默特蒙旗事務若烏蘭察布伊克昭兩盟雖有統馭之名從前但轉行該盟封遞文件於該盟各旗一切承襲補署等事並不與聞至奴才抵晉邊後因墾務之推行與教案之交涉始稍稍使其就範然遇事仍或遵或抗未必皆奉令惟謹可見將軍所轄之蒙旗亦尙未能盡伸其權力况阿善營旗之不歸管轄乎其自爲風氣更不容問矣今但就馭蒙而論已難仍循舊轍矧欲增屯置邑完備邊防樹旗漢合治之規籌綏急可恃之策官制之改烏可以已岑春煊原奏擬參仿東三省原設將軍辦法令將軍管轄一方節制文武所有升調補署暨一切行政事宜均歸管理固係因基利導之計然其議改官制條內則又擬將各邊都統將軍大臣均改名巡撫於巡撫下改設左右參贊設旗務民政各司另設理刑專

員並將地方各官概用府州縣不設道員以省層折意蓋以現在預備立
憲

朝廷釐定外官新制期於一律通行東三省已先行試辦豈仿東三省建治而
可舍其新以襲其舊者惟法無歷久而不變道貴因地以制宜綏遠邊要
之區更張伊始若謹如東省設治之初固將嫌其闕畧然盡仿東省新建
之制又恐涉於鋪張岑春煊於奏陳正條之外附以簡易辦法固已早見
及此奴才察度情形似應採其另片所擬參以新鎮直省官制通則另定
綏遠暫行改制之法以綏遠城將軍改名巡撫兼行將軍事合一事權巡
撫之下暫可不設布政提學兩司於巡撫公署內分曹治事以科代司將
原設地方各項局所酌量裁併去留如慮科務繁重不可無監督指揮之
人助理軍撫擬畧仿東三省設有參贊之例以歸化副都統改爲參贊總
理各科事務稟承軍撫辦理不另設廳以免牽掣分科名目應照官制新
章設立曰交涉科曰吏科曰民政科曰度支科曰禮科曰學科曰軍政科

曰法科曰農工商科曰郵傳科並益以旗務科管理綏遠土默特原有各
司所上及應行各司之事以蒙務科管理所屬盟旗之事每科設僉事一
員專理科務如有事簡不必備設者可以一員兼任三科以下之事其下
設一三三等科員視事之繁簡量定缺額交涉提學旗務蒙務各科應別
設一二等譯官民政科應別設一二等醫官度支科應別設一二等庫官
農工商科應別設一二等藝士所有僉事科員等官品秩均如東三省之
制作爲官缺以專責成而資升轉凡不屬各科之事如機密摺電函牘應
設一二等秘書員稟承軍撫掌理其人由軍撫自行徵辟不作官缺此酌
擬軍撫公署官職之大概辦法也若各屬官職查行政司法分權宜豫應
專立提法司別爲一署設提法使一員受軍撫節制管理司法上之行政
事務監督各屬審判以理刑法其各級審判制度及應設屬官應由提法
使查照新章辦理至現在既不設布政提學司使應以歸綏道兼司行政
提學考核所屬官吏承轉一切行政事宜期可遇事簡捷有裨地方惟綏

遠近邊現已設有新舊十二廳幅員較廣墾地日多尙須以次增置廳縣
僅恃駐省道員監督指揮勢難周顧應於西路適中扼要之處仍照歸綏
道體制添置邊道一缺分司管理其歸化廳同知係各廳首領應畧崇其
秩改升府治仍暫不設屬縣俾其專理地方無虞扞格尤要者府廳佐治
各官係植地方自治之基礎亦應查照官制新章參以地方情形及時的
量增易此又酌擬各屬官職之大概辦法也

一區劃疆域岑春煊原摺擬以山西之歸化薩拉齊托克托和林格爾清水
河五廳新設武川五原東勝三廳合烏蘭察布伊克昭兩盟及阿拉善一
旗併隸以陝晉向理蒙務各邊州縣名曰綏遠省暫駐綏遠查綏遠地當
衝要村堡相望西爲甘陝之輔車北爲烏科之後路南則屏藩直晉東則

翼衛

京畿於此建立省治誠爲扼要之區得建領之勢惟畫疆而理義取整齊既議
隸以烏伊兩盟阿拉善一旗其西南之界應以陝晉邊牆爲內外之分綫

邊牆以內如神木府谷河曲等廳縣無庸劃出以便控制若東界之甯遠豐鎮興和陶林四廳附近綏城屏蔽東路如葵之衛足葛之庇根若別有劃分是省東數十里外已非所轄未免勢處一偏稍形孤露而移治五原又非驟可施行之事察看形勢五原實不及綏遠第就後套一隅論建省於五原固屬適中就西北大勢論綏遠實扼塞當衝占踞形勝綏綏既建省近省地方不可無管理權也明矣查甯豐興陶四廳向歸晉治晉與直分界在察哈爾左右翼之交左翼歸直右翼歸晉右翼領土卽該四廳管區奴才放墾所至前於二十八年復經劃定大界奏明有案今宜仍因其舊於勢較便

一推廣墾務天下之利必歸農聚民之計在闢地懸觀列邦殖民政策往往於荒涼寥闊之區設法經營不數年卽成巨埠雖曰地利使然實亦人謀之能見實行也矧我邊衛所關藩部所屬游牧之外不乏可墾之地若竟任其曠廢割棄等諸閒田不第於生殖之術有缺也一思及西北塞防遠

或萬餘里近亦數千里向所恃者蒙古屏衛今蒙古已貧弱不堪矣一旦有事根據毫無而欲徵兵內地馳出於空虛無人之域緩不濟急進無所守何以資接濟何以壯聲援此不可空言備防不待善決矣岑春煊左紹佐原奏意皆注重開墾奴才前次議覆程德全開通蒙部摺內亦曾將推廣蒙墾關繫情形詳細奏陳誠以開地乃可實蒙實蒙乃能備邊今將議建省治尤當急所先務查奴才督辦蒙墾以來東之察哈爾左右兩翼漸次清釐西之伊克昭烏蘭察布兩盟分投暢辦他如綏遠城牧廠之興屯殺虎口驛站之報開喇嘛士商之輸納已產罔不收爲墾地極意擴充然近惟河套數百里間渠利暢興田廬相望有成邑成落之象河西則準格爾郡王札薩克等旗站地則頭二三四台等處放墾將竣若鄂托克旗地遠而瘠烏審盟長始順繼抗至今猶未推行盡利者一圍於墾界之有定一滯於荒價之必收蒙地雖廣必待其報墾而後開卽如烏盟六旗延抗至五年之久始肯就議而所報僅西公較多餘則段落零星歸墾放者無

幾近蒙如此遠者可知此墾界圍之也小民舉知本計苟樂土可適得地
不啻得財卽令繳價公家度亦欣願所難者荒寒之地邊遠之區耕作相
同而收穫獨薄人本裹足不前而又以成例之拘不能不微取其值無怪
招致之難也此荒價滯之也奴才考察情形非及今設法變通不足以謀
拓植應請

旨飭下理藩部通行西北蒙旗切實曉譬俾知

朝廷德意在保其土地不利其賦租貧弱之餘萬難仍安故步有以破其愚而
生其悟如綏遠舊屬之伊烏兩盟前已報地應令其續行指報如阿拉善
旗向並不屬綏遠應令其認爲綏遠所屬仍飭照伊烏兩盟指地報墾以
資展拓如此庶可恢張墾界若招墾變通之法重在開地不重押荒岑春
煊條擬酌獎之議切中事情設治後宜仿行其意並應查取上年戶部議
准升任廣西巡撫林紹年奏辦廣西開墾章程就綏遠邊地情勢斟酌所
宜實力推廣除原有墾局外一併以地方官爲墾務員不論舊廳新廳凡

所管有應墾地畝責其設法招墾嚴定考成庶可廣收墾效至蒙地礦產林業鹽池藥廠各項或惑於禁忌不允開採或無力營治漸就衰微尤應一律由軍撫漸求整頓以擴利源此植本而未亦隨之者也

一振興武備蒙旗遠近向爲邊治所不及歲奸藪盜防不勝防兼之土地日開民戶日衆漢蒙民教處雜居竊耕竊種之風爭地爭渠之事習爲故常動釀巨案是非添建民官不足以資治理又非分駐防隊不足以保治安查晉邊一帶現祇巡防馬步八旗及歸墾調遣之大同續備一營近亦改爲防隊分行駐紮藉資彈壓然刁搶馬牛數十匹至百餘匹並斃牧兵多名之案層見叠出近復據烏盟盟長報稱達爾罕旗突來馬賊多名施放槍礮將該旗貝子多歡及福晉人等綑縛威逼槍劫一空等情似此盜賊橫行毫無畏懼在此時已慮鞭長莫及若改建省治自察哈爾右翼東界訖阿拉善旗西界袤長二千餘里南北亦寬及千里或百里巡緝鎮壓僅恃此八九旗防軍之力益恐不敷分布加以口外教堂林立又往往在

偏遠之地均不能不擔認保護佔兵愈多是添練防隊爲必不可緩之一端若以備戰守應徵調尤非籌練陸軍緩急仍無可恃綏遠財力維艱餉械均難籌備從前旗蒙人質性雖強近亦漸就柔弱驟言挑練合格者恐不多得惟既獨立一省縱不能成軍成鎮亦須有混成一協以壯聲威查綏遠土默特現在已成之陸軍合併不及一標若繼長增高漸次添練照岑春煊所擬以綏遠陸軍小學堂改設陸軍中學堂無論旗漢蒙古其材質年歲如能及格一併選取入學廣爲造就庶成材日衆不難編配成營此又陸軍之宜徐圖擴充者也

一整理邊治晉邊吏治之壞由於習染之未除亦由於考察之不及省吏因邊廳之遠也或遂寬其文法邊廳因文法之寬也乃各便其私圖以命盜重情而有不報之案以錢債細故而用非法之刑一訟之成非有意重輕卽藉端需索後先一轍視若固然卽間有稍知自好者不類於貪酷之所爲又往往敷衍因循毫無整頓其在陝邊亦復如是以此求治治何可望

是非亟謀根本改新之計何有掃除積弊之時查岑春煊奏擬變通舊例各節如設州縣佐治之員去幕從門簽之蠹與給辦公之費優予獎勵之階皆所以釐剔弊端有關治本似應仿行其意尤要者設治之始得人爲先於荒寒朔漠之區爲創制顯庸之舉改絃易轍必非習氣太深遇事脂韋之人所可相與有成其賢有能者又未必招之卽來故量材任職之途必不容或隘而循名責實之義則不可不嚴改制時應仿照東三省熱河等處辦法由軍撫慎選才具出衆人員或奏調或奏留先行酌量委用察其果與何缺相當再擬分別補署庶施治較易得人之效不難立見

一計畫經費經始之要惟其實不惟其名樹立本根不必恢張局面無名之費不急之需可裁則裁得止則止款須撙節錙銖亦或較量事可通融盈虛不妨酌劑綏遠建省固非毫無憑藉可比姑就現在地方所入衝以改制後歲需之數約畧核計除綏遠八旗官兵俸餉暨米豆草折等項銀兩係按年由山西藩庫撥解及歸化關例撥稅課歸托薩豐甯各廳應解各

項米折租耗等銀按季發給自應仍照向章辦理外查晉邊地方入款以歸化關稅爲大宗每年約收銀十五六萬之譜其次爲土藥地畝捐各廳斗秤捐每年約各收銀五六萬兩又次則煙酒鹽釐煤釐虎盤捐等項每年約共收銀五六萬兩加以牲畜皮毛釐捐暨現正擬辦之百貨統捐每年亦當有數萬金可收至各廳新舊升科地租現在歲入約五六萬金以上所入款項約共四十萬兩內外以之抵設治經費在常年可及十之四五惟開辦之年需費較多所有供建置籌生聚謀教養密防維在在均關緊要事無鉅細各有動支縱畧具規模力求省嗇亦須由部添撥銀五六十萬兩始敷開辦之用若常年經費除地方自有之款每年由部撥銀三四十萬兩亦可徐圖進步粗足自立況以後善自經營殖財之路正多受協之數可減此固不必多糜帑項重耗度支之力也以上數端謹就才愚慮所及綏遠所便撮舉大概辦法敬貢

聖明採擇至若開蒙古之新知籌八旗之生計使邊氓之進化求實業之速成

置戍建屯以聯聲勢設電築路以利交通則皆設治以行所應審議及之者也

光緒三十三年八月初六日具奏

奏爲携印親赴右衛考驗

軍政恭摺仰祈

聖鑒事竊前准陸軍部咨光緒三十三年又屆

軍政之期行令照例辦理等因當經分飭遵照在案查綏遠所轄之右衛每屆將軍到任途經該處就便先行考驗官員點查軍器相沿成例奴才於二十九年八月間恭承

簡命適在張家口籌辦察哈爾左翼墾務由張垣返綏又順路繞行軍台草道周歷放墾處所並勘分台羣界址由北路赴綏接任於茲四年爲墾務旗務所因於循例考驗右衛官員事未遑及之茲值舉行

軍政大典向例皆調該旗員來綏考驗此次奴才擬親往該處切實考查又台站墾務係奉

諭旨飭辦之件口外民風刁狡和林格爾所屬之新店子村有匪徒煽惑聚衆

阻墾情事迭經委員開導迄未就範該處距右衛不過數十里路所必經
並擬就近勘巡藉資彈壓洵屬一舉兩益現定於八月十六日由綏啓程
除俟考驗事畢再行分別勸懲歸入綏遠

軍政一併據實奏

聞外所有携印親赴右衛舉行

軍政暨帶查墾務情形緣由理合恭摺具

奏伏乞

皇太后

皇上聖鑒謹

奏

光緒三十三年八月十六日具 奏

再前因武備學堂學生畢業經奴才將在事各員擇尤

奏請獎勵奉

硃批該部議奏欽此茲准陸軍部議覆花翎守備胡恩光到堂最先所請免補
守備以都司補用並加遊擊銜核與異常勞績相符自應照准惟查該員
履歷內開由候補把總於光緒二十五年北洋武備學堂出力咨獎案內
保俟補把總後以千總拔補光緒三十年辦結綏屬全蒙教案出力保免
補千總以守備儘先補用該員雖已有守備升階而把總一階尙未補過
實缺未能遽作守備實官仍令俟把總後再行免補千總守備歸都司班
補用以昭核實等因奉

旨依議欽此咨行前來本應遵照辦理惟查現在改練新軍各省綠營悉從裁
汰若必令該員補實把總則已裁之缺終無可補之望若於另案補保此
階後先失序亦於例章未合且前因該員教案出力奏保守備經部議准
久荷

聖恩此次之請獎既屬勞績相符已准之升階似可免從更議綏遠設立武備學堂成效昭著奏辦之始卽調該員充當教習開風氣之先允推功首故於此案列獎在前自陸軍改練新操委該員管帶全營勞瘁不辭尤資得力將來補充軍職管帶應補協叅領與都司品職亦符合無仰懇

聖明俯念邊地得人最難該員成勞最著且綠營千把各項缺已裁盡標無可歸免其補實把總一階仍准作爲免補千總守備歸都司班補用以資勵獎出自逾格

鴻施理合附片具陳伏乞

聖鑒訓示謹

奏於光緒三十三年八月十六日附

奏于九月初二日接奉

硃批著照所請陸軍部知道欽此

光緒三十三年八月十六日附 奏

奏爲考驗

軍政逾歲官員堪以留任循例專摺具

奏仰祈

聖鑒事竊於光緒三十三年二月二十五日准陸軍部咨開本部議奏變通旗

營武職

軍政考驗事宜一摺奉

旨知道了欽此刷印定例通行京外各旗營欽遵查定例外省駐防旗員

軍政有年逾六十以上不能演習槍礮者不准保列卓異此內如有精力尙

健槍礮熟習或曾經出兵著有勞績或實心經理營務仍由該管大臣出

具切實考語保薦具奏聲明另行造冊送部引

見又定例外省駐防旗員

軍政如有年力衰邁卽歸入計典內勅叅若年齒雖老精力未衰亦由該管

大臣詳加查驗秉公甄覈專摺奏請留任供職又於道光十七年九月內奉

上諭遇軍政之年務將逾歲應行留任各員年歲若干之處明白繕單隨摺呈

遞毋許含混具奏欽此欽遵等因各在案今光緒三十三年舉行

軍政之年奴才貽穀會同奴才文瑞遵將綏遠城右衛八旗滿洲蒙古武職

官員分別逐一詳加考驗除將年壯槍枝嫻熟之員循例令其照常供職外至六十五歲以上之協領哈布爾札布文理通達辦事穩練老如壯年於旗務尤持大體協領德克吉克年雖逾歲精力未衰防禦吉蘭精通文藝前在綏遠城烏里雅蘇台塔爾巴哈台經金各處軍營歷辦文案於兵事尤諳防禦保瑞平素當差尙稱勤勉驍騎校額騰依自幼務農仕後公餘尙勤耕耨自綏遠興辦屯墾即派該員開墾其率作興事視公家事如已事年逾六旬益見精神鏗鏘雲騎尉詩穆訥賀右衛驍騎校莫林泰精力未衰當差尙能奮勉該員等可否留任之處出自

天恩奴才等未敢擅便伏乞

皇太后


皇上聖鑒訓示遵行謹將堪以留任逾歲之員各職名年歲另繕清單恭呈

御覽謹

奏請

旨

光緒三十三年九月二十日具奏



奏爲考驗

軍政分別舉劾恭摺仰祈

聖鑒事竊查本年係武職官員

軍政年分前准陸軍部將變通旗綠各營

軍政辦法先後具奏奉

旨允准欽遵刷印原案並所定則例行令遵照辦理在案伏思

朝廷用人武職與文職並重而五年

軍政亦與三年大計名異而實同秉甄核之大公以施勸懲之妙用典至鉅

也法至嚴也況當此整頓武備改演槍枝已非舊例相沿尤須認真校閱

奴才貽穀自承乏綏遠撫旗防之疲敝念時局之艱難慎選人才力圖振

作嚴禁嗜好以差缺爲勸戒之方登經奏明有案凡各員才具之短長及

當差之勤惰平時接見屬僚揀選官缺即已留心試驗遇事考查此次

軍政舉行大典攸關更不敢稍涉敷衍查綏遠城八旗滿洲蒙古職官六十五員世職官二十七員此內現在烏里雅蘇台軍營之三等輕車都尉一員騎都尉一員科布多軍營之恩騎尉一員因病出缺之佐領一員原品休致之防禦二員遺缺未放之驍騎校一員未經承襲之騎都尉兼一雲騎尉一員雲騎尉四員恩騎尉一員均係例不考察未經入冊所有應行考驗

軍政之官七十四員

奴才貽穀會同

奴才

文哲琿於本年九月初三日按照

新章逐一考覈茲查有鑲紅旗滿洲佐領阿克敦食俸餉二十八年四十三歲品行端方管轄嚴肅放餉無虛槍技有準尤能精通文義表率閩旗正紅旗滿洲花翎佐領金奇邁食俸餉四十六年年六十一歲差使勤能文義清通管轄服衆辦事尤識大體槍亦中靶該二員均已歷三年俸滿任內並無降級罰俸案件擬將該二員保薦卓異實屬名實相符請

旨飭部查核並將該二員履歷另冊送部又查有管理正黃正紅二旗滿洲花

翎協領兼鑲藍旗滿洲佐領吉玉年老衰頹旗務廢弛鑲藍旗滿洲驍騎
校桂斌嗜好甚深難期振作以上二員應請勒令休致正黃旗滿洲防禦
世襲雲騎尉佈勒合恩才力不及應請降調仍留世職免有濫竽八旗人
員沾染嗜好者最多奴才迭次換更迭次嚴禁始而十居其七近則不過
一二其內有戀未戒清寬予期限者仍當隨時察看儻屆期未能改革再
另行奏參其餘照常供職各員均經填註考語分別造冊一併送部查覈
除右衛官員經奴才貽穀親往考驗另片奏明外所有遵例舉行綏遠
軍政據實舉劾緣由理合恭摺具陳伏乞

皇太后

皇上聖鑒謹

奏

光緒三十三年九月二十二日具 奏

再右衛旗營疲敝爲各省駐防所僅見政以賄成上下視爲常例兵皆困象戰守均無可言以相沿習慣之風成積重難返之勢若非此次舉行軍政躬往考查尙不料其疲敝情形至於此極查該衛官僅無嗜好者只有一員兵二百八十名沾染嗜好者居三之一其閑散本聽其自由更指不勝屈矣奴才欲大加整頓直苦措手無從官卽盡更而官之委靡者如故兵卽盡易而兵之頹惰者依然查其中病之原弱積於貧習染於漸一施猛力勢必盡填溝壑轉多窒礙難行之處計惟有去其太甚懲一而儆百今以策後以漸成之者仍以漸去之茲查有正黃正紅二旗滿洲防禦崇齡嗜好太深難期得力應請卽行革職鑲白正藍二旗滿洲防禦世襲雲騎尉金貴才力不及應請降調仍留世職正黃正紅二旗滿洲驍騎校富春年逾七旬精神頹敗應請勒令休致其餘或年力尙強或才具可用擬責令痛除舊染力求自新嗣後若仍狃於故常再隨時奏劾至所屬兵丁奴才當時去其老弱不堪以其本人子弟年壯者易之七十餘名如此一

轉移間在老弱不至立蹙生機而在

國家尙能一兵得一兵之用其未盡更換者責成城守尉再行認真挑選實力操練凡有嗜好者限期嚴禁不得奉行故事並擬另選數十名歸入綏遠陸軍一體演習新操及時整飭除將照常供職各員遵例造冊送部外理合附片具陳伏乞

聖鑒訓示謹

奏

光緒三十三年九月二十二日附 奏

奏爲叩謝

天恩仰祈

聖鑒事竊奴才恭逢本年十月初十日

皇太后萬壽聖節渥蒙

恩賞石青江綢駝色江綢蓋緞絳色緞各一疋齋捧到綬奴才當卽恭設香案

望

闕叩頭祇領謝

恩訖伏念奴才以韋布儒生來領旣襄部落欲開荒服糾纏久則難比治絲欲肅戎衣紀律嚴則難期挾纊方滋慚夫鵝翼乃承

賜以

龍章際

昌期而拜

冕旒萬國之衣冠盡肅被

文采而彰黻黼九邊之草木皆華在昔漢重元勳榮以繡被唐旌直諫賜之錦

袍奴才何人膺茲

優賚自

天錫寵伏地增慚惟有益矢悃忱勉酬

汪濊壯藍縷山林之色率黃冠草服以習勤念

宵衣

殿陛之勞敢緩帶輕裘而自逸所有奴才感激下忱理合恭摺具

奏叩謝


天恩伏乞

皇太后

皇上聖鑒謹

奏

光緒三十三年十一月初九日具奏




再綏遠陸軍小學堂上年揀足學生三十名於八月間開學作爲一班業經將辦理情形奏明在案查本年八月頭班學生學習一年期滿應續添二班亦經照章挑選學生三十名分班入學至增設員司卽遴委前班武備畢業生分充以資教育而符定章據該學堂稟請奏咨前來奴才覆核無異除將詳細章程及表式咨部查照外理合附片具陳伏乞

聖鑒謹

奏

光緒三十三年十一月十四日附 奏



再綏遠中學堂及初等小學堂均經奏明設立惟尙闕高等小學堂無承
上啓下之階失教育遞升之序奴才於本年三月間奏陳學務情形業經
聲明俟財力稍紓卽行籌辦在案查綏遠庫儲匱乏籌款維艱必待財力
擴充始行籌設此項學校誠恐點金乏術高等無成立之時待米爲炊八
旗有失學之慮奴才籌維再四擬將高等小學堂附設中學堂之內藉資
樽節此項學生卽由初等學堂選其合格者升入學生不難選所難在多
設一學卽須多用人員多籌經費耳茲幸中學堂承辦教習各員知奴才
急於興學艱於籌款皆願盡義務擔任兼辦屢請速成如此則不必添設
員司而學校可增學費可省洵屬一舉兩得業於六月間飭令開學一切
名目課程悉照奏定新章辦理除咨部查照外所有籌設高等小學堂緣
由理合附片具

奏伏乞

聖鑒謹

奏

光緒三十三年十一月十四日附奏

奏爲清查土默特地畝以安民業而恤蒙艱詳陳辦法恭摺仰祈

聖鑒事竊查土默特旗界內民蒙雜居地畝渚混奴才貽穀到任以來疊經全旗索領公同印稟籲請清釐謹於光緒三十一年二月間會同前任歸化城副都統文瑞奏請開辦奉

旨允准在案嗣因其事繁難滿漢官員意見不能融洽無從著手境內又復荒旱姑從緩議至去年十月間始行設局名曰清查土默特地畝總局由奴才等札派分省補用直隸州知州王德榮充該局總辦督率員司分投查勘務使民不失地蒙不失租收一地二養之公益無此疆彼界之互侵庶幾民蒙各安其居不相紛擾卽嗣後土田訟案亦可憑所發印照立斷以平其爭近已酌擬章程逐漸暢辦敬將大概情形爲我

皇太后

皇上縷晰陳之士默特地土晉之北鄙也境內分設歸化薩拉齊托克托和林

格爾四廳武川清水河二廳亦半屬土默特之地其間村落相望人煙稠密無異內地推原其始民人負耒出疆爰得我所蒙戶買田得價以養其生民有餘力假蒙地以耕之蒙有餘地假民力以芸之公平交易人情之常固

朝廷禁令所不及乃轉相租典疊經分割始則蒙與民私立約據繼則民與民私立約據一地數約一約數主而蒙戶年久迷失既失其地又失其租雖經涉訟官斷無從如此則病在蒙百畝之田五畝之宅終歲勤劬民生不易而安分良民地無印契奸民劣蒙勾串加價而覬覦之要索贖地而攘奪之因謹愿以傾家恃狡黠爲得計實爲風俗人心之大害如此則病在民現值

朝廷撫綏藩屬統西北蒙疆數千里通飭調查物產繪具地圖以固吾圉直晉秦三邊東則察哈爾西則烏伊兩盟均經開墾疆里井然惟土默特橫互其中勢如絲亂亂而欲其理之必自清查地畝始惟地勢寬長各四百

餘里而各廳糧地綏遠米地台站地公主府地必須一一劃出其難一也
凡一蘇木內而官兵戶口地官灘牧廠地絕戶地各召廟地必須一一分
清其難二也清查必先勘丈而地畝零星大半不成片段丈地百塊或僅
頃餘每繩一根在東西各墾一日能丈十餘頃者此則不過一二頃其難
三也丈地必先驗約而新約舊約纏繞重重細爲辨其真贋明其曲直每
遇一案動費周折始得剖析清楚各無異言其難四也用人既多經費所
出必取之於地而民人耕種均經蒙戶租典或已得過壓租或已得過典
價此次萬難多取且水地旱地肥瘠懸殊勢非多分等則不能得其公平
其難五也歲租所入蒙古特爲生計既給民戶以執照亦必給蒙戶以租
據使兩有憑證以便按年取與第其原租之數多寡參差相去或至百倍
不可以等則核定俱待驗其白契良多益寡斟酌註其數於印照印據之
內其難六也此次開辦先從歸化負郭之田入手由近及遠按次清查該
旗共分六十佐現已查訖十有餘佐凡地經民人租典雖曾出過價值尙

非永業此後蒙古永不贖地應飭令民人補交地價以作經費戶口之地酌提二成發給蒙古原主用示體恤民人補交地價共分八則上則地每畝一兩六錢上中地一兩二錢上次地八錢中上地六錢中地四錢中次地三錢下地二錢下下地一錢其草灘牧地未經開墾歸公另放之地仿此略加變通俟民人清繳後發給印照永爲該戶執業至蒙古自種之地亦爲清丈發給印照不取地價不出歲租以其爲蒙人之原業也均經該局詳擬章程稟請核辦前來奴才等覆查無異轉飭遵辦以竟其功蓋土默特定制在官無俸在兵無餉惟此土地以爲戶口之養贍而又變價度日典賣於民積至今日常年所入僅有歲租閣旗官兵數千戶困苦顛連其情可憫此次清查後擬將官灘牧廠絕戶之租由該旗戶司征收作爲該旗公款自叅佐以次分定津貼以資辦公官兵召廟戶口之租本係各人私產仍以屬之本人以昭公允總之清查主義在化民蒙之爭而使各利其利庶與東至察哈爾左右翼西之烏伊兩盟結成一塊完土政教之

原質基於此所有土默特地畝情形及現在辦法緣由理合恭摺合詞具

陳伏乞

皇太后

皇上聖鑒訓示謹

奏

光緒三十三年十一月二十一日具奏



再已革花翎副都統銜土默特叅領福祿於光緒三十二年九月間因職官在公署相殿經奴才等

奏請革職以肅官常並聲明土默特清查地畝及各項新政在在需人該叅領素有廉名才具尙堪任使擬仍暫行留旗差遣俾觀後效而贖前愆如果能知愧奮再由奴才等奏請

恩施各等情奉

旨允准在案土默特查地於去年十月間開辦頭緒繁難卽派已革叅領福祿到局當差奔走田間不辭勞瘁旗務旣爲所諳悉地界尤賴其劃分公平正直取信於民功實足以補過擬請開復原官及原銜翎枝蒙古官員并應免繳捐復銀兩以示鼓勵仍由奴才等隨時察看若能始終無懈遇有叅領缺出再爲請補又已革花翎知府銜山西代州直隸州知州劉鴻達於口外情形深爲熟悉奴才貽穀前辦察哈爾右翼墾務卽調該革員到墾頗資得力光緒二十九年十一月間察哈爾右翼墾務成效過半曾由

女子貽穀

奏請開復原官經吏部議令遵照新章捐復後另行覈獎此次土默特查地先從歸化入手該革員昔曾署理歸化同知政聲卓著愛戴在民又派充該局會辦果能縷析條分民蒙無不遵服擬請謹予開復原銜翎枝以爲辦事勤能者勸土默特清查地畝事體重大關係民蒙之生計基礎地方之治安創始發端尤非易易以上二員一則爲蒙之所服聽其指揮一則爲民之所親仰如父母是以千頭萬緒勢如亂絲無不迎刃而解今已開局一年之久其勞績洵不可沒合無仰懇

天恩俯如所請出自

逾格鴻慈除將該革員履歷咨部查照外謹合詞附片具陳伏乞

聖鑒謹

奏

光緒三十三年十一月二十一日附 奏

奏爲試辦抽收煤炭密釐以濟公用恭摺仰祈

聖鑒事竊查前准商部咨開本部奏定礦章第二條凡稟請辦礦應由本部給發執照爲憑未發執照以前不得舉辦如小本經營本部自應量加體恤變通辦理等因當查歸化城土默特屬境內萬家溝五當溝巴圖溝一帶昔年奏准開有煤炭密五處該密戶向由歸化城副都統衙門領票挖取一應徵收煤炭稅錢照例開支按年報部核銷迺因年久舊密多被水估塌陷原戶亦遂棄業星散所有進山挖密者率皆三五窮民合夥湊集錢米尋苗挖取僅供口食所餘亦微乎其微設令其遵照商部所定煤柴小礦變通照費章程請領部照恐難即時辦到業將派員確查情形隨時咨覆農工商部查照在案現值整頓礦政此項密戶既無力請領部照自不能任其私挖惟有先行試辦抽釐之一法按密每售一分價內抽收二釐公費量時加減其從前該密陋規概行裁革如是辦理於密戶既無虧損

無不樂從而於例徵稅釐亦併行不悖經理更易擬自三十四年正月
起開局試辦所抽窰釐分爲三成以一成作爲各處公費一成作爲學堂經
費其一成另欸存儲俟積有成數專作推廣礦務請領部照之需如蒙
俞允卽由奴才等揀派妥員前往薩拉齊會同該廳官就近設立總局以便統
屬各處分局將所收窰釐按月冊報免致弊混仍於年底報部核銷除咨
部查核外所有就地窰款各緣由是否有當理合恭摺具陳伏乞

皇太后

皇上聖鑒訓示遵行謹

奏

光緒三十三年十二月十六日具 奏

奏爲遵

旨籌議體恤蒙旗謹陳管見恭摺仰祈

聖鑒事竊奴才接准理藩部咨開光緒三十三年九月十八日奉

上諭我朝撫綏藩服恩義素孚凡有管理藩務之責者均當仰體朝廷撫育至意勤宣德化乃近聞理藩部積習甚重弊竇繁多殊非所以示懷柔而敷聲教著責成該尙書侍郎等認真整頓將從前所有錮習迅與革除淨盡另訂妥善規條通飭所屬員司實力奉行如有把持舞弊人員卽由該尙書等據實糾叅從嚴懲治倘仍瞻徇朦蔽一經覺察定惟該尙書等是問其東三省督撫暨西北路將軍都統大臣於藩服尤爲切近應一併妥籌體恤嚴禁滋擾并將所籌辦法隨時具奏毋得視爲具文欽此欽遵仰見

朝廷軫念藩封一視同仁之至意欽服莫名奴才竊維日俄戰事以前東北邊防重於西北日俄戰事以後西北邊防更緊於東北其地當衝要而樹西

北之屏藩者內外蒙古耳蒙心一失邊患益深患伏無形幸安今日一旦危形顯露所謂收拾捕救俱無所施如才督墾六年得諸傳聞証以確見並隨時參古今之制爲文獻之徵於內外札薩克稔知梗概他不具論謹就所轄切近情形爲我

皇太后

皇上縷晰陳之請言蒙部之貧有田野而不知治有人民而不知殖藥材鹽課隨處皆生而不知經營悉棄於地斯雖有若無也牲畜絨毛是其大利而不知孳息悉委諸天將由多漸少也襲引本常例耳任部吏之索求藉

恩施以資其訛詐借貸本無多耳供館商之盤剝雖倍蓰亦難於清償數百年來視行賄爲固然甘受欺而不悟其土地非不廣也知其見小而以利餌之既失於奸民之欺誘知其畏強而以勢奪之復失於外族之覬覦甚至以遠拜佛好修廟之端竭全旗之精華仍復告貸上年達賴喇嘛北來輾轉日時並全蒙之精華殆盡而哲布尊丹巴之窮奢極欲日歛日耗尤無

已時來源既蹙去路方宏遂使王公貝子困於債累有不如平民之安樂者下至蒙衆更可想矣其貧有如此者請言蒙族之弱紀綱不立惟佛教是崇於是喇嘛日多人丁日減召廟日盛種類日衰極其信迷之深有漸歸於漸滅勢所至也乃近聞蒙衆亦多無嗣恆有以已剃度而歸宗者而一本數支十不一二奴才時與蒙接詢之皆然藩族式微於茲可慨就奴才所知而言邊廳皂隸以索費未遂竟敢挈郡旗王領而掌擊之是以王而辱於役也札薩公旗有館商宿於蒙家膽敢肆淫執商送於公公恐商挾而索債但鞭其蒙婦而釋商厚加以禮貌是以公而屈於賈也達爾汗貝子全家爲匪所網肆行拷烙搶掠一空是以貝子而危於賊也王公貝子甘受人欺何論蒙衆兩盟劫馬牛之案一歲數十起至有掠數百匹坦行數百里毫無顧忌如人無人之境者郡旗所有牧馬已空其羣奴才每聞警報嘗派兵彈壓并以墜隊隨時巡緝稍資鎮攝終難久安固由兵力太單亦各旗無自衛之力耳其弱有如此者惟貧斯弱愈弱愈貧今之值

蒙其必富之強之審矣莫富於墾蒙荒也保其土地不利其租賦有得無失理最易明然自奴才督墾以來於東之左右兩翼既留牧廠又留缺田西之烏伊兩盟半給押荒全給歲課巡墾則滋擾嚴禁路所經不犯秋毫報墾則體恤妥籌地未放先給荒價九經柔遠厚往薄來奴才於蒙部但有往而無來厚以恩施昭其信實伊盟之墾乃開猶時有好蒙衆衆仍思復抗而烏盟六旗梗阻至五六年之久近始報墾豈體恤有未至耶蓋在我爲利蒙之舉在彼仍有失地之憂其難一也莫富於殖蒙產也利本無而使之有財本少而使之多望其物阜財豐實已仁至義盡本年理藩部開表調查實業各要政奴才復遣員往諭守候乃問疆界則奪田爲懼問牲畜則加稅滋疑勸開礦產則曰風水攸關勸興林業則曰沙漠弗便而且猜生意外諱莫如深非匿有爲無卽以多報少所以兩盟十三旗只有七旗呈覆其在六旗坐守調查之委員至今未歸蓋觸其所忌考之愈殷拒之愈力其難二也有人皆頑無事不廢論者謂宜強蒙以學開其智識

卽以振其愚柔也現如喀爾沁科爾沁等部學堂已設風氣漸開有撫蒙之責者自宜推廣提倡奴才綏遠設蒙學一所勸諭各旗選聰穎子弟來綏就學給其衣食寬其課程優厚相加僅有一二旗來應者而驟習漢文終多格格不入他旗則徘徊觀望學堂也而教堂視之且以四子五經爲異說何論教科方將趑趄退縮之不遑何能感憤則興學難地則任人侵佔矣人則任人陵轍矣論者謂宜強蒙以兵壯其人丁正以保其疆土也兵本其所樂聞第一言夫餉出之蒙部與籌之

國家均有萬萬不行之勢本無米之爲炊豈量沙而增竈此何事也兒戲敢乎哉且蒙學未立驟練蒙兵尊親之義不明桀驁之資已具無論勝不相讓敗不相救之劣性不能協力禦侮而怯於公戰勇於私鬪之積習反足輕啓邊釁第以練論強素無條理之人律以步伐止齊練其心膽耳目彼一兵成就難於我之千百此蒙兵一事奴才每審顧遲徊視他政而尤難者也願具此數難豈遂畏而止乎但空言體恤何濟貧弱之艱實講撫綏

別無富強之策計惟有結以恩義徐釋其猜忌之心待以公誠漸啓其文明之化撫之如家人父子濟之以懷德畏威俟其信不復疑毫無顧忌而後迎機利導必如順流之舟矣近蒙如此遠蒙可知際此時艱先其所急當亟思固結以維其心悉屏索求以紓其力上年黑龍江將軍程德全奏開各蒙會請

旨飭下理藩部凡遇蒙古王公貝勒年班進京並應承襲引

見開誠布公曉以大義務期心悅誠服不令見異思遷其議論極爲痛切蓋思遷一語必有見聞用出此收拾人心之計現正屆年班應請

飭部遵行奴才前以理藩院積弊素深奏請仿照吏兵兩部於各官補缺引

見等項酌定繳費章程凡蒙古自王公以下遇有襲引遷補之事亦令微繳公費奏明有案意在刪除煩苛杜絕婪索與程德全所奏大致相同良以銅弊一時難除無已冀少有限制也今幸

聖明燭照

詔旨森嚴內外臣工果能實力遵循認真整頓卽不必再議繳費而亦弊絕風清矣總之

國家操縱之權典屬施行之準必不任館商部吏假借行私致使威福所加怨歸

朝廷恩歸若輩下飽蒙賄

上失蒙心夫婪索在他署尙難而於海部尤甚固蒙人易於愚給亦以蠢吏之外又輔以奸商應索無資有商託詞於轉貸詐財乏術有吏居奧以爲援蒙員慣受其欺轉以爲天經地義故賄事愈行而愈坦穢聲愈遠而愈彰奴才接見蒙員時常聽其侃侃而談公然不諱謂某事用款若干某蒙花錢若干聞之髮指所以有微繳公費之奏蓋今日之蒙不必別言體恤但免訛詐要求卽霑實惠是二者係統內外各札薩克而言至若烏伊兩盟其應加體恤奴才爲切近之察思切要之圖一在安不安之生一在平不平之氣不安之謂何墜雖無妨於收其報地多者究亦因之而少口外幅

頓遼闊馬賊縱橫財物少劫之尙難牲畜多驅之最易潰勇流毒沙漠久不安生惟蒙人適當其衝斯蒙畜幾歸於盡倚此爲命者命不堪矣地係蒙土廳係民官本視蒙爲無足重輕之人卽視搶蒙爲無足重輕之事以故報案不緝任匪遠颺逮賊不刑聽其逃供至有獲賊在押逃越十數而不上聞者蒙地搶案之多官縱之也至於虎狼之差役以案至蒙居者更拉朽摧枯視若土芥矣滿目瘡痍不能於父母斯民者告訴卽呼籲聞於奴才亦無可如何浩歎而已且民蒙雜居一處邊吏縱不恤蒙能將其所管之地措之治安蒙亦因之受福然而難矣不平之謂何人情不平則嗚嗚於官冀其平也民蒙交涉屬之邊廳乃票傳有費供給有費到案有費例以日計故延其時而以步來者必以馬送馬不足者必以錢抵且傳一案動至數十人其未到案以前蒙家已破矣不敢到者謂之輪理其敢到者謂之挺訟蒙無生路矣以癡蒙之愚當奸民之詐得直本難更以弱蒙之懦遇酷吏之貪威嚇尤易夫邊吏豈必袒民厲蒙哉廳官周歲而必更

書役累世而如襲作半生宦囊之計聚羅掘乘時存五日京兆之思吏胥假手而又當難於覺察之地易於嚇詐之人不斂何待故蒙一涉訟十無一直迨至爭畜者訟雖完而畜俱盡爭田者案未結而田亦無強忍難甘不直於公者輒聚私鬪人或數百時或數旬小之命案釀成大之邊氛不靖維時邊廳告警於軍署而已覺後時軍署責望於邊廳轉指爲袒護至暗無天日之非刑爲千古所未有結怨尤深奴才並不敢穢陳於

上不平若此不安若彼要其敢於肆行者病在省吏耳目所不及距省愈遠者尤同化外今欲平其氣而安其生此固將軍之責也然將軍轄蒙旗而地方非其所管邊廳管地方而蒙旗非其所轄此無體恤之力彼無撫綏之責畛域難化呼應不靈撫此蒙生愧無以對奴才惟有以心之所得盡力之所能爲實力奉行厲禁滋擾自爲體恤而已奴才遠維邊患近察蒙艱不敢以大言鋪張危言聳駭巧言粉飾虛言誣妄凡此皆就聞見實情披瀝上陳是否有當伏乞

皇太后

皇上聖鑒訓示施行謹

奏

光緒三十三年十二月十六日具奏

奏爲遵

旨妥籌旗丁生計謹將已辦及現擬續辦各情形恭摺仰祈

聖鑒事竊奴才恭閱邸抄光緒三十三年八月二十日

上諭我朝以武功定天下從前各省分設駐防原爲綏靖疆域起見迨承平既久習爲游惰坐耗口糧而生齒滋繁衣食艱窘徒恃

歷代豢養之恩不習四民謀生之業亟宜另籌生計俾各自食其力著各省督撫會同各將軍都統等查明駐防旗丁數目先儘該駐防原有馬廠莊田各產業妥擬章程分畫區域計口授地責令耕種其本無馬廠莊田及有廠田而不敷安插者飭令各地方官于駐防附近州縣俟農隙時各以時價分購地畝每年約按旗丁十分之一或十數分之一授給領種遂漸推擴世世執業嚴禁典售以所授田畝之數爲裁撤口糧之準裁停之餉另款存儲聽候撥用該旗丁歸農以後所有丁糧詞訟統歸有司治理一切與齊民無異至

田畝之腴瘠價值之低昂各省互有不同但以足敷養贖爲度一面仍將各項實業教育事宜勒限認真分別籌辦以廣旗丁謀生之計其授田之始應需廬舍堤堰及農具牛種等項并開辦實業各經費准由裁停存餉內核實奏請酌量協濟并著各將軍督撫等破除情面實力奉行不得任聽協恭佐領各員挾持私見阻撓大計先由度支部迅籌實在的款以備撥發勿稍諉誤期於化除畛域共作國民用副朝廷一視同仁之至意欽此又於九月初二日接准軍機大臣字寄八月二十三日奉

上諭據廣州副都統李國杰電奏各省駐防旗丁驟聞裁撤口糧易致驚惶請飭妥慎辦理等語朝廷爲旗民廣籌生計授地耕種并籌各項實業教育事宜實屬仁至義盡該將軍督撫等果能會同認真經理先籌地畝妥爲安插然後按照授地旗丁分數徐爲裁撤口糧之計并非操切從事至分購民田諭令按照時價於駐防附近州縣酌量購買官民交易務期平允不至抑勒強迫各該將軍督撫等仍當懷遠前旨實心實力認真妥辦一面剴切曉諭

宣布朝廷德意務使旗民人等家喻戶曉盡釋疑懼期副朝廷化除畛域之至意欽此遵

旨寄信前來仰見

朝廷一視同仁廣籌生計之至意跪聆之下感悚莫名伏念時會所趨法無百年而不變况旗丁積困已久若長此因循舊轍更無望於圖強今裁餉歸農洵屬本原至計溯其受病之原生爲旗族自幼至老仰食公家恃披甲以終身倚錢糧爲性命此外一無所業遂至一無所能大學論生財之道曰生衆食寡爲疾用舒若人則第知食且用課以生之爲之者百不獲一又限於旗禁森嚴乃禁其外出營生而不禁其坐染嗜好長官動行壓制乃不以強迫施之教育而以強迫肆其侵漁甚至缺自賄成預爲扣餉米半折放時或愆期養成庸弱之徒驅於流亡之路兵固疲敗其咎實不盡在於兵夫以無限之人祇此有限之餉焉得按口盡授人人濟之且一餉祇餉一兵也而一家全賴以生其生也僅幸未死耳不幸降革死亡則家

失養是餉可恃而不可恃也推其受病之極有朝不謀夕日祇一餐者有口僅能糊身無一縷者有多祇短褐男婦輪服出爲乞人者有生已數兒輾轉圖存終至絕嗣者若而人者其色皆菜無年不荒有餉且然一旦盡失豈養老與弱自束手而待斃少壯者能甘心哉在南多添會匪在北多添馬賊世本不靖庸可再令紛紜乎是餉宜裁而又不不可驟裁也恭讀

諭旨飭先籌地畝徐撤口糧是旗族生死之關天下安危所係早在

聖明洞鑒固已維繫至周矣奴才數四思維今日之事固在於徐圖裁撤以定

人心尤在於急爲撥籌以安生業蓋自

詔旨一下人心驚懼不知所從若其業一日不安將以前之政治盡頽以後之精神難振而在邊徼可慮尤多奴才亟亟從事謹將已辦大概情形爲我

皇太后

皇上陳之自奴才承乏綏遠憫此窮旗懼補救之失時思綢繆於未雨爲籌生計先除積習鴉片之毒徧天下於晉尤甚綏人之染晉習者尤多奴才以

差缺爲勸懲以少壯易老弱言隨以法幾於不近人情行之四年從前之
十人九瘠者近則不過二三而仍不少寬假蓋不可爲農有地亦廢此力
田之人可資耕作也綏遠收廠距城近者私墾已成村落仍儘原戶認領
不便安插旗丁致難水乳其在後山奏開牛捐留辦屯墾之地早已撥丁
百餘人開地百餘頃嗣經度支部議停牛捐效遲於款現仍設法廣續期
竟全功此外牧廠未放出之地尙堪耕種者已儘數飭八旗認領現又撥
數十戶往備來年東作然此廣土尙非沃壤地利恐微奴才於今春赴套
時見近渠地沃息借商款爲綏遠認領一千二百餘頃當時即調遣旗兵
五百餘名入套先習渠工旁及地堰風會所至人盡恐後爭先有此水旱
三項地畝以旗丁四千五百名計之似數分佈此授田之舉粗有端倪也
至於各項實業教育事宜奉

旨仍飭一面開辦并著破除情面實力奉行奴才於歸化綏遠兩城各設工藝
一所以織布染線栽絨熟皮爲實業籌入股本官商合辦選年幼旗丁百

餘人分入學習遠致本無之布線暢銷自有之皮毛互市通工兼收游惰
取益多矣復設女工廠養孤嫠之無依四十餘人俾作各軍衣履兼編草
帽其操作足以自給又先後設陸軍中學高等初級蒙養半日清蒙各學
堂十八處學生入者已八百餘人矣綏遠子弟計無所遺亦復滿漢無分
有歸斯受陸軍以底款不足僅成一營而利器倍儲尙擬增竈巡警設矣
兵祇百二十名限於餉也遇事之時則以額外學習代之以上數端或
以事屬創行而難言完備或以益未溥及而有待擴充均經奏明有案難
在邊城孤立憑藉毫無款則愈籌而愈艱事則愈多而愈棘每當同時并
舉輒抱捉襟肘見之羞現奉

詔諭責成先其所急仍以授田爲要幸屯規具備已立安插之基有田廬牛犂
之資推而行之其事不難立舉此一舉也期萬口之身家得所爲百年之
基業造端設非計出萬全何能持久奴才雖性好節省亦斷不敢少事遷
就苟且一時惟辦法不惜從寬即需款不能過隘應請

勅下度支部先籌撥二十萬兩俾資展舒開辦然目前祇一費耳所省於將來也庸可計乎且亦不過暫於公家借墊將來分成撤餉仍是全受全歸而受廢爲氓者先得托命矣若無此一墊將開辦何資裁糧何日愈緩愈費此亦不可不計抑奴才更有請者安插一兵即裁一兵之餉理固爾也但初學農事耕稼難工設遇年荒蓋藏無備一爲意中所必有一爲意外所應防擬請歸田後遲裁一年底餉庶緩急有恃不至立蹙生機留有餘不盡之

恩膏代春補秋助之

仁政犬馬去主尙使飽食而行從茲萬里

君門再叨一格外之

施當亦爲

朝廷不忍人之心所必許也除安插詳細辦法另行隨時奏報外所有妥籌旗

丁生計並請

飭部撥款緣由理合恭摺具陳伏乞

皇太后

皇上聖鑒謹

奏

再此次辦法不獨廣籌生計尤重在畛域化除不獨分數授田并推及教育實業第各省旗庫大抵皆艱窘異常各項應辦事官斷難同時并舉卽舉矣亦難普及無他限以財也自來督撫籌款則較將軍易地方辦事又較駐防易官并蓄而兼收斯相輔而相濟現在各直省學堂林立工藝繁興以及軍務商務路政礦政措施之術既宏教育之途尤廣擬請

敕下各省督撫凡舉辦以上數端皆參用滿人不限額數由將軍都統隨時會商和衷辦理此豈第有裨生計哉合旗漢爲一途久而相安相習畛域之見不化自除以有形之益收無形之益行之數年必有明效大驗上副朝廷一視同仁共作國民之至意理合附片具陳伏乞

聖鑒訓示謹

奏

再旗丁口糧有甲者食之餘皆謂之閑散今爲籌生計卽以授地分數爲裁撤口糧之準是有糧之丁在安插中無糧不與其例夫苦莫苦於閑散限於額內不得食餉囿於禁外不得營生有坐困而已就其出身現在論實未嘗一日受蒙養之

恩迨至計口授地之時人遣爲農彼遣爲丐相形之下情何以堪且同是旗丁彼何勞而有田廬此何辜而填溝壑或此次

恩旨所飭計口授地一視同仁者無所不概本不令一夫失所乃近日綏遠閑散疑懼倍於甲兵每於奴才入署卽有數百人遮求於道同聲呼籲慘不忍聞伏思今日之事本

朝廷萬不得已之心而亦時勢之所必至惟盡是窮無所歸之衆又當

國家多事之秋旣無身家何計性命不妥爲安置以各省駐防計其勢亦大可憂可否准將此項閑散一併撥地俾荷

普天無外之仁而消到處無窮之患又兵官一體以糧例俸實缺之官幸矣其

候補與閑散同自奉

諭旨悉爲氓矣不受一塵轉不如兵應請准與甲兵養育閑散世職實缺不分官兵均以口計截止

詔下之日祇分別及歲未及歲妥定撥田辦法以示限制而昭允平至於孤寡錢糧果能處處核實本亦無多自可從緩以待其漸就於無俟將來旗糧裁盡酌給養費從此停撤或歸工藝養濟各所以工代賑俾自食其力如此措置斯人人得所人人力田上下相安均平之政也是否有當

再練蒙兵一層奴才非敢持論自漢迄宋邊患未已明代尤甚雖設九邊重鎮防守猶難獨至我

朝帖然恭順固賴

聖武威服之實由

廟謨豫能防之一佛教之尊也第使喇嘛日增徒類一年班之重也常使藩服近

戴

聲靈

金鑿千秋至今永無邊患今蒙部弱矣凡統籌邊防關懷大局者無不注意練兵冀蒙能自衛并以衛我理固然也卽奴才任兵部時亦曾堅持此議及至來邊熟察情形知其萬不可恃其性與習已於正摺備陳向來蒙性嗜利昧義欲有不遂輒思狡逞雖知螳臂不敢以當車其心耿耿不平躍躍欲試奴才以事驗之尤歷歷不爽舊例凡蒙古置買軍器嚴定限制其私買者更嚴行禁查所罰極重三十年杭錦防後套之匪用槍五十桿尙遠請

於緩准而後行乃知當日防徼杜漸遠慮至周無餉無械兵若無兵餉少
械愈練如不練而以不易籌之鉅餉不易致之利械討之於毫無條理之
人未免可惜況有此憑藉操縱一失當資敵堪虞迨至不爲我用而用於
人之屏之翰安在哉然則蒙豈遂可以無兵乎練有其時耳必先興蒙學
俾知紀律讖尊親以見危致命見得思義之心化勝不相讓敗不相救之
性庶幾勇生於恥憤作乎忠且欲練蒙兵必先練我兵必我之兵力足以
長駕遠馭蒙兵方爲我用而不爲患然使我力既充又何必借兵蕃屬始
足爲固圉之謀此理最易明至於餉難籌械難致人難練教練督練尤千
難萬難書云其難必繼以其慎此之謂也總之利害相權須期萬當茲事
體大實係安危管見謹愚伏維

朝廷慎重謹密陳并請

飭不發抄伏乞

聖鑒謹 奏

綏遠城將軍貽穀奏大員侵吞庫款請切實查辦摺

奏爲大員侵吞庫款請

旨切實查辦恭摺仰祈

聖鑒事竊維從前綏

遠款項本屬一團亂絲而光緒二十六年防邊用款六萬餘兩爲尤甚其中本多浮冒但係卷稱由歸綏道報銷奴才未便過問惟修軍械一項八千四百七十五兩六錢二分一釐一毫八絲八忽經前任將軍信格奏明由綏遠城開單報銷疊經部省咨催迄今尙未奏報奴才詳查卷宗無帳無單亦併無款僅據原管修理軍械現任左司協領景秀會同印房協領哈布爾札布將當日自存冊底交代清單一併呈出僅實用七百七十四兩零一分八釐零五絲二忽詳詢屬實該二員并矢口不移而所餘款項竟無著落當以辦事尙有數員必須詳查方能據奏遂於去臘行查以正月初六日爲限本擬開印出奏因各員聲覆未齊復行咨札分催間有覆文仍涉影鑿查二十六年辦理軍需係現任塔爾巴哈台領隊大臣榮昌在協領任時爲總辦而現任歸化城副都統文哲琿以防禦而委幫辦以其才力心計有餘一切悉聽指揮餘皆奉令承教此款實

用七百兩有奇此外聞該副都統以四千三百兩爲擬補協領之酬所有報銷帳目及原用圖記均行銷減餘則在前二三員分潤而正管修理軍械之員毫未沾染人人皆知但文哲琿以綏遠城人膺現任歸化副都統率多因親族勢力不敢明言當奴才行查之時惟該副都統張皇殊甚到處託人向奴才求不出奏并有親筆函來求另設法融化爲證而行查各員此推彼諉致此案無從辦起該副都統復於開印日期接見景秀哈布爾札布二員大加申斥聲色俱厲謂此實帳如何呈得將軍致將綏城用款底蘊洩出蓋綏遠城用款已往多如是也夫款無論內銷外銷總以公存公用爲一定不易之則今實帳具在實款毫無非澈底根究無從開報况綏庫前存雜款尙多皆以二十六年託詞用盡致令庫儲如洗此款卽爲侵吞之確證案卷俱在時日可考因榮昌文哲琿均係大員應請 欽派查辦理各恭摺具陳伏乞

皇太后

皇上聖鑒訓示謹 奏